

## LUKI

Luki'a mago lota ali'ya'mo ne'aliya vekamo mai'niye. Agaemo Polo'a avagi huno umenitata hu'niye. Agaemo Yu vekamo o'mai'nifa Galiki vekamo mai'niye. Inagi Luki'a mani alagepa faigoko gemo Yesu Kalaisife'mo ava gemo avo'mo kae'niya gemo Galiki vaya'mogi ali'a lekana paige muki alu nofi vaya alu nofi vaya'mogimo ali'a lekana paige hugae. Luki'a mani avo'mo kaeno'ae'mo Ala kava ne'mo Auneme'amo'mo Yesu'mo lokiya vaino ate'nigeno alagepa faigoko ge'amo kagemi ya'apimo ohane'niya vaya'aife'mo aeno hakalo huno hapa pai'niye. Luki'a Goti'mo hosu vaya'mo fiku hapa maeno ne'apamiya kava'amo takesi monimo ne'aliya vekalegamo huge lageso hu'niya mafa'nelegamo huge kogu a kanomo mafa'ne'amo fali'niya mafa'nelegamo huge kumaya vekamo Yesu'e'mo malipu yosale'mo fali'niya vekalegamo huge huno hu'niya kavafe'mo avo'mo kae'niye.

*Luki'a Tiyoalasitegamo avo'mo kaeno atale'nigeno u'niya gema*

<sup>1-2</sup> Ala vekamo Tiyoalasiga afiyo. Mago kava'mo lagaetegamo ago afole ai'nigeta alagi lagesa afita fatago nehune. Aepa fai'niya afinateti'mo mago vaya'mogimo ageme ageme ute'apae'mo ani kavafe'mo ava gemo ae'a hakalo hu'a hapa pai'nae. Ani vaya'mogimo hapa pai'nage'apae'mo asole vaya'mogi afite'a amalageka hu'a ani kavafe'mo ava gemo apaote

apaote hu'a avo'mo kaete'a ali'a magokepi male'a avo'mo kae male'nae. <sup>3</sup> Nagae'e'mo yatala afina'mo muki kavafe'mo ava gemo alagepa hu'na ago afi'nova'mofe'mo afole aite afole aite huno afole ai'niya kavafe'mo avo'mo kaegauve, hu'na nagesa afi'nove. <sup>4</sup> Alike lekana paika afitekae'mo, ali'a naya male'naya gemo alagi lama gemae, huka ageka aeto hisanafe'mo avo'mo nekaove.

*Enisole vekamo'a Sekalaiyasife'mo Yoni'a alika ategane, huno ha pai'niya gemae*

<sup>5</sup> Heloti'a kini vekamo mai'neno Yutiya kotegamo mai'naya vaya'aite'mo yagaino ne'apategeno'ae'mo mago vekamo mono huno ne'apateya vekamo agi'amo Sekalaiyasi'a mai'niye. Agaemo Amaiya mono hu'a ne'apataya nofi vayapati vekamo mai'nigeno a'amo Ilisamete'a ani kava'mo huno mono hu'a ne'apataya nofi vaya'mo Eloni nofi vayapati a kanomo mai'niye. <sup>6</sup> Ani yalavela'moganimo Goti aulagale'mo alagepa kava'mo hute'ana muki Goti ke'aepa ge'amo akame hute'ana alagepa hu'ana mai'na'ae. <sup>7</sup> Mai'na'a'monanafa Ilisamete'a anamo a'mo mai'neno mafa'nemo alino o'ate'nige'ana ago anau anekalomo lete'ana mai'na'ae.

<sup>8</sup> Mago alu vaya alu vaya'mo ago mono hutage'apae'mo Sekalaiyasi vaya'amo mono nehaya afina'mo afole ai'nigeno Goti aulagale'mo mono huno apate'niye. <sup>9</sup> Mono hu'a ne'apataya vaya'ai kava'mo huno Sekalaiyasi'a alagepa atumo ne'aiya ya'mo hi'yalamute'mo male'neno atafi'mo kaesiyafe'mo kayo'mo lo ae'a

male'naya yapati'mo yatala kayo'mo ali'niya vekamo lekana pai'a ate'nae. Lekana pai'a ate'nageno Ala kava ne'mo alopamo no'afi'mo alagepa atumo ne'aiya ya'mo male'nenomata kaesiyafe'mo hai'nige'apae'mo <sup>10</sup> asole vaya'mo kumatega mai'ne'a nunumu'mo hu'nae. <sup>11</sup> Sekalaiyasi'a haino ageyana Ala kava ne'mo enisole veka'amo'a alagepa atumo ne'aiya ya'mo male'ne'a ata nekaya hi'yalamute'mo lamaga haopale'mo he tino mai'nigeno age'niye. <sup>12</sup> Ageteno'ae'mo hau aitenomoli hu'niya'monanafa <sup>13</sup> enisole vekamo'a, Sekalaiyasiyo, koli osuvo. Nunumu'mo hu'nana gemo Goti'a ago afi'niyanageno akamo Ilisamete'mo ve mafa'nemo alino ategaiye. Agi'amo Yoni'ae huka ato. <sup>14</sup> Mafa'nekamo alino atesigekae'mo kamogaga aika kavayagunagu nehisanaage'apae'mo muki'amogimo apamogaga aigae. <sup>15</sup> Goti aulagale'mo ala agi vekamo maigiye. Lokiya ani'mo nete'a negi ne'malaya agufa ani'mo o'negaiye. Ita'amo'mo alino atesiya afinateti'mo Aote Auneme'amo'mo aipafi'mo havai teno maigiye. <sup>16</sup> Agaemo muki Isaleli vaya'mo alino aino atagineno apatesige'apae'mo Goti'a Ala kava ne'apimotegamo ugae. <sup>17</sup> Agaemo Auneme'amo'mo lokiya'amo alitenomilaiya'a hu'niya agufa kava huno uno hogotesigeno Ala kava ne'mo agae akame'mo huno egaiye. *Agaemo vaya'ai apaipamo alino aino afe leno apatesige'apae'mo mafa'ne'apie'mo alagepa apaipamo kali'a apategae.* Agaemo genomafisaya vaya'ai apaipamo alino afe leno

apatesige'apae'mo fatago vaya'mogi ne'aliya agufa apaipa apakesa aligae. Agaemo Ala kava ne'mo vaya'amo agaetefe'mo alo huno apategaiye, huno ha pai'niye.

<sup>18</sup> Sekalaiyasi'a enisole vekae'mo, kagaemo nehana lama gee'mo haiya kava hu'na alagi lama gemo nehane, hu'na afiguve. Nagaemo ago kosuna le'nogeno a'nimo ago anakalo le'niye, huno ha pai'nigeno'ae'mo, <sup>19</sup> nagaemo Gemaliyo'namae. Muki afina'mo Goti haopale'mo ali'ya'amo alisuvafe'mo he ti'na ne'mauve. Goti'a kagaemo kamogaga aisana gemo kaha paisuvafe'mo alino nate'nige'na kagaetegamo emi'ne'nove. <sup>20</sup> Emine'nova'monanafa ge'nie'mo kagesa afika fatago osu'nana'mofe'mo kagemo o'aika afa'a maim maim ne'visanageno lekana pai'niya afina'mo ge'nimo afole aigiye, huno ha pai'niye.

<sup>21</sup> Kumatega mai'naya vaya'mogimo Sekalaiyasife'mo agava mai'ne'apae'mo, na kava higeno'ae'mo alopa mono nopi'mo yatala afina'mo mai'niye, hu'a hu'nae. <sup>22</sup> Nopati'mo emineno'ae'mo ge osuno ayatetike'mo avame name kava'mo hu'nige'a agete'apae'mo, agaemo alopa mono nopi'mo alagamuna agegekana huno aeto agufa kava'mo age'nenno'ae'mo nehiye, hu'a age'nae. Ayatetike'mo avame name kava'mo huteno ge osuno afa'a mai'niya'mofe'mae. <sup>23</sup> Henaga'amo mono nopi'mo ali'ya'mo alino hano huteno no'alegamo u'niye. <sup>24</sup> Ani kana'amo utegenno a'amo Ilisamete'a aipagu'e'mo mai'nenno'ae'mo faefu'a

kaimo fala kino mai'nenoe'ae'mo, <sup>25</sup> Ala kava ne'mo'a nageme nageme huno eno hemenimo naha maeno vaya'ai apaulagale'mo navagage nehiya kava'nimo aeno kalo paeno atale'niye, huno hu'niye.

*Yesu'mo alika ategane, huno ha pai'niya gemae*

<sup>26</sup> Ilisamete'mo sigisi kaimo aipagu'e'mo mai'nigeno Goti'a enisole veka'amo Gemaliyo'a alino ate'nigeno Galeliya kotega Nasalasa taonifi'mo emine'niye. <sup>27</sup> Ani taonifi'mo mago a'mafa'nemo agi'amo Maliya'a ve'e'mo magokepi lokaeno ohavae'niya a'mafa'nemo Nevini nofi vayapati vekamo Yosefe'a aliguve, huno huteno lekana pai male'niya a'mafa'nemo mai'niye. <sup>28</sup> Enisole vekamo'a agaetegamo emineno, vase hutalo, huno ge amamaeteno'ae'mo, Ala kava ne'mo'a kagae'e'mo magokepi lokaeno mai'nenoe muki asole a'ne anagapati'mo lekana paino kateteno kaha mae'niya ane, huno ha pai'niye. <sup>29</sup> Maliya'a ani gemo afiteno'ae'mo lusi kava huno koli huteno'ae'mo, ani gemo aepa'amo na agufa gemo nehiye, huno agesa afino mai'niye. <sup>30</sup> Enisole vekamo'a, Maliyao, koli osuvo. Goti'a lekana paino kateteno kaha mae'niye. <sup>31</sup> Afiyo, kaipagu'e'mo maiteka ve mafa'nemo alika ategananagi ani mafa'nemo agi'amo Yesu'ae huka ato. <sup>32</sup> Ala agi vekamo mai'nisige'a agi ae'apae'mo, hogote vekamo aeno apaka se'niya vekamo mafa'ne'amo mai'niye, hu'a hugae. Aginago vekamo Nevini'a Isaleli vaya'ai ala'apimo mai'nenoe yagaino ne'apateya

kava huno Ala kava ne'mo Goti'a, ala'apimo mai'nenno yagaino apatesiya vekae, huno ategaiye. <sup>33</sup> Agaemo Yekopu nofi vaya'ale'mo yagaino apatenno hano osuno yagaino apatenno maigiye, huno ha pai'niye. <sup>34</sup> Maliya'a, Vele'mo o'mai'nogi haiya kava huno afole aigiye, huno ha pai'nigeno'ae'mo, <sup>35</sup> Aote Auneme'amo'mo Goti himamu'amo hiyakana huno kagaete'mo eminesigeka alika atesana mafa'nee'mo, aote vekamo Goti Mafa'ne'ae, hu'a agi aegae. <sup>36</sup> Afiyo, negafokamo'mo Ilisamete'a anamo'mo maimo eno anekalomo le'niya'monanafa sigisi'a kaimo aipagu'e'mo mai'niye. <sup>37</sup> Goti'a mago kava'mo afa'a osisiya agufa kava'mo ohane'nifa muki kava'mo afa'a hugiye, huno ha pai'nigeno <sup>38</sup> Maliya'a, Goti ali'ya'amo ne'aluva a'mafa'nemo mai'novanageno muki hu'nana kava'mo nagaete'mo afa'a afole aigiye, huno ha pai'nigeno enisole vekamo ataleno u'niye.

*Maliya'a uno Ilisamete'e'mo lokae'ana mai'na'a gema*

<sup>39</sup> Aise afina'mo utegenno Maliya'a malage huno he tino aise aulafi hane'niya kote'mo uno Yutiya kotega mago taonifi'mo ava'yi huteno <sup>40</sup> Sekalaiyasi nopi'mo haino Ilisametefe'mo ge amamae'nigeno <sup>41</sup> Ilisamete'a ne'afigeno'ae'mo aipafi'mo mai'niya mafa'nemo'a fanagu panage hu'nigeno Aote Auneme'amo'mo Ilisamete aipafi'mo havai te'niye. <sup>42</sup> Ilisamete'a alopa gefati'mo ge huno'ae'mo, Goti'a mago a'ne anaga'aitegamo nosiya agufa kava'mo huno kagaemo lusi kava huno kaha maeno

kamitenno kaipafi'mo mai'niya mafa'ne'e'mo ha mae'niye. <sup>43</sup> Ina agufa a kanomo mai'novana na kava higeke Ala kava ne'nimo ita'amoga nagaetegamo e'nane. <sup>44</sup> Afiyo, ge namamae'nana gemo ne'afugeno'ae'mo naipafi'mo mai'niya mafa'nemo'a amogaga aitenno fanagu panage hu'niye. <sup>45</sup> Ala kava ne'mo'a kaha pai'niya gee'mo kagesa afika fatago hutekae'mo, afa'a afole aigiye, huka hu'nana a'mo mai'nananageka afa'a kamogaga aigane, huno ha pai'niye.

*Maliya'a Goti agi'ale'mo alino asaga hu'niya gema*

<sup>46</sup> Maliya'a huno'ae'mo,  
Naipafi'mo Ala kava ne'mo agi'ale'mo ali'na asaga hu'na ne'atove. <sup>47</sup> Naune'name'mo Goti'a agufamo alino katino ne'ateya vekae'mo amogaga ne'aiye. <sup>48</sup> Ina agufa ali'ya'mo ne'aluva a'mafa'ne'amo mai'nogeno nagaefe'mo agesa afi'niya'mofe'mo, Goti'a ha mae'nigeno alagepa huno mai'niye, hu'a hugae. Hemenimo mai'naya vaya'mogi'e henaga'amo muki ali'a apatesaya vaya'mogi'e'mo ani gemo hugae. <sup>49</sup> Aote ala agi vekamo ayamufa'age vekamo'a lusi kava huno naha mae'niya'mofe'mo nava gemo hugae. <sup>50</sup> Agaefe'mo koli hute'a aiyafi'mo mai'naya vaya'aife'mo hau huno apateme apateme uno hau huno ne'apate. <sup>51</sup> Ayateti'mo lokiya kava'mo huteno ala vaya'mo mai'none, hute'a, ina kava'mo hugune, ma kava'mo hugune,

hu'a apakesa ne'afiya vaya'mo hapa faino apatalege'a u'e'a nehae. <sup>52</sup> Agaemo lokiya vaya'mo yagai'a ne'apataya vaya'mo alino afepi apateteno ina agufa vaya'mo alino asaga huno ne'apate. <sup>53</sup> Apaka neteya vaya'mo alagepa ya'mo lusi kava huno alino ne'apamige'a ne'a apamu nehae. Ne'apamiya'monanafa kagemi ya'apimo hane'niya vaya'mo o'apamino hapa faino apatalege'a afa'a ne'vae. <sup>54-55</sup> Agaemo Emalehamufe'mo ge huteno aginago vaya'aife'mo, nahau hu'na lapatete'na lapa maege lapa maege hu'na lapa maegauve, huno hapa paite hapa paite huno hapa pai'niye. Hemenimo laginago vaya'aife'mo hapa pai'niya gee'mo agesa afino ho huteno Isaleli nofi vaya'mo ali'ya'amo ne'aluna vaya'amo laha mae'niye,

huno hu'niye. <sup>56</sup> Maliya'a Ilisamete'e'mo lole'e mago'e kaimo lokae'ana maite'ana ataleno no'alegamo u'niye.

### *Ilisamete'a Yoni'mo alino ate'niya gemae*

<sup>57</sup> Ilisamete'a mafa'nemo alino atesiya afina'mo ago afole ai'nigeno ve mafa'nemo alino ate'niye. <sup>58</sup> Ko'alega vaya'mogi'e agai'a vaya'amogi'e'mo ani gemo afite'apae'mo, Ala kava ne'mo'a hau huno ateteno lusi kava huno ha mae'niye, hu'a hute'a Ilisamete'e'mo magokepi apamogaga ai'nae. <sup>59</sup> Magoke salemo utegeni Yu vaya'ai kava'mo hu'a ani mafa'nemo agufamo lagausayafe'mo e'apae'mo, afo'amo agile'mo



ategaune, hu'a hu'nageno'ae'mo <sup>60</sup> Ita'amo'mo, ha'ao, Yoni'ae, huta ategaune, huno hapa pai'nige'apae'mo, <sup>61</sup> negafokamogipati'mo ani agufa apakimo ohane'niye, hu'a ha pai'nae. <sup>62</sup> Apayateti'mo avame name kava'mo hute'a, haiya agimo mafa'nekamo ategane, hu'a afo'amofe'mo ge hu'a afi ge'nageno'ae'mo, <sup>63</sup> mago avo'mo kaesuva ya'mo alitapa namiyo, huno hapa pai'nige'apae'mo ali'a ami'nageno avo'mo kaeno'ae'mo, agi'amo Yoni'ae, huno avo'mo kae'nige'apae'mo hapau ai'nae. <sup>64</sup> Ani afina'mo malage huno agemo aino halo ai'nigeno Goti agi'ale'mo alino asaga hu'niye. <sup>65</sup> Ani ko'ale vaya'mogi afite'a koli hu'nageno ani kavafe'mo ava gemo muki haopale Yutiya aulafi kotegamo aino atagu faeno u'niye. <sup>66</sup> Ava gemo afite'apae'mo ali'a apaipafi'mo malete'a, henaga'amo haiya agufa mafa'nemo maigiye, hu'a hu'nae. Ala kava ne'mo'a alagepa huno ha maeteno yagaino ate'niye.

*Sekalaiyasi'a aune gemo hu'niya gemae*

<sup>67</sup> Afo'amo'mo Sekalaiyasi aipafi'mo Aote Auneme'amo'mo havai te'nigeno Gotitegati aune gemo alinineno aeno hakalo huno hapa paino'ae'mo,

<sup>68</sup> Ala kava ne'mo Isaleli vaya'ai Goti'apimo'mo emineno laha maeno hatu maeno late'niya'mofe'mo agi'ale'mo alita asaga higetao. <sup>69</sup> Agaemo ali'ya'amo ne'aliya veka'amo Nevini vayapati'mo ayamufa vekamo lagufamo alino katino latesiya vekamo ago alino afole aino

ate'niye. <sup>70</sup> Akeya'vilagamo ani kavafe'mo agaetegati gemo alini e'a ae'a hakalo hu'a hapa nepaiya vaya'ai apavayafati'mo ago laha pai'niye. <sup>71</sup> Ina gemo hu'a laha pai'nae, kametimogi apayapati'mo lagufamo alino katino lateteno muki vaya'amogimo hosu apaipa kali'a nelataya vaya'ai apayapati'mo hapa faleno lategaiye, hu'a hapa pai'nae. <sup>72</sup> Goti'a kotalake ge'amo hu male'niya aote ge'amo lagingo vaya'aife'mo, nahau hu'na lapategauve, huno hapa pai'niya gee'mo agesa afino ho huteno ani kava'mo hu'niye. <sup>73</sup> Goti'a lagingo vekamo Emalehamufe'mo lama gemo huno ago'yamo ataleno ge hugekana agufa kavafe'mo agesa afiteno laha mae'niye. <sup>74-75</sup> Agaemo kame vayatimogi apayapati'mo lagufamo alino katino latesigeta ma mopafi'mo maisuna afina'mo ali'ya'amo ne'alitae'mo koli osuta aote fatago kava'amo huteta alagepa huta maige maige huta maigune. <sup>76</sup> Kagaemo mafa'ne'nimogae, hogote vekamo aeno apaka se'niya vekalegati'mo ge'amo alinineno aeno hakalo huno hapa nepaiya vekae, hu'a kagi aegae. Kagaemo Ala kava ne'mo esiya ka'mo alagepa huka valika ate'nisanageno egaiye. <sup>77-78</sup> Kagaemo, Gotitimo'a aipamo'mo falu huteno hau huno lateteno ha le yakana vekamo alino ate'niye.

Yegemo'mo aeno ha lelino haine ne'eya kavakana huno lagaetegamo e'niye. Goti'a agaeteti'mo lapakufamo alino katino lapateteno hosu kavatapimo alino atalegaiye. <sup>79</sup> Lagaetegamo eno'ae'mo hanipi'mo fali kava'mo aune'afi'mo mai'nona vaya'mogitalegamo ha le ya'mo alino lamiteno alagepa ka'mo Goti'e'mo lokaelita visuna ka'mo alino lave ligiye, huka hapa paigane, huno hu'niye.

<sup>80</sup> Yoni'a ko siteno'ae'mo auneme'amo'mo lokiya vai'nigeno ka'me kotega maima maima ne'uno'ae'mo Isaleli vaya'ai apaulagale'mo afole ai'niye.

## 2

### *Maliya'a Yesu'mo alino ate'niya gemae (Mt 1:18-25)*

<sup>1</sup> Ani afina'mo hogote vekamo yagaino ne'apateya kini vekamo agi'amo Sisa Agasasi'a, muki kotega mai'naya vaya'ai apakimo aliguve, huno hapa pai'niye. <sup>2</sup> Ani afina'mo apakimo hogote'a ali'naya afina'mo Kiniyasi'a Siliya kotega mai'naya vaya'aite'mo yagaino apate'niye. <sup>3</sup> Muki vaya'amo apakinago vaya'ai taonifi'mo u'a apakimo alisiyafe'mo u'nae. <sup>4</sup> Yosefe'a Nevini vayapati vekamo mai'niya'mofe'mo Nasalasa taonimo Galeliya kotegati'mo ataleno Yutiya kotegamo aginago vekamo Nevini taonifi'mo Metelehamumo u'niye. <sup>5</sup> Lekana pai male'niya a'mafa'nemo Maliya'a aipagu'e'mo mai'nige'anae'mo

anakimo alisiyafe'mo u'na'ae. <sup>6</sup> Ani kote'mo mai'ne'anae'mo Maliya'a mafa'nemo alino atesiya afina'mo ago afole ai'niye. <sup>7</sup> Yege mafa'ne'amo alino ateteno lavolavofi'mo hayaeno ateteno pulumakamogi ne'ya'mo ne'malaya yuvapafi'mo havaeno ate'niye. Alu kotegati'mo nata ne'a ne'aya vaya'mo nehavaya nopi'mo ago kili pae'nage'ana pulumakamogi nopi'mo havaesa'afe'mo mai'ne'anae'mo alino ate'niye.

*Enisole vekamo'a sipisipile'mo ne'yagaiya vaya'aife'mo hapa pai'niya gemae*

<sup>8</sup> Hani'ilagamo ani taoni haopalegamo sipisipile'mo ne'yagaiya vaya'mo kahaule'mo mai'ne'a sipisipile'mo yagai'a mai'nae. <sup>9</sup> Ala kava ne'mo enisole veka'amo afole ai'nigeno Ala kava ne'mo ha le konali ya'amo'mo aeno ha le'nige'apae'mo lusi kava hu'a apamo'ya ai'nae. <sup>10</sup> Enisole vekamo'a hapa paino'ae'mo, lapamo'ya o'aitapa afiyo. Alagepa gemo muki vaya'mogi afite'a lusi kava hu'a apamogaga aisaya gemo alini'na emi'ne'nove. <sup>11</sup> Ani afina'mo Nevini taonifi'mo mago a kanomo'a apakufamo alino katino apatesiya mafa'nemo alino ate'niye. Ani mafa'nemo Kalaisi ne'mo Ala kava ne'mo mai'niye. <sup>12</sup> Lapakaemo agesaya agufa alagena kava'mo hane'niyana lavolavofi'mo hayaeno ateteno pulumakamogi ne'ya'mo ne'malaya yuvapafi'mo havaeno ate'nigeno mai'niye. Uta pa agetetapae'mo ani mafa'nee'mo laha pai'niye, hutapa hugae, huno hapa pai'niye. <sup>13</sup> Hapa pai'nige'apae'mo malage

hu'a agae'e'mo asole enisole vaya'mo afole aite'a  
Goti agi'ale'mo ali'a asaga hu'a ate'apae'mo,  
<sup>14</sup> Goti'a aeno apakase'niya vekamo hogote  
vekamo agi'ale'mo alita asaga higetao. Goti'a  
amuse huno ne'apateya vaya'ai apaipamo'mo  
falu hino, hu'a hute'a apatale'a koku'napi'mo  
hai'nae.

*Sipisipile'mo ne'yagaiya vaya'mogi u'a  
Yesu'mo age'naya gemae*

<sup>15</sup> Inagi sipisipile'mo ne'yagaiya vaya'mogi  
apakai'apimo hu'apae'mo, Metelehamu  
taonifi'mo afole ai'niya kavafe'mo Ala kava  
ne'mo'a laha pai'niya kava'mo uta agesunafe'mo  
vigetao, hu'a hute'a <sup>16</sup> malage hu'a u'a  
apakayana Maliya'agi Yosefe'agi pulumakamogi  
ne'ya'mo ne'malaya yuvapafi'mo havaeno  
mai'niya mafa'negi hu'a mai'nage'apae'mo  
apake'nae. <sup>17</sup> Agete'apae'mo ava gemo  
afi'naya gemo hapa pai'nage'apae'mo <sup>18</sup> muki  
vaya'amogi afite'apae'mo lusi kava hu'a apakesa  
ala'amo afi'nae. <sup>19</sup> Maliya'a ani muki hu'naya  
ge'amo afino alino aipafi'mo maleteno agesa  
afino mai'niye. <sup>20</sup> Sipisipile'mo ne'yagaiya  
vaya'mo ai'a atagi ne'a ne'u'apae'mo enisole  
vekamo'a hapa pai'nige'a afi'naya ge'e age'naya  
kavate'efe'mo Goti agi'ale'mo ali'a asaga huge  
hao ke hege hume hume u'nae.

*Yesu agi'amo ate'naya gemae*

<sup>21</sup> Magoke salemo utege'a Yu vaya'mogi nehaya  
agufa kava'mo hu'a Yesu agufamo lagau'a  
atalete'apae'mo agi'amo Yesu'ae hu'a ate'nae.

Maliya'mo aipagu'e'mo o'mai'nigeno'ae'mo enisole vekamo'a ani agimo ate'niye.

*Yesu'mo alopa mono notegamo avaleli'ana u'na'a gema*

<sup>22</sup> Mosese'a, a'nemogi mafa'nemo ali'a apatete'apae'mo ae'a kalo pae'a apatesayafe'mo ofalinimo alinitutapa mono hu'a ne'apataya vaya'mo apamiyo, huno hu'niya gemo akame hisaya afina'mo afole ai'nige'ana Yosefe'e Maliya'e'mo avaleli'ana Yulusalemu taonifilagamo u'na'ae. Goti aulagale'mo avaleli'u'ana atesa'afe'mo avaleli'ana u'na'ae. <sup>23</sup> Ani kavatefe'mo Goti ke'aepa gemo'mo huno'ae'mo, *Yege mafa'netapimo alita apaote apate'netapa Goti'a amiyo, huno hu'niye.* <sup>24</sup> Ala kava ne'mo ke'aepa ge'amo'mo mago'e gemo huno'ae'mo, *Lole kaugo'yave namala'mo neya namala'mo anatafautapa namiyo, huno hu'niya gemo akame hisa'afe'mo u'na'ae.*

<sup>25</sup> Mago vekamo Yulusalemu taonifi'mo mai'niya vekamo agi'amo Simiyoni'a fatago kava'mo huno Goti ke'aepa ge'amo akame huteno Isaleli vaya'mo hapau vaisiya afinafe'mo agava mai'niye. Aote Auneme'amo'mo agaetegamo emineno, <sup>26</sup> ofalika afa'a mai'nekae'mo Ala kava ne'mo Kalaisi vekamo agegane, huno ha pai'niye. <sup>27</sup> Auneme'amo'mo alopa mono nopi'mo avalelino haino ate'nige'anae'mo Yesu ita'afo'ala'moganimo ke'aepa gemo akame hisa'afe'mo mafa'ne'animo Yesu'mo alopa mono nopi'mo avaleli hai'ana

mai'na'ageno <sup>28</sup> Simiyoni'a eno Yesu'a avaleno anu ki'nenno Gotife'mo hao ke heteno'ae'mo,

<sup>29</sup> Ala kava nene, Naha pai'nana gemo hemenimo ago alika afole aika ate'nana'mofe'mo ali'yakamo ne'aluva vekamo'nae'mo kaipamo'mo falu hu'nisigeka ali'yakamo ataleka eno, huka naha paigane. <sup>30-31</sup> Muki nofi vaya'ai apaulagale'mo apakufamo alino katino apatesiya vekamo ago alika afole aika ate'nanage'nae'mo naulagafati'mo age'nova'mofe'mo hemenimo afa'a faliguve. <sup>32</sup> Agaemo ha le yakana huno mai'nenno mago alu nofi vaya'aitegamo aeno ha lesige'apae'mo age'a aeto hugae. Ani kava huno Isaleli vayakamo ala apaki'apimo apamigiye,

huno hu'niye. <sup>33</sup> Ita'afo'ala'moganimo ani gemo afite'anae'mo lusi kava hu'ana hanau ai'na'ae. <sup>34</sup> Simiyoni'a, Goti'mo lapa maeno, huno huteno ita'amo'mo Maliyafe'mo, Afiyo, mago vaya'amogimo ge'amo o'afi'a atale'a asagau'a aige mago vaya'amogimo ge'amo afite'apae'mo he ti'a maige hisayafe'mo Goti'a lekana paino ate'niye. Agaemo Gotitegati'mo alagena yakana huno alino apave lisige'apae'mo apaini hu'a atesageno'ae'mo <sup>35</sup> asole vaya'ai apaipa apakesafi'mo hane'niya kava'mo alino afole aino ategaiye. Naipemo'mo kaipafi'mo aesigeno kagafu kigiye, huno ha pai'niye.

<sup>36</sup> Mago anekalomo'a Gotitegati gemo alinineno aeno hakalo huno hapa nepaiya anekalomo agi'amo Ana'mo mai'niye. Ana

afo'amo agi'amo Fanuvela'mo Asa nofi vayapati vekamo mai'niye. Ani a kanomo vele'mo seveni'a kafugamo mai'nigeno anau'amo'mo ago fali'niya afinateti'mo kogu a kanomo maima eno 84'a kafugamo mai'niye. <sup>37</sup> Muki afina'mo alopa mono nopi'mo mai'nenoe'ae'mo muki netepi'e hanipi'e'mo Gotife'mo mono huge nunumu'mo huge ne'ya'mo mo sige huno mai'niye. <sup>38</sup> Ani afina'mo Yesue ita'afo'ala'mogani'e'mo apakaetegamo eno Gotife'mo hao ke heteno'ae'mo mafa'ne'ae'mo ava gemo huno'ae'mo Yulusalemu vaya'ai apakufamo alino katino apateteno hatu maeno apatesiyafe'mo agava mai'naya vaya'aife'mo hapa pai'niye. <sup>39</sup> Muki ke'aepa ge'amo alagi akame hu'ana hute'anae'mo ko'anilegamo Galeliya kotega Nasalasa taonifi'mo u'nae. <sup>40</sup> Ani mafa'nemo ko sino alopa heteno'ae'mo lokiya vaino mai'niye. Goti'a alagepa huno ha mae'nigeno alagepa huno afiteno age'nigeno alagepa aipa agesa afole ai'niye.

*Yesu'a neya mafa'nemo'mo alopa mono nopi'mo haino mai'niya gemae*

<sup>41</sup> Yesu ita'afo'ala'moganimo hopa Pasova afina'mo muki kafuga'ae kafuga'ae'mo Yulusalemu taonifi'mo hai'na'ae. <sup>42</sup> Yesu'a tuolofu'a kafugamo mai'nigela hopa afina'mo nehaya agufa kava'mo hu'a halate Yulusalemu taonifi'mo hai'nae. <sup>43</sup> Hopa afina'mo hano hutegenoe Yesu'a ataleno o'uno ani taonifi'mo mai'niya'monanafa Yosefe'e Yesu ita'amo'e'mo, ani taonifi'mo mai'negaiye, hu'ana anakesa



o'afi'ana ago atale'ana u'na'ae. <sup>44</sup> La'ao  
vaya'e'mo magokepi lokaeli'a u'negae, hu'ana  
anakesa afite'ana muki nete'e une'e'mo  
kategamo ute'anae'mo aepa fai'ana anao  
vaya'aife'mo ge hu'ana apafi ge apafi ge hu'ana  
kahauya hume hume u'na'ae. <sup>45</sup> O'age'ana  
halate ai'ana atagi ne'ana Yulusalemu taonifi'mo  
u'ana kahauya hu'na'ae. <sup>46</sup> Lole'e mago'e  
afina'mo kahauya hu'na'ana alagi o'age'ana  
kahauya hu'ana aga'ana Yesu'a alopa mono  
nopi'mo ali'a apaya ne'malaya vaya'e'mo fai  
mai'neni hu'naya gemo afige loka huno apafi  
ge huno mai'nige'ana age'na'ae. <sup>47</sup> Hu'niya  
gemo afi'naya vaya'mogi, alagepa huno afiteno  
ge'apile'mo alagepa huno aeno atagaina huno  
hapa nepaiye, hu'a hute'a hapau ai'nae.  
<sup>48</sup> Ita'afo'ala'moganimo agete'anae'mo hanau  
aite'ana ita'amo'mo, mafa'ne'nimogae, huno,  
na kava higeke la'agaetegamo ani kava'mo  
hu'nane. Afokamo'e nagae'e'mo la'aipamo'mo  
kana hu'nigeta'a kagaefe'mo kahauya nehu'ae,  
huno ha pai'nigeno'ae'mo, <sup>49</sup> Na kava  
higetanae'mo nagaefe'mo kahauya neha'ae.  
Afo'nimo ali'ya'amo alisuva kavafe'mo lanakesa  
o'afi'na'afiye, huno hana pai'niya'monanafa  
<sup>50</sup> ani gemo aepa'amo alagepa hu'ana o'afi'na'ae.  
<sup>51</sup> Inagi anakae'e'mo magokepi lokaeli'a lami'a  
Nasalasa taonifi'mo mai'ne'apae'mo Yesu'a muki  
afina'mo ita'afo'ala'mogani ge'animo akame  
huno mai'niye. Ita'amo'mo muki ani kava'mo  
hu'niya kavafe'mo agesa afiteno aipafi'mo  
alino male'niye. <sup>52</sup> Yesu'a ko siteno'ae'mo

mago'e huno alagepa huno afi'niye. Goti'e  
vaya'amogi'e'mo mago'e hu'a amuse hu'a  
ate'nae.

### 3

*Yoni'a ani'mo faleno ne'apateya vekamo'a  
aeno hakalo huno hapa pai'niya gemae*

*(Mt 3:1-12; Mk 1:2-8; Yo 1:19-28)*

<sup>1</sup> Taipiliyasi Sisa'a hogote vekamo muki  
vaya'aite'mo fifitini'a kafugamo yagaino  
apate'nigeno Ponitiyasi Pailati'a Yutiya  
kotega vaya'aite'mo yagaino apate'nigeno  
Heloti'a Galeliya kotega vaya'aite'mo yagaino  
apate'nigeno nepu'amo'mo Filipi'a Ituliya kotega  
vaya'aite'e Talekinaitasi kotega vaya'aite'e'mo  
yagaino apate'nigeno Laiseniyasi'a Amilini  
kotega vaya'aite'mo yagaino apate'niye.

<sup>2</sup> Anasi'e Kaiyafasi'e'mo mono hu'a ne'apataya  
vaya'aite'mo yagai'ana ne'apata'ageno Yoni'a  
Sekalaiyasi mafa'nemo'a ka'me kotegamo uno  
mai'nigeno'ae'mo Goti ge'amo aipafi'mo afole  
ai'niye. <sup>3</sup> Agaemo Yoneni ani'mo hane'niya  
haopalega umenitata huno, lapaipamo alitapa  
afe letetapa ani'mo falegeno'ao Goti'a hosu  
kavatapimo alino ataleno, huno aeno hakalo  
huno hapa paige hapa paige huno mai'niye.

<sup>4</sup> Ani kavatefe'mo Aiyeya'a Gotitegati gemo  
alinineno aeno hakalo huno hapa nepaiya  
vekamo'a avo'mo kaeno'ae'mo,  
mago vekamo'a ka'me kotegati'mo alopa  
gefati'mo ge huno'ae'mo, Ala kava  
ne'mo ka'mo valita atetetapa alitapa  
alagepa hutapa ateyo. <sup>5</sup> Alopa ave'e aise

ave'e'mo kafitapa anaku paetalegeno eminesigetapa kalokalopafi'mo aetapa ati kaeyo. Kayagi'nisiya ka'mo alitapa api aitapa ateyo. Haite lamite hu'nisiya ka'mo alitapa kanale hutapa ateyo. <sup>6</sup> Inagi muki ma mopafi vaya'mogi agesayana Goti'a vaya'amogi apakufamo alino katino apatesige'a agegae, huno avo'mo kae male'niye.

<sup>7</sup> Asole vaya'mo Yoni'a ani'mo faleno apatesiyafe'mo agaetegamo ete ete hu'nageno Yoni'a, hosu nagalo'yavemo mafa'ne anaga'amogitapae, Ina la'mo, Goti'a aipamo neleyanageno lapamagisiyategati'mo afa'a ataletapa lapaune hegae, huno lapa pai'niye, huno apafi ge'niye. <sup>8</sup> Mago'e gemo huno'ae'mo, lapaipamo alitapa afe le'nisayana ani kavatapileti'mo alagepa kava'mo alitapa lave liyo. Emalehamu'a lagingo vekamo mai'niya'mofe'mo alagepa huta maigune, hutapa lapakesa o'afiyo. Goti'a mani yafafe'mo ha paisigeno Emalehamu aginago'amo afa'a alino hamaleno apategaiye. <sup>9</sup> Hemenimo ko'nemo alagi alo huno alinineno yosa aepale'mo yosamo he'ya aisiyafe'mo male'niye. Muki alagepa alagamo no'aeya yosamo he'ya aite'a ali'a atafi'mo yaga au'a nekae, huno hapa pai'niye. <sup>10</sup> Hapa pai'nige'apae'mo asole vaya'mogi, lagaemo haiya agufa kava'mo hugune, hu'a afi ge'nageno'ae'mo, <sup>11</sup> lole siotimo ali'nisiya vekamo'mo mago o'ali'nisiya vekamo afa'a amino. Ne'ya'mo ali'nisaya vaya'mogimo

ani kavake'mo hu'a apamiyo, huno hapa pai'niye. <sup>12</sup> Takesi monimo ne'aliya vaya'mo ani'mo faleno apatesiyafe'mo e'a, Tisao, hu'a, lagaemo haiya agufa kava'mo hisune, hu'a afi ge'nageno'ae'mo, <sup>13</sup> Gamani vaya'mogimo aliyo hu'a lapa pai'nisaya agufa monimo alitetapa fiku mago'e monimo o'aliyo, huno hapa pai'niye. <sup>14</sup> Mago ami vaya'mogimo, lagae'e'mo haiya agufa kava'mo hisune, hu'a afi ge'nageno'ae'mo, vaya'mo o'apamagitapa kumaya'mo o'aliyo. Aigofe geleti'mo agoti hutapa o'apateyo. Miyatapige'mo alitetapa lapaipamo'mo falu hino, huno hapa pai'niye.

<sup>15</sup> Muki vaya'mogi agava mai'naya'mofe'mo, ani vekamo Kalaisi vekamo mai'nifi o'mai'niye, hu'a apaipafi'mo apakesa afi'nae. <sup>16</sup> Apakesa ne'afigeno Yoni'a, nagae nakamemo huno esiya vekamo ayamufa'amo'mo nagae nayamufamo ago aeno naga seno mai'niye. Ina agufa vekamo mai'novanage'na su'mo nofi'amo afa'a hakalu osegauve. Nagaemo ani'aletike'mo fale'na nelapatovanageno agaemo aote Auneme'aleti'e ataleti'e'mo faleno lapategaiye. <sup>17</sup> Sipeti'amo ayapi'mo ali'niyanageno viti alaga ne'ya'mo faino kateno atalesigeno haiteno mopafi'mo asagauno aisigeno ne'ya'age'mo alino anupa huno no'afi'mo maleteno haleti ya'amo yu oseno neleya atafi'mo alino kaegaiye, huno hapa pai'niye. <sup>18</sup> Yoni'a muki vaya'ai apaipa apakesa alino he tino atesiyafe'mo mago'e huno alagepa faigoko gemo aeno hakalo huno hapa pai'niye.

<sup>19</sup> Hapa pai'niya'monanafa Heloti'a yagaino

ne'apateya vekamo'mo hosu kava'mo mago'e mago'e huno hu'nigeno Yoni'a ge hau'niye. Heloti'a nepu'amo a'mo Helotiyasi'mo ali'niya kava'e muki hosu kava'ale'efe'mo Yoni'a ge hau'niya'mofe'mo kalavusi huno ate'niye. <sup>20</sup> Hosu kava'mo hume hume eno'ae'mo mago'e huno lusi hosu kava'mo huno Yoni'a kalavusi huno ate'niye.

*Yoni'a Yesu'mo ani'mo faleno ate'niya gemae  
(Mt 3:13-17; Mk 1:9-11)*

<sup>21-22</sup> Yoni'a kalavusi osu'nen'ae'mo hogoteno muki vaya'mo ani'mo faleno apateteno Yesu'e'mo ani'mo faleno ate'nigeno Yesu'a nunumu'mo nehigeno'ae'mo koku'na'mo halo ai'nigeno aote Auneme'amo agufa'amo mago namamo kaugo'yavegana huno agaetegamo emine'niye. Koku'napati'mo mago gemo ha paino'ae'mo, nahau nayamopafi'mo ne'nahaiya mafa'ne'nimo mai'nanage'nae'mo naipamo'mo kanale hu'na nekatove, huno ha pai'niye.

*Yesu aginago vaya'ai apaki'apimo hane'niye  
(Mt 1:1-17)*

<sup>23</sup> Yesu'a ali'ya'amo aepa faino ali'niya kafugamo teti'a agufa kafugamo mai'nige'apae'mo vaya'mogimo hu'apae'mo Yosefe mafa'ne'amae, hu'a hu'nae. Yosefe afo'amo'mo Hilai'ae. <sup>24</sup> Hilai afo'amo'mo Matati'ae. Matati afo'amo'mo Livai'ae. Livai afo'amo'mo Melikai'ae. Melikai afo'amo'mo Yanai'ae. Yanai afo'amo'mo Yosefe'ae. Yosefe afo'amo'mo Matataiyasi'ae. <sup>25</sup> Matataiyasi afo'amo'mo Emosi'ae. Emosi afo'amo'mo Neyamu'ae. Neyamu afo'amo'mo Esilai'ae. Esilai afo'amo'mo Nagai'ae. Nagai

afo'amo'mo Meyati'ae. Meyati afo'amo'mo Matataiyasi'ae. <sup>26</sup> Matataiyasi afo'amo'mo Simeni'ae. Simeni afo'amo'mo Yoseki'ae. Yoseki afo'amo'mo Yona'ae. Yona afo'amo'mo Yo'anani'ae. <sup>27</sup> Yo'anani afo'amo'mo Lesa'ae. Lesa afo'amo'mo Selamameli'ae. Selamameli afo'amo'mo Siyalitiyeli'ae. Siyalitiyeli afo'amo'mo Nelai'ae. <sup>28</sup> Nelai afo'amo'mo Melokai'ae. Melokai afo'amo'mo E'nai'ae. E'nai afo'amo'mo Kosamu'ae. Kosamu afo'amo'mo Elimenamu'ae. Elimenamu afo'amo'mo Eya'ae. Eya afo'amo'mo Yosuva'ae. <sup>29</sup> Yosuva afo'amo'mo Eliesa'ae. Eliesa afo'amo'mo Yolimi'ae. Yolimi afo'amo'mo Matati'ae. Matati afo'amo'mo Livai'ae. Livai afo'amo'mo Simiyoni'ae. <sup>30</sup> Simiyoni afo'amo'mo Yuta'ae. Yuta afo'amo'mo Yosefe'ae. Yosefe afo'amo'mo Yonamu'ae. Yonamu afo'amo'mo Elaiyakimi'ae. <sup>31</sup> Elaiyakimi afo'amo'mo Mena'ae. Mena afo'amo'mo Matata'ae. Matata afo'amo'mo Netani'ae. Netani afo'amo'mo Nevini'ae. <sup>32</sup> Nevini afo'amo'mo Yesi'ae. Yesi afo'amo'mo O'meti'ae. O'meti afo'amo'mo Movasi'ae. Movasi afo'amo'mo Salimoni'ae. Salimoni afo'amo'mo Nasoni'ae. Nasoni afo'amo'mo Aminanapu'ae. <sup>33</sup> Aminanapu afo'amo'mo Animila'ae. Animila afo'amo'mo Anai'ae. Anai afo'amo'mo Hesiloni'ae. Hesiloni afo'amo'mo Pelesi'ae. Pelesi afo'amo'mo Yuta'ae. <sup>34</sup> Yuta afo'amo'mo Yekopu'ae. Yekopu afo'amo'mo Aisiki'ae. Aisiki afo'amo'mo Emalehamu'ae. Emalehamu afo'amo'mo Tela'ae. Tela afo'amo'mo Neho'ae. <sup>35</sup> Neho afo'amo'mo Selaki'ae. Selaki afo'amo'mo Liyu'ae. Liyu afo'amo'mo Peleki'ae. Peleki afo'amo'mo Ima'ae. Ima afo'amo'mo Sila'ae. Sila afo'amo'mo Kenani'ae. <sup>36</sup> Kenani afo'amo'mo Afakasati'ae.

Afakasati afo'amo'mo Semi'ae. Semi afo'amo'mo Noa'ae. Noa afo'amo'mo Lemeki'ae. <sup>37</sup> Lemeki afo'amo'mo Metusala'ae. Metusala afo'amo'mo Inoki'ae. Inoki afo'amo'mo Yeleti'ae. Yeleti afo'amo'mo Mahalali'ae. Mahalali afo'amo'mo Kenani'ae. <sup>38</sup> Kenani afo'amo'mo Inosi'ae. Inosi afo'amo'mo Seti'ae. Seti afo'amo'mo Atamu'ae. Goti'a Atamu'mo alo huno ate'niya'mofe'mo Atamu'a afo'amo'mo Goti'ae.

## 4

*Satani'a Yesu'mo amalageka hu'niya gemae  
(Mt 4:1-11; Mk 1:12-13)*

<sup>1-2</sup> Aote Auneme'amo'mo Yesu aipafi'mo haino havai te'nigeno Yesu'a Yoneni anipati'mo ataleno u'niye. Aote Auneme'amo'mo avalelino uno ka'me kotega ate'nigeno foti'a afina'mo uneno huno mai'nigeno Satani'mo amalageka hu'niye. Foti'a afina'mo ne'ya'mo o'ne'nigeno aga te'nigeno'ae'mo <sup>3</sup> Satani'a, Goti mafa'ne'amo mai'nisana'mo'mo mani yafafe'mo ha paigeno'ao peleti mayamo alino hamaleno, huno ha pai'nigeno <sup>4</sup> Yesu'a ge'ale'mo aeno atagaina huno ha paino'ae'mo, Goti mukufi gemo'a huno'ae'mo, vaya'mogimo peleti maya'ageke'mo nesayana alagepa hu'a o'maigaya'monanafa muki gemo Goti'a avayafati'mo hu'niya gemo afite'apaeke'mo alagepa hu'a maigae, huno hu'niye, huno ha pai'niye. <sup>5</sup> Satani'mo avalelino haino malage huno muki ma mopafi ala'apimo mai'ne'a yagai'a ne'apataya vaya'ai ko'mo alino ave li'niye. <sup>6</sup> Inagi Satani'mo, muki age'nana ya'amo alino nami'nige'na alite'na

ne'yagauvanage'na mago vekamo ali'na amiguve hu'na hisuvana afa'a ali'na amiguve. Muki kotegamo yagaisanafe'mo muki konali ya'apimo ali'na kamisugeka aligane. <sup>7</sup> Inagi nagaefe'mo mono hisana'mo'mo muki ya'amo kagaika ya'mo hanegaiye, huno ha pai'niye. <sup>8</sup> Yesu'a, S-taniyo, ekuka nakamelagamo maiyo. Goti mukufi gemo'a huno'ae'mo,

Ala kava ne'mo Gotitapimofeke'mo mono hute-tapa agai'a magoke'age'mo akame hiyo, huno hu'niye, huno ha pai'niye. <sup>9</sup> Satani'a Yulusalemu taonifi'mo avalelino uno alopa mono no'mo yatala no'mo nokato'mule'mo avalelino haino ate'nen'ae'mo, Goti mafa'ne'amo mai'nisana'mo'mo mopafi'mo aeka hailo huka asagauka aiyo. <sup>10-11</sup> Goti mukufi gemo'a huno'ae'mo,

Ala kava ne'mo'a enisole vaya'ae'mo, yagaitapa ateyo, huno hapa paisige'a yagai'a kate'a apayateti'mo katafausageno yafa'mo'a kaiyafi'mo okahaegaiye,

huno avo'mo kae male'niye, huno ha pai'nigeno <sup>12</sup> Yesu'a, Goti mukufi gemo'a huno'ae'mo, *Ala kava ne'mo Gotitapimofe'mo amalageka osiyo, huno hu'niye*, huno ha pai'niye. <sup>13</sup> Satani'mo alu ge alu gemo huno amalageka huno hano huteno'ae'mo, alu afina'mo halate e'na amalageka huguve, huno agesa afiteno ataleno u'niye.

*Yesu'a ali'ya'amo aepa faino ali'niya gemae  
(Mt 4:12-17; Mk 1:14-15)*



<sup>14</sup> Goti Auneme'amo'mo Yesu'a lokiya vaino ate'nigeno halate aino atagi neno Galeliya kotega u'nige'a agete'apae'mo ava gemo hu'naya gemo muki Galeliya haopalegamo mai'naya vaya'mogi afi'nae. <sup>15</sup> Agaemo Yu vaya'ai mono nopi'mo alino apaya male'nige'apae'mo agi'ale'mo ali'a asaga hu'a ate'nae.

*Nasalasa taonifi mai'naya vaya'mogi Yesu'mo apakame'yamo ami'naya gemae*  
(Mt 13:53-58; Mk 6:1-6)

<sup>16</sup> Yesu'a Nasalasa taonifi'mo mai'neni ko si'niya taonifi'mo uno Sapati afina'mo nehiya agufa kava'mo huno mono nopi'mo haino mai'neni'ae'mo Goti mukufi gemo lekana paisiyafe'mo he ti'niye. <sup>17</sup> Mago vekamo'mo Aiyeya'a Gotitegati gemo alinino eno aeno hakalo huno hapa nepaiya vekamo'a avo'mo kae male'niya mukumo alino ami'nigeno alino vakaleno kahauya huno ageteno lekana paino'ae'mo,

<sup>18</sup> Agaemo kagemi ya'mo o'ali'nisaya vaya'aife'mo alagepa faigoko gemo ae'na hakalo hu'na hapa paisuvafe'mo uvelimo ago faleno nate'niya'mofe'mo Ala kava ne'mo Auneme'amo emineno nagaete'mo mai'niye. Agaemo alino nate'nige'na e'na yulagefa ne'aiya vaya'aina ali'na alagepa hu'na apatege kalavusifi mai'naya vaya'aife'mo, hatu mae'na lapate'nove, hu'na hapa paige apaulagamo ali hu'niya vaya'aife'mo, agetapa ayakeyo, hu'na hapa paige ali'a afepi apatete'a hu'a apami

ne'malaya vaya'mo hatu mae'na apatege  
<sup>19</sup> Ala kava ne'mo alagepa afina'amo afole  
ai'niye, hu'na hapa paige hisuvafe'mo  
Goti Auneme'amo'mo alino nate'nige'na  
e'nove, huno hu'niye,

huno lekana pai'niye. <sup>20</sup> Lekana paino  
hano huteno ani mukumo aino akaniteno  
mono nopi'mo ali'ya ne'aliya vekamo halate  
amiteno fai mai'niye. Mono nopi'mo  
mai'naya vaya'mogimo aulu hae'nageno'ae'mo,  
<sup>21</sup> hemenimo Goti mukufi gemo afi'naya gemo  
ago afole ai'niye, huno hapa pai'nige'apae'mo  
<sup>22</sup> muki vaya'mogimo fiku hapa maeno  
ne'apamiya gemo avayafati'mo hu'nige'a  
afite'apae'mo hapau aite'apae'mo, Yosefe  
mafa'nemo o'mai'nifi, hu'a hu'nae. <sup>23</sup> Yesu'a,  
ago afi'novana lapakinago vaya'ai gefati'mo  
aetapa kalafefa gemo hutapa naha paitapae'mo,  
Lota vekae, kagaikamo alika alagepa huka  
kato. Kapeneyamu taonifi'mo hu'nana agufa  
kava'mo mani nokale'mo huvo, hutapa naha  
paigae. <sup>24</sup> Lama gemo lapa nepauve, Gotitegati  
gemo alini e'a ae'a hakalo hu'a hapa nepaiya  
vaya'mo afole ai'naya kote'mo u'nage'apae'mo  
vaya'apimogi amuse hu'a no'apatae. <sup>25</sup> Ge'nimo  
afiyo. Ilaya'a mai'niya afina'mo lole'e mago'e  
kafuga'e sigisi'a kai le'e'mo ko o'ai'nige'apae'mo  
muki aupilagamo ne'yafe'mo kafu hu'naya  
afina'mo afole ai'niye. Ani afina'mo muki kogu  
a'ne'amo Isaleli kotegamo mai'naya'monanafa  
<sup>26</sup> Goti'a Ilaya'mo alino ate'nigeno Sitoni kotega  
Salefeti taonifi'mo magoke kogu ategamo u'niye.  
<sup>27</sup> Ilaisa'a mai'nige'apae'mo Isaleli kotegamo

muki lepalosi ya'mo hapau'niya vaya'mo mai'naya'monanafa Ilaisa'a Siliya kotega mai'niya vekamo agi'amo Nemenike'mo alino alagepa huno ate'niye, huno hapa pai'nige'a, <sup>28</sup> afite'apae'mo lusi kava huno apaipamo le'niye. <sup>29</sup> Apaipamo le'nige'apae'mo he ti'a ali'a hafaitalageno ataleno ne'vige'apae'mo u'a avaleli'u'a hai'a ani taonimo ki male'naya aveleti'mo mulifilaga ali'a ago'ya fai'a atalesayafe'mo hu'naya'monanafa <sup>30</sup> apakae folagapati'mo ago faino kasalo paetaleno u'niye.

*Yesu'a mago vekamo aipafati'mo hosu aune vekamo alino hafaino atale'niya gemae*

*(Mk 1:21-28)*

<sup>31</sup> Yesu'a Galeliya kotega Kapeneyamu taonifi'mo lamino Sapati afina'mo mono nopi'mo haino alino apaya male'niye. <sup>32</sup> Ala'apimo yagaino ne'apateya vekagana huno himamu'aleti'mo alino apaya male'nige'apae'mo hapau ai'nae. <sup>33</sup> Mago vekamo aipafi'mo hosu aune vekamo mai'niya vekamo mono nopi'mo mai'neni'ae'mo alopa gefati'mo huno'ae'mo, <sup>34</sup> ae, huno, Nasalasa vekamo Yesuo, lagaetegamo na agufa kava hisanafe'mo e'nane. Alike hano huka latesanafe'mo e'napiye. Ago kage'novana Goti aote veka'amo mai'nane, huno ha pai'niye. <sup>35</sup> Yesu'a ge hauteno'ae'mo, ge osu'neka aipafati'mo emikeno, huno ha pai'nigeno hosu aune vekamo'a vaya'ai folagapi'mo alino ago'ya faino ataleteno ago ateno u'niye. Agufamo alino hosu huno o'ate'nigeno afa'a mai'niye. <sup>36</sup> Agete'apae'mo muki vaya'amogimo hapau

ai'nae. Apakaemo, ani agufa gemo na agufa gemo hu'niye. Ala'apimo yagaino ne'apateya vekamo mai'negekana huno lokiya himamu'aleti'mo hosu apaune vaya'aife'mo, emiteyo, huno hapa pai'nige'apae'mo emi e'a ne'vae, hu'a hu'nae. <sup>37</sup> Yesufe'mo ava gemo muki haopalegamo aino atagu faeno uneno hu'niye.

*Yesu'a alu kaita alu kaita'mo hapau'niya  
vaya'mo alino alagepa huno apate'niya gemae  
(Mt 8:14-15; Mk 1:29-31)*

<sup>38</sup> Yesu'a mono nopati'mo lamino'ae'mo Saimoni nopi'mo hai'niye. Saimoni ayemo'amo'mo amuko kaita hau'nigeno havaeno mai'niye. Apakaemo Yesufe'mo, alika alagepa huka ato, hu'a ha pai'nae. <sup>39</sup> Uno agenopalegamo he tino mai'nenoe'ae'mo, hano hino, huno ha pai'nigeno amuko hau'niya ya'amo hano hu'nigeno malage huno he tino uno ne'ya'mo alo huno apate'niye. <sup>40</sup> Yegemo lamino falegefe hu'nige'apae'mo kaita hapau'niya vaya'aite'mo yagai'a ne'apataya vaya'mogi kaita hapau'niya vaya'mo Yesutegamo apavaleli'a e'nae. Agaemo muki alu kaita alu kaita'mo hapau'niya vaya'ai apakufale'mo aya'mo male'nenoe alino alagepa huno apate'niye. <sup>41</sup> Inagi hosu apaune vaya'mo asole vaya'ai apaipafati'mo emi e'apae'mo, Goti mafa'ne'amo mai'nane, hu'a alopa gefati'mo hu'nae. Kalaisi vekamo mai'niye, hu'a ago age'naya'mofe'mo Yesu'a, ge osutapa afa maiyo, huno hapa pai'niye.

*Yesu'a Yu vaya'ai kotegamo umenitata huno  
Goti ge'amo aeno hakalo huno hapa pai'niya  
gema*

*(Mk 1:35-39)*

<sup>42</sup> Kotilamiyapi'mo taonifati'mo ataleno  
uno vaya'mo o'mai'naya kotegamo  
mai'nige'apae'mo kahauya hume hume u'a  
age'a avatete'apae'mo apataleno o'usiyafe'mo  
atafau'nae. <sup>43</sup> Hu'naya'monanafa agaemo,  
nagaemo Goti'a yagaino ne'apateya kavafe'mo  
alagepa gemo u'na alu taonifi alu taonifi'mo  
ae'na hakalo hu'na hapa paisuva gemo  
hane'niye. Ani kava'mo hisuvafe'mo alino  
nate'nige'na emi'ne'nove, huno hapa paiteno  
<sup>44</sup> apataleno uno Yutiya kotega mono nokopi'mo  
haino aeno hakalo huno hapa paimale hapa  
paimale huno uneno huno mai'niye.

## 5

*Mago vaya'mogi ali'ya ya'apimo atale e'a  
Yesu'a akame hu'a u'naya gema*

*(Mt 4:18-22; Mk 1:16-20)*

<sup>1</sup> Yesu'a mago afina'mo ani kotu'mo  
agil'amo Genesaleti ani kotute'mo he tino  
mai'nige'apae'mo asole vaya'mogimo Goti  
ge'amo afisayafe'mo e'a male'a apali'nae.  
<sup>2</sup> Agaemo ageyana lole sipila'mo ani agi'nale'mo  
hane'na'ageno age'niye. Noyame ne'aliya  
vaya'mo sipifati'mo atale'a lami'a umeni'apimo  
sese hu'a mai'nae. <sup>3</sup> Yesu'a Saimoni sipifi'mo  
haino mai'nenoe'ae'mo, aise'amo afa'a faika  
ago'ya failika ugapiye, huno afi ge'nigeno

aeno ago'ya failino u'niye. Yesu'a sipifi'mo fai mai'nenoe'ae'mo alino apaya male'niye.

<sup>4</sup> Hapa paino hano huteno Saimonife'mo, ani folagapi'mo uka umenimo alitapa anipi'mo yaga au male'netapa noyamemo aliyo, huno ha pai'nigenoe'ae'mo, <sup>5</sup> Tisao, muki hani'ilagamo umeni male'nonana mago noyamemo o'ali'nona'monanafa gekamo afite'na umenimo anipi'mo ali'na yaga au'na malegauve, huno ha pai'nige'apae'mo <sup>6</sup> umenimo ali'a anipi'mo yaga au male'nagenoe'ae'mo asole noyamemo e'a hai'a havai te'nageno umeni'apimo aino kapalu aegefe'mo hu'niye. <sup>7</sup> Aino kapalu aegefe'mo hu'nige'apae'mo alu sipifi'mo apakae'e'mo magokepi lokae'a ali'ya'mo ne'aliya vaya'aife'mo apayaku ai'a ge hu'nage'a e'nage'apae'mo lole sipifi'mo noyamemo ali'a vayu hu'a male'nage'ana lole sipila'mo ae'ana lapanegefe hu'na'ae. <sup>8</sup> Saimoni Pita'a ani kava'mo ageteno Yesu aiyafi'mo ago'ya fai'nenoe'ae'mo, Ala kava nene, hosu vekamo mai'novanagi nataleka uvo, huno ha pai'niye. <sup>9</sup> Lusi kava huno hau ai'niya'mofe'mo ani gemo ha pai'niye. Asole noyamemo ali'naya'mofe'mo Saimonile'mo magokepi lokae'a mai'naya vaya'mogi'e'mo hapau ai'nae. <sup>10</sup> Yemisi'e Yoni'e'mo Saimonigi'e'mo magokepi lokae'a ali'ya'mo ne'ali'a vekala'moganile'mo ani kava hu'ana hanau ai'na'ae. Yesu'a Saimonife'mo, ani kavafe'mo koli osuvo. Noyamemo ne'alina kava huka vaya'mo apavalelika nagaetegamo egane, huno ha pai'nige'apae'mo <sup>11</sup> lole sipila'mo alini e'a ani agi'nale'mo ava'yi hute'apae'mo muki

ya'apimo atale'a akame hu'a u'nae.

*Yesu'a lepalosi ya'mo hau'niya vekamo alino  
alagepa huno ate'niya gemae*

*(Mt 8:1-4; Mk 1:40-45)*

<sup>12</sup> Yesu'a mago taonifi'mo mai'nigeno'ae'mo mago vekamo lusi kava huno lepalosi ya'mo hau'niya vekamo'mo eno Yesu'mo ageteno'ae'mo augosalegati'mo ago'ya fai'neni'ae'mo, Ala kava nene, kahao ke hovanagi, kahau'nisiyana afa'a alika alagepa huka nategane, huno ha pai'nigeno

<sup>13</sup> aya'mo aeno hayo huno agufale'mo aya'mo male'neni'ae'mo, nahau'niyanagi kagufalafa'mo alino hamaleno, huno ha nepaigeno'ae'mo lepalosi ya'mo hau'niya ya'amo hano hu'niye. <sup>14</sup> Yesu'a, mago vekae'mo uka ha opaika mono huno ne'apateya vekalegage'mo uka kagufamo alika aveligeno kageno alagepa hino. Alike apavelisanage'a

vaya'mogi agesayafe'mo Mosese'a hiyo, huno hu'niya ofalinimo kagufalafa'mo alino hamale'niya kavatefe'mo ofalinimo amiyo, huno ha pai'niye. <sup>15</sup> Huno ha pai'niya'monanafa Yesufe'mo ava gemo mago'e mago'e huno aino atagu faeno uneno hu'nige'apae'mo muki asole vaya'mogimo ani gemo afite'apae'mo kaita hapau'niya vaya'mo alino hapageno apatesiyafe'mo Yesutegamo e'a ali'a anupa hu'a mai'nae. <sup>16</sup> Mai'naya'monanafa muki afina'mo apataleno uno ka'me kotegamo nunumu'mo hutale hutale huno mai'niye.

*Yesu'a kanage kanaga osuno ne'maiya vekamo alino alagepa huno ate'niya gemae*

*(Mt 9:1-8; Mk 2:1-12)*

<sup>17</sup> Mago afina'mo Yesu'a mago nopi'mo haino alino apaya ne'malege'apae'mo Falasi vayanagi ke'aepa gemo avo'mo kae'a ali'a apaya ne'malaya vayanagi hu'a Galeliya kotegati'mo muki taoni'afati'mo ege Yutiya kotegati'mo muki taoni'afati'mo ege Yulusalemu taonifati'mo ege hu'a e'a Yesu haopale'mo ali'a anupa hu'a mai'nae. Yesu'a Ala kava ne'mo himamu'amo ali'nenoe'ae'mo alino alagepa huno apate'niye. <sup>18</sup> Mago vaya'mogimo kanage kanaga osuno ne'maiya vekamo hi'yopamo male'a alini e'a Yesu haopale'mo atesayafe'mo hu'naya'monanafa <sup>19</sup> nopi'mo ago kili pae'nage'a alini haisaya ka'mo ohane'niye. Nokato'mule'mo alini hai'a ali'a akai male'ne'apae'mo hi'yopa kayote'mo nofi aete'a aline'a atalageno Yesu'a mai'niya folagapi'mo emine'niye. <sup>20</sup> Apakeyana apakesa afi'a fatago hu'nageno apaketeno'ae'mo, Ve'nimo, huno, hosu kavakamo ali'na atale'nove, huno ha pai'nige'apae'mo <sup>21</sup> ke'aepa gemo avo'mo kae'a ali'a apaya ne'malaya vaya'mogi'e Falasi vaya'mogi'e'mo ani gemo afite'apae'mo, ani vekamo ina la'ae. Gotife'mo huno faipa huno ne'ate. Gotike'mo vaya'ai hosu kava'apimo afa'a alino atalegaiye, hu'a apaipafi'mo apakesa afi'nae. <sup>22</sup> Yesu'a apaipafi'mo apaketeno'ae'mo, na kava higetapae'mo ani agufa lapakesa ne'afiye. <sup>23-24</sup> Haiya agufa gemo lokiya gemo ohane'niye. Hosu kavakamo ali'na atale'nove, hu'na ha pai'nova gemo lokiya gemo ohane'nifi,



he tika uvo, hu'na ha paisuva gemo lokiya gemo ohane'niye, huno apafi geno'ae'mo, Vemo Mafa'nemo'a ma mopafi'mo mai'nen'ae'mo vaya'ai hosu kava'apimo alino atalesiya himamu'amo alino lapave ligiye, huno hapa pai'niye. Inagi Yesu'a kanage kanaga osuno ne'maiya vekae'mo, kaha nepauve, he tika yakaikonakamo aliteka nokalega uvo, huno ha pai'nigeno <sup>25</sup> apaulagale'mo malage huno he tino yakaikona'amo aliteno no'alega ne'uno'ae'mo Goti agi'ale'mo alino asaga hume asaga hume u'niye. <sup>26</sup> Muki vaya'amogimo ani kava'mo agete'apae'mo hapau aite'a Goti agi'ale'mo ali'a asaga hu'a atete atete hute'apae'mo, hemenimo aeto agufa alagepa kava'mo agone, hu'a hu'nae.

*Yesu'a Livai'fe'mo, eka nakame huvo, huno ha pai'niya gema*

*(Mt 9:9-13; Mk 2:13-17)*

<sup>27</sup> Huteno Yesu'a taonimo ataleno ne'uno'ae'mo ageyana mago vekamo takesi moni ne'aliya vekamo agi'amo Livai'a takesi monimo ne'aliya nopi'mo fai mai'nigeno ageteno'ae'mo, eka nakame huvo, huno ha pai'nigeno <sup>28</sup> he tino muki ya'amo ataleno eno akame hu'niye. <sup>29</sup> Livai'a no'afi'mo Yesu'mo lusi yagita huno ate'nige'apae'mo hi'yalamute'mo Yesu'agi takesi moni ne'aliya vayanagi alu vayanagi hu'a anakae'e'mo magokepi lokae'a fai mai'ne'a ne'ya'mo ne'nae. <sup>30</sup> Falasi vaya'e Falasi vayapati vaya'mogimo ke'aepa gemo avo'mo kae'a ali'a apaya ne'malaya vaya'mogi'e'mo apakete'apae'mo ge'amo ne'afiya vaya'aife'mo

hagalu hagalu hu'a ge hu'apae'mo, na kava higetapa takesi moni ne'aliya vaya'e hosu vaya'e'mo magokepi lokaetapa mai'netapa ne'ya'e ani'e'mo ne'nae, hu'a apafi ge'nageno <sup>31</sup> Yesu'a ge'apile'mo aeno atagaina huno'ae'mo, lota vekamo'a afa'a mai'naya vaya'aitegamo uno ali'ya'mo no'alifa kaita hapau'niya vaya'aitegage'mo uno ali'ya'mo ne'aliye. <sup>32</sup> Nagaemo alagepa vaya'aife'mo ge hisuvafe'mo o'me'nofa hosu vaya'aife'mo ge hisuge'a e'a apaipamo ali'a afe lesayafe'mo emi'ne'nove, huno hapa pai'niye.

*Ne'ya'mo o'ne'a mo nesiya kavafe'mo hu'niya gema'e*

*(Mt 9:14-17; Mk 2:18-22)*

<sup>33</sup> Apakaemo Yesufe'mo, Yoni ge'amo ne'afiya vaya'e Falasi vaya'ai ge'apimo ne'afiya vaya'mogi'e'mo ne'ya'mo o'ne'a mo si'ne'a nunumu hute hute hu'naya'monanafa gekamo ne'afiya vaya'mogimo ne'ya'mo mo osi'a muki afina'mo ne'nae, hu'a ha pai'nageno <sup>34</sup> Yesu'a, a'mo lagauli'a ne'vaya afina'mo a'mo alisiya vekamo'a vaya'a'e'mo magokepi lokae'a mai'ne'apae'mo ne'ya'mo mo osi'a afa'a ne'nae. <sup>35</sup> Henaga'amo kame vaya'amogi a'mo alisiya vekamo vaya'alegati'mo avaleli'a usage'apae'mo ne'ya'mo o'ne'a mo sigae. <sup>36</sup> Yesu'a mago'e huno aeno kalafefa gemo huno hapa paino'ae'mo, atafa kukenamo apake ne'aige'apae'mo saufa kukenaleti'mo lagau'a atafa kukenale'mo nofakaniye. Lagausiya'mo'mo saufa kukenamo hosugiye. Saufa kukena atupaleti'mo lagau'a

atafa kukenale'mo fakanisayana alu ya alu ya'mo hanegaiye. <sup>37</sup> Saufa nofi alagafati ani'mo ali'a atafa afu agufa ke'mo ago vai'niya kepi'mo nolakiye. Ali'a lakisiya'mo'mo saufa ani'mo hane'niya'mofe'mo aeno apafu leteno afu agufa ke'mo aeno apalo atino ani'mo mopafi'mo asagauno aisigeno'ae'mo afu agufa ke'mo atalagaugiye. <sup>38</sup> Saufa ani'mo saufa afu agufa kepik'e'mo ali'a lakisaya'mo'mo ani'e ke'e'mo afa'a hanegaiye. <sup>39</sup> Vaya'mogi atafa nofi alagafati ani'mo nete'apae'mo, nofi alagafati'mo ani'mo saufa ani'mo negaune, hu'a nosae. Atafa ani'mo ago aeno agase'niye, hu'a nehaya'mofe'mae, huno hapa pai'niye.

## 6

*Sapati afina'mo nehaya kavafe'mo hu'niya gema'e*

*(Mt 12:1-8; Mk 2:23-28)*

<sup>1</sup> Mago Sapati afina'mo Yesu'e ge'amo ne'afiya vaya'e'mo viti hoy a folagapi'mo ne'u'apae'mo ge'amo ne'afiya vaya'mogi viti alagamo lagi'a haleti'ya'amo apaya he'a hale'a ataleta'a neme neme u'nae. <sup>2</sup> Ne'vage'apae'mo mago Falasi vaya'mogi apakete'apae'mo, na kava higetapa Sapati afinafe'mo ani agufa kava'mo osiyo, huno ke'aepa gemo'a hu'niya kava'mo nehae, hu'a hapa pai'nageno <sup>3</sup> Yesu'a, lagingo vekamo Nevini'a hu'niya kavafe'mo ava gemo lekana paitapa o'afi'nafiye. <sup>4</sup> Nevini'e magokepi lokae'a mai'naya vaya'e'mo apaka te'nigeno'ae'mo Goti mono nopi'mo haino afa vaya'mogi no'nafa

mono hu'a ne'apataya vaya'amogige'mo ne'naya peleti mayamo Goti aulagale'mo male'naya peleti mayamo alino neteno agae'e'mo lokae'a mai'naya vaya'aina alino apami'niye. <sup>5</sup> Vemo Mafa'nemo'a Sapati afinate'e'mo ne'yagaiya vekamo mai'niye, huno hapa pai'niye.

*Sapati afina'mo Yesu'a aya'mo kalage ki'niya vekamo alino api aino ate'niya gemae*  
(Mt 12:9-14; Mk 3:1-6)

<sup>6</sup> Mago Sapati afina'mo mago vekamo aya'mo kalage ki'niya vekamo mono nopi'mo mai'nigeno Yesu'a haino alino apaya male'niye. <sup>7</sup> Ke'aepa gemo avo'mo kae'a ali'a apaya ne'malaya vaya'e Falasi vaya'mogi'e'mo hosu kava'mo nehiye, hu'a hisaya kafe'mo kahauya hu'a agesayafe'mo yagai'a mai'nae. Agete'apae'mo, Sapati afina'mo alino api aino atesifigetae, hu'a hute'a agava mai'nae. <sup>8</sup> Yesu'a apaipafi'mo ageteno aya'mo kalage ki'niya vekae'mo, eka male'mo he tika maiyo, huno ha pai'nigeno eno haopale'mo he tino mai'niye. <sup>9</sup> Yesu'a apakaefe'mo, Sapati afina'mo Goti ke'aepa ge'amo akame hisayafe'mo na agufa kava'mo hane'niye. Vaya'mo ali'a alagepa hu'a apatesaya kavapi ali'a hosu hu'a apatesaya kava'mo hane'niye. Apakufamo ali'a kati'a apatesaya kavapi vaya'mo hapaesaya kava'mo hane'niye, huno apafi ge'niye. <sup>10</sup> Aulu hapaeno apaketenno agaefe'mo, kaya'mo aeka hayo huvo, huno ha pai'nigeno aya'mo aeno hayo hu'nigeno'ae'mo afa aya'mo alino hamale'niye. <sup>11</sup> Apaipamo lusi kava huno le'nige'apae'mo, agaetegamo na agufa

kava'mo hisune, hu'a hute'a ge huge afige hu'a mai'nae.

*Yesu'a apa vaya'amo lekana paino apate'niya gema*

*(Mt 10:1-4; Mk 3:13-19)*

<sup>12</sup> Mago afina'mo Yesu'a nunumu'mo hisiyafe'mo avele'mo haino ani hani'ilagamo Gotife'mo nunumu'mo huge huge nehigeno <sup>13</sup> koti'nigeno ge'amo ne'afiya vaya'aife'mo ge hu'nige'a e'nageno apakaepati'mo tuolofu'a vaya'mo lekana paino apateteno apaki'apimo apa vayane, huno apate'niye. <sup>14</sup> Ani vaya'ai apaki'apimae. Saimonife'mo Yesu'a saufa agi'amo Pita'ae, huno ate'niya vekagi agana'amo E'nalu'agi Yemisi'agi Yoni'agi Filipi'agi Matalomiyu'agi <sup>15</sup> Matiyu'agi Tomasi'agi Afiyasi mafa'nemo Yemisi'agi Saimoni'a ayamufa vekae, hu'a agi ae'naya vekagi <sup>16</sup> Yemisi mafa'ne'amo Yutasi'agi Isakaliyoti kotega vekamo Yutasi'a kutulu ya'mo ali'niya vekagi hu'a mai'nae.

*Yesu'a asole vaya'mo alino alagepa huno apate'niya gema*

*(Mt 4:24-25; Mk 3:7-12)*

<sup>17</sup> Aveleti'mo Yesu'e apakae'e'mo emi e'a otule'mo he ti'a mai'nae. Asole vaya'mo ge'amo ne'afiya vayanagi muki Yutiya haopalegati'mo ege Yulusalemu taonifati'mo ege ani agi'nale Taiya taonifati'e Saitoni taonifati'e'mo ege hu'a e'a mai'nae. Ge'amo afisayafe'mo ege kaita'apimo alino alagepa huno apatesiyafe'mo ege hu'a e'a mai'nae. <sup>18</sup> Hosu apaune vaya'mo vaya'ai apaipafi'mo mai'ne'a ali'a hosu hu'a

ne'apataya apaune vaya'mo alino hapafaino ap-  
atale'niye. <sup>19</sup> Ame ali'nageno himamu'amo  
u'nigeno alino alagepa huno apate'niya'mofe'mo  
ame alisayafe'mo hu'nae.

*Alagepa hu'a ne'maiya vaya'e alagepa hu'a  
no'maiya vaya'efe'mo hu'niya gemae  
(Mt 5:1-12)*

<sup>20</sup> Yesu'a alino maku huno apakeyana  
ge'amo ne'afiya vaya'mo mai'nageno  
apaketen'ae'mo, kagemi yatapimo  
o'male'nisaya vaya'mogitapamo Goti'a  
yagaino ne'apateya kegi'yafi'mo haitapa  
mai'nageno muki ya'amo lapakaitapi  
ya'mo hane'niya'mofe'mo Goti aulagale'mo  
alagepa hutapa mai'nayanagetapa afa'a  
lapamogaga aigae. <sup>21</sup> Hemenimo lapaka  
netesiya vaya'mogitapa henaga'amo lusi  
ne'ya'mo netapa lapamu hugaya'mofe'mo Goti  
aulagale'mo alagepa hutapa mai'nayanagetapa  
afa'a lapamogaga aigae. Hemenimo  
avi'ya'mo nehaya vaya'mogitapa henaga'amo  
kigi hugaya'mofe'mo Goti aulagale'mo  
alagepa hutapa mai'nayanagetapa afa'a  
lapamogaga aigae. <sup>22</sup> Vemo mafa'nemo akame  
nehaya'mofe'mo hosu apaipa kali'a lapatege  
ali'a lapafai'a lapatalege hu'a faipa hu'a  
lapatete'apae'mo lapakitapile'mo ali'a afepi  
lapatege hugaya'mofe'mo Goti aulagale'mo  
alagepa hutapa mai'nayanagetapa afa'a  
lapamogaga aigae. <sup>23</sup> Ani agufa kava'mo  
lapakaetegamo hisaya afina'mo lapamogaga  
aitetapa lapavayagunagu nehutapae'mo aetapa

hailo hiyo koku'napati'mo alopa miyatapimo aligayanagi. Lapakaetegamo hisaya agufa kava'mo apakinagomogi ani kava hu'a Gotitegati gemo alini e'a ae'a hakalo hu'a hapa nepaiya vaya'aitegamo hu'naya'mofe'mo lapamogaga aiyo. <sup>24</sup> Lapamogaga aigaya'monanafa kagemi yatapimo male'naya vayane, eheta piye, amuse nehaya ya'mo ago ali'nayanagi. <sup>25</sup> Ne'ya'mo ago netapa lapamu nehaya vayane, vaehae, henaga'amo lapaka tegaiyanagi. Kigi nehaya vayane, vaehae, henaga'amo yulagefa aitapa avi'ya'mo hugayanagi. <sup>26</sup> Muki vaya'mogimo lapakitapile'mo ali'a asaga hu'a lapatesaya afina'mo vaehae, hu'na, avovo kava'mo afole aigiye. Apakinago vaya'mogimo ani kava hu'a aigofe gemo alini e'a ae'a hakalo hu'a hapa nepaiya vaya'ai apaki'apile'mo ali'a asaga hu'a apate'nae.

*Yesu'a, Kame vayatapie'mo lapau  
lapayamopafi'mo lapaino, huno hu'niya gemae  
(Mt 5:38-48)*

<sup>27</sup> Hemenimo mani hisuva gemo ge'nimo ne'afiya vaya'mogitapae'mo hugesuve. Kame vayatapie'mo lapau lapayamopafi'mo lapaino. Hosu apaipamo kali'a nelapatesaya vaya'aina hapa maeyo. <sup>28</sup> Hosu hanageke ya'mo lapamigune, hu'a nehaya vaya'aife'mo, Goti'a lapa maeno, hutapa hiyo. Hu'a faipa hu'a lapatesaya vaya'aife'mo nunumu hutapa apateyo. <sup>29</sup> Mago vekamo'a kagalametale'mo nekamagisigekae'mo aika afe leka magokayaga kagalametamo amiyo.

Mago vekamo'a saketikamo aliteno'ae'mo siotika'e'mo aligefe husigekae'mo, o'aliyo, huka osuvo. <sup>30</sup> Mago yafe'mo aukaya husaya vaya'aina afa'a alitapa apamiyo. Kagemi yatapimo ali'nisaya vaya'aife'mo, halate namiyo, hutapa osiyo. <sup>31</sup> Lapakaetegamo husaya kavafe'mo lapau'nisigetapa ani kava hutapa apakaetega'e'mo hiyo. <sup>32</sup> Apakaemo lapakaefe'mo hapau apayamopafi'mo hapau'nisiya vaya'aife'mo lapau lapayamopafi'mo lapau'nisiya'mo'mo Goti'a lapao ke hegaifiye. Ha'ao. Hosu vaya'mogi'e'mo apakaefe'mo hapau apayamopafi'mo nehapaiya vaya'aife'mo hapau apayamopafi'mo nehapaiye. <sup>33</sup> Lapakaemo lapakaetegamo alagepa kava'mo nehaya vaya'aitegamo alagepa kava'mo nehisaya'mo'mo Goti'a lapao ke hegaifiye. Ha'ao, hosu vaya'mogi'e'mo ani agufa kava'mo nehae. <sup>34</sup> Inagi mago ya'mo alitapa apami'netapae'mo halate ali'a lamigae, hutapa lapakesa ne'afisaya'mo'mo Goti'a lapao ke hegaifiye. Ha'ao, hosu vaya'mogi ali'a apami'naya anona'apilefe'mo halate alisayafeke'mo hosu vaya'aina ali'a ne'apamiye. <sup>35</sup> Lapakaemo kame vayatapie'mo lapau lapayamopafi'mo lapau'nisigetapa alagepa kava'mo hutetapa anonatapile'mo halate alisayafe'mo lapakesa o'afitapa fiku alita apamiyo alopa yatapimo aligayanagi. Ala Ne'mo hogote anaga vekamo'a muki ya'amo alino ne'apamige'a alite'apae'mo kahao ke hove, hu'a osu'a fiku ne'aliya vaya'e hapaku atale'ne'a ne'aliya vaya'e'mo alagepa



kava'mo huno yagaino ne'apateya'mofe'mo ani agufa kava'mo hisaya'mo'mo mafa'ne'amo maigae. <sup>36</sup> Afotapimo'mo hau huno ne'apateya kava hutapa lapau hutapa apateyo, huno hapa pai'niye.

*Vaya'mo alitapa fako hutapa o'apateyo, huno hu'niya gemaē*  
(Mt 7:1-5)

<sup>37</sup> Lapakaemo vaya'aife'mo, hosu kava'mo hu'nae, hutapa hutetapa alita fako hutapa o'apateyo, Goti'a, hosu kava'mo hu'nae, huno huteno alino fako huno olapategaiyanagi. Ina kava ma kava'mo nehana kanomo mai'nane, hutapa osiyo. Goti'a lapakae'efe'mo, ina kava ma kava'mo nehana vekamo mai'nane, huno osugiyaniagi. Lapakaemo lapakaetegamo hosu kava'mo hu'nisaya vaya'aife'mo afa'a ateyo, hutapa hiyo, Goti'a lapakae'efe'mo, afa'a ateyo, huno hugiyaniagi. <sup>38</sup> Alagepa yatapimo alitapa apamigeno'ao Goti'a alino lapamino. Goti'a havai te'nisigeno'ae'mo aeno alagi huteno mago'e huno alino maleno havai teteno ayateti'mo maleno alagi huteno aino ati kaeteno talasisi kupi'mo ku ai malegaiye. Haiya agufa kava'mo hutapa alita fako hutapa apamisafi ani agufa kava'mo huno Goti'a alino fako huno lapamigiye, huno hapa pai'niye.

*Yesu'a aeno kalafefa gemo huno hapa pai'niya gemaē.*

<sup>39</sup> Yesu'a ina gemo aeno kalafefa gemo huno hapa paino'ae'mo, mago aulagamo ali hu'nisiya vekamo'mo aulagamo ali hu'nisiya vekamo

afa'a alino kanale huno avalelino ugifiye. Ha'ao avalelino visiyategamo u'ana kelifi'mo asagau'ana aiga'ae. <sup>40</sup> Ge'amo ne'afiya vekamo'a alino aya ne'maleya vekamo aeno no'agase. Tisa vekamo'a alino aya maleme aya maleme visigeno afitenoa'ae'mo alino aya male'niya vekagana huno maigiye.

<sup>41</sup> Na kava higetapae'mo konagatapi-mogi apaulagafi hane'niya afaya'mo ne'agaya'monanafa lapaulagafi hane'niya alopa latapa yosamo no'agae. <sup>42</sup> Na kava higetapae'mo konagatapie'mo, konaga'nimogae, kaulagafati'mo afaya'mo ali'na atalegauve, hutapa hapa nepaiya'monanafa alopa latapa yosamo lapaulagafi'mo hane'niyana no'agae. Aetapa ati nekaya vayane, hogotetapa lapaulagafi hane'niya alopa latapa yosamo alitapa atale'netapa konagatapimogi apaulagafi hane'niya afaya'mo alitapa atalesayafe'mo agetapa alagepa hutapa agegayanagi.

*Hosu yosamo'mo hosu yosa alaga'age'mo ae-gaiye, huno hu'niya gemae*

*(Mt 7:16-20; 12:33-35)*

<sup>43</sup> Alagepa yosamo'mo hosu yosa alagamo afa'a no'ae. <sup>44</sup> Vaya'mogimo yosa alaga'amo agete'apaeke'mo na agufa yosamo hane'nifi hu'a agegae. Vaya'mogimo afe nofipati'mo fiki yosa alagamo olagigae. Aise afe yosafati'mo mago nesaya yosa alagamo olagigae. <sup>45</sup> Inagi mago alagepa vekamo aipafi'mo alagepa kava'mo hane'nigeno alagepa kava'mo aipafati'mo afole ne'aiye. Hosu vekamo aipafi'mo hosu

kava'age'mo hane'nigeno hosu kava'mo aipafati'mo afole ne'aiye. Ani agufa ya'mo aipafi'mo havai te'nenno haineno avayafati'mo afole ne'aiye, huno hapa pai'niye.

*Lole vekala'moganimo no'mo ki'na'a kavafe'mo anava gemo hu'niya gemae*  
(Mt 7:24-27)

<sup>46</sup> Na kava higetapa nagaefe'mo, Ala kava nene, Ala kava nene, nehutapae'mo ge'nimo no'afiye. <sup>47</sup> Muki vaya'amogimo nagaetega e'a ge'nimo afite'apae'mo akame nehaya vaya'mo haiya agufa vekagana hu'a mai'nafige'na ali'na lapave liguve. <sup>48</sup> Apakaemo no ki'niya vekagana hu'a mai'nae. Ani vekamo'mo no'mo kisiyafe'mo hogoteno yatala kelimo kafilino lami male'nenno alopa yafa'mo faino ate'nenno no'mo ki male'niye. Ki male'nigeno'ae'mo lusi ani'mo heteno no'mo aeno ago'ya faigefe hu'niyana alopa yafa'mo faino ate'nenno ki male'niya'mofe'mo afa'a alino kanage osu'niye. <sup>49</sup> Ki male'niya'monanafa ge'nimo fiku afite'a akame nosaya vaya'mo mago vekamo'mo no'amo yafa'mo faino o'ate'nenno ki male'niya vekagana hu'a mai'nae. Mopalafate'mo ki male'nigeno'ae'mo ani'mo'a aeno ago'ya faitale'nigeno malage huno anipi'mo asagauno ai'nigeno alagi aeno halagape vaino alino hosu huno ate'niye, huno hapa pai'niye.

## 7

*Yesu'a ati vaya'aite'mo yagaino ne'apateya vekamo ali'ya'amo ne'aliya vekamo alino alagepa*

*huno ate'niya gemae**(Mt 8:5-13)*

<sup>1</sup> Yesu'a mani muki ge'amo vaya'aife'mo aeno hakalo huno hapa paino hano huteno ataleno Kapeneyamu taonifi'mo u'niye. <sup>2</sup> Mago Lomu gamani vekamo'a ati vaya'aite'mo yagaino ne'apateya vekamo ali'ya'amo ne'aliya vekamo hau'niya vekamo kaita hau'nigeno faligefe hu'niye. <sup>3</sup> Yagaino ne'apateya vekamo'a Yesufe'mo ava gemo afitenoa'e'mo Yu vayatama vaya'aife'mo, utapa Yesufe'mo, eka ali'ya'nimo ne'aliya vekamo alika alagepa huka ato, hutapa ha paiyo, huno hapa paiteno alino apate'nige'a Yesutegamo u'nae. <sup>4</sup> U'apae'mo, Kahao ke honagi alagi ha maesana vekamo mai'niye. <sup>5</sup> Yu vaya'mogitae'mo hau'nigeno mono no'mo kino late'niya'mofe'mo eka ha mao, hu'a Yesufe'mo ha pai'nae. <sup>6-7</sup> Inagi Yesu'e'mo magokepi lokaeli'a u'a no haopale'mo ava'yi hu'nagenoa'e'mo yagaino ne'apateya vekamo'a ao vaya'mo alino apate'nige'a Yesutega u'apae'mo, Ala kava nene, agaemo mago ali'ya'mo kamisuvafe'mo o'nahau'niye. Alagepa vekamo o'mai'nova'mofe'mo no'nifi'mo eka haikeka maisanafe'mo o'nahau'niye. Ina agufa vekamo mai'nova'mofe'mo kagaetegamo uguve, hu'na nagesa o'afi'nove. Afa'a mai'neka ge'age'mo nehugeno'ao ali'ya'nimo ne'aliya vekamo alagepa huno maino. <sup>8</sup> Ne'yagaiya kava'mo ago age'nove. Mago vaya'mogi nagaete'mo yagai'a ne'natege'na nagaemo ati vaya'aite'mo yagai'na ne'apatove. Inagi mago vekae'mo uvo, hu'na nehugeno ne'viye. Mago

vekae'mo eno, hu'na nehugeno ne'e. Ali'ya'nimo ne'aliya veka'e'mo, ani ali'ya'mo aliyo, hu'na nehugeno ali'ya'mo ne'aliye, huno laha pai'niye, hu'a Yesufe'mo ha pai'nae.

<sup>9</sup> Yesu'a ani gemo afitenoa'e'mo hau aitenoa'ino afe leno muki akame hu'a e'naya vaya'aife'mo, lapa nepauve, nagaefe'mo agesa afino fatago nehiya agufa kava'mo Isaleli vaya'ai apaipafi'mo afole o'ai'nige'na o'age'nova agufa kava'mo afole ai'niye, huno hapa pai'niye.

<sup>10</sup> Alino apate'nige'a u'naya vaya'mo ai'a atagi ne'e'a no'ale'mo ava'yi hute'apae'mo agayana ali'ya'amo ne'aliya vekamo kaita'amo hano hu'nige'a age'nae.

*Yesu'a mago neya vekamo fali'nigeno alino he tino ate'niya gema'e*

<sup>11</sup> Mago afina'mo utege'a Yesu'e'mo ge'amo ne'afiya vayanagi asole vayanagi hu'a Neni taonifi'mo u'nae. <sup>12</sup> Yesu'a uno taonimo lafi kipa haopale'mo ne'vige'apae'mo mago fali'niya vekamo kogu a kanomo'a magoke'age'mo alino ate'niya mafa'ne'amo fali'nige'a hi'yopa male'a alini'a e'nae. Kogu a'ne'e asole vaya'mo ani taonifi'mo mai'naya vaya'e'mo magokepi loka'eli'a e'nae. <sup>13</sup> Ala kava ne'mo'a kogu a kanomo ageteno'ae'mo hau huno ateteno, avi'ya osuvo, huno ha paiteno <sup>14</sup> uno hi'yopale'mo aya'mo male'nige'apae'mo alini'a e'naya vaya'mo anile he ti'a mai'nae. Agaemo ge huno'ae'mo, neya veka'e, hu'na, kaha pai'nae'mo he tiyo, hu'na kaha nepauve, huno nehigeno

<sup>15</sup> fali'niya vekamo he tino fai mai'nenoa'epa

faino age ai'niye. Yesu'a avaleno ita'amo'mo ami'niye. <sup>16</sup> Muki vaya'amogi koli hute'a Goti agi'ale'mo ali'a asaga hu'a atete'a, ala vekamo Gotitegati gemo alinino eno aeno hakalo huno hapa nepaiya vekamo lagaetegamo ago afole ai'niye. Goti'a vaya'ale'mo emineno hapa mae'niye, hu'a hu'nae. <sup>17</sup> Ani kavafe'mo ava gemo huli u e'a hu'nageno aino atagu faeno muki Yutiya kotega'e muki haopalega'e'mo uneno hu'niye.

*Yoni'a lole vekala'mo alino anate'nige'ana  
Yesutegamo u'na'a gemae  
(Mt 11:12-19)*

<sup>18</sup> Yoni ge'amo ne'afiya vaya'mogi ani kava'mo hu'niya ava gemo afite'apae'mo ani gemo Yonife'mo ha pai'nae. <sup>19</sup> Yoni'a ge'amo ne'afi'a vekala'anife'mo ge hu'nige'ana e'na'ageno Yesutegamo utanae'mo, afole aigiye, hu'a hu'naya vekamo mai'napi alu vekae'mo agava maisune, hutana afi ge'ao, huno hana paiteno alino anate'nige'ana Yesutegamo u'na'ae.

<sup>20</sup> Lole vekala'moganimu u'ana Yesufe'mo, Yoni'a ani'mo faleno ne'apateya vekamo'a alino la'ategeta'a ne'o'ae. Agaemo, agaetegamo utanae'mo, afole aigiye, hu'a hu'naya vekamo mai'napi alu vekae'mo agava maisune, hutana afi ge'ao, huno la'aha pai'niye, hu'ana ha pai'na'ae. <sup>21</sup> Ani afina'mo Yesu'a muki vaya'mo alu kaita alu kaita'mo hapau'niya vaya'mo alino hapageno apatege hosu apaune vaya'mo vaya'ai apaipafati'mo alino hapa faino apatalege apaulagamo ali hu'niya vaya'mo

apaulagamo alino ayakeno apatege huno mai'niye. <sup>22</sup> Yesu'a ge'anile'mo aeno atagaina huno hana paino'ae'mo, Yonitegamo utanae'mo ne'aga'a kava'e ne'afi'a ge'efe'mo ava gemo hutana ha pai'ao. Apaulagamo ali hu'niya vaya'aina ali'na ayake'na apatege apaiya hosu'niya vaya'mo ali'na alagepa hu'na apatege lepalosi ya'mo hapau'niya vaya'mo ali'na apakufalafa'mo hamale'na apatege apakesa akani'niya vaya'mo ali'na halo ai'na apatege fali'naya vaya'mo ali'na he ti'na apatege kagemi ya'apimo ohane'niya vaya'aife'mo alagepa faigoko gemo ae'na hakalo hu'na hapa paige hu'na mai'nove. <sup>23</sup> Nagaefe'mo lole apakesa no'afiya vaya'mogi Goti aulagale'mo alagepa hu'a mai'nayanage'a afa'a apamogaga aigae, huno hana pai'nige'ana u'na'ae.

*Yesu'a Yonife'mo ava gemo hu'niya gemae*

<sup>24</sup> Yoni'a apa'mo alino anate'nige'ana u'na'a vekala'mo eta'ageno'ae'mo Yesu'a Yonife'mo ava gemo huno hapa paino'ae'mo, ka'me kotega utapa na agufa ya'mo agesayafe'mo u'nae. Mago hopale'mo yasimo ne'aligeno'ae'mo havaeno ape nehiya hopamo agesayafe'mo u'nafiye. <sup>25</sup> Lapakaemo na agufa ya'mo agesayafe'mo u'nae. Alagepa kukenamo vaino ali'niya vekamo agesayafe'mo u'nafiye. Ha'ao, alagepa kukenamo vai'a ne'aliya vaya'mogimo ala'apimo yagai'a ne'apataya vaya'ai no'apifike'mo ne'maiye. <sup>26</sup> Na agufa ya'mo agesayafe'mo u'nae. Gotitegati gemo alinino eno aeno hakalo huno hapa nepaiya vekamo agesayafe'mo u'nafiye.

He, nagaemo lapa pai'nae'mo agaemo Gotitegati gemo alinino eno aeno hakalo huno hapa nepaiya veka'age'mo o'mai'nifa <sup>27</sup> Goti mukufi gemo'a ava gemo huno'ae'mo,

afiyo, nagaemo apa veka'nimo ali'na atesugeno uno hogoteteno ka'mo valino kategaiye, huno hu'niya vekamo mai'niye,

huno hapa pai'niye. <sup>28</sup> Lapa nepauve, Yoni'a muki ma mopafi mai'naya vaya'mo ago aeno apaka se'niya'monanafa Goti'a yagaino ne'apateya kegi'yafi'mo mai'niya vekamo henaga vekamo'a Yoni'mo ago aeno aga se'niye. <sup>29</sup> Muki afa vaya'mogi'e takesi moni ne'aliya vaya'mogi'e'mo Yoni'a hu'niya gemo afite'apae'mo, Goti'a alagepa vekamo fatago vekae, hu'a hu'nageno Yoni'a ani'mo faleno apate'niya'monanafa <sup>30</sup> Falasi vaya'e ke'aepa gemo lekana pai'a ali'a apaya ne'malaya vaya'mogi'e'mo Yoni'a ani'mo faleno apatesiyafe'mo ohapau'nige'apae'mo, ha'ao, hu'a hu'naya'mofe'mo Goti'a hapa maesiya gemo hiyo, huno hapa pai'niya gemo ago amagi'a atale'nae. <sup>31</sup> Ala kava ne'mo'a, hemeni afina'mo mai'naya vaya'mogi na agufa vayakana hu'a mai'nafige'na lapa paiguve. <sup>32</sup> Apakaemo mago mafa'ne anagakana hu'a mai'nae. Mago mafa'ne anaga'mogimo maketi kumate'mo mai'ne'apae'mo, lagaemo yave'yamo ne'amagunagetapae'mo lapakaemo oae'nae. Yulagefa ai'nonana avi'ya'mo osu'nae, hu'a nehae. <sup>33</sup> Ani kava hutapa Yoni'a ani'mo faleno ne'apateya vekamo'a



ne'ya'mo mo sino mai'nenonofi alagafatiani'mo  
o'ne'nigetapae'mo, hosu aune vekamo aipafi'mo  
mai'niye, hutapa nehae. <sup>34</sup> Vemo mafa'nemo'mo  
eno ne'ya'mo mo osino nege nofi alagafatiani'mo  
nege hu'nigetapae'mo, ageyo, ne'yafe'mo lusi  
kava huno hau'nigeno lusi ne'ya'mo neteno nofi  
alagafatiani'efe'mo lusi kava huno hau'nigeno  
ne'neya vekae. Takesi moni ne'aliya vaya'e hosu  
vaya'e'mo apao vekamo mai'niye, hutapa nehae.  
<sup>35</sup> Lapakaemo ani gemo nehaya'monanafa Goti  
vaya'amogi afite'a age'naya vaya'mogi Goti'a  
afitenogage'niya kavafe'mo, Goti kava'amo  
alagepa fatago kava'mo hane'niye, hu'a nehae,  
huno hapa pai'niye.

*Yesu'a Falasi vekamo nopi'mo haino mai'niya  
gema*

<sup>36</sup> Mago Falasi vekamo'a Yesufe'mo, eno, nagae  
nopi'mo ne'ya'mo negau'ae, huno ge hu'nigeno  
Yesu'a no'afi'mo haino hi'yalamute'mo mai'niye.  
<sup>37</sup> Ani taonifi'mo mai'niya a'mo hosu a kanomo'a  
afi'niyana Yesu'mo eno Falasi vekamo nopi'mo  
hi'yalamute'mo mai'niye, hu'a hu'naya gemo  
afitenoa'e'mo yafa kepi uvelimo'a alagepa atumo  
ne'aiya uvelimo alinineno <sup>38</sup> Yesu akameleg-  
amo he tino mai'nenoa'yalegamo avi'ya'mo  
hu'niye. Avi'ya'mo nehigenoa'e'mo aunumo'mo  
kalo kalo huno aiya agotofule'mo asagauno  
ai'nigeno ayokateti'mo alino hau huno ateteno  
aiyale'mo haeno neteno uvelimo lakino faleno  
ate'niye.

<sup>39</sup> Yesufe'mo eno, huno ge hu'niya Falasi  
vekamo'mo ageteno'ae'mo, ani vekamo

Gotitegati gemo alinineno aeno hakalo huno hapa nepaiya vekamo mai'niyesinana haiya agufa a kanomo'mo eno name ne'alifi huno ageteno hosu kava'mo nehiya a kano mai'niye, huno age'niyesine, huno aipafi'mo agesa afi'niye. <sup>40</sup> Yesu'a agesa afi'niya agesale'mo aeno atagaina huno ha paino'ae'mo, Saimoniyo, mago gemo kaha paigesuve, huno ha pai'nigeno, Tisao, afa'a naha paiyo, huno ha pai'niye. <sup>41</sup> Yesu'a, lole vekala'mogani anona'animo hane'niyana mago vekamo vani hataleti kina anona'amo hane'nigeno mago vekamo teni kina anona'amo hane'niye. <sup>42</sup> Ani anona'anilefe'mo moni'animo alagi ohane'nigeno anami'niya vekamo'a, afa'a ate'ao, huno hana pai'niye. Lole vekalapati'mo haiya vekamo'a anona'amo anamino atale'niya vekae'mo lusi kava huno hau'nisigeno alu vekamo aeno aga segaiye, huno afi ge'nigeno'ae'mo, <sup>43</sup> Nagesa afuvana alopa anona'amo hane'nigeno afa'a atale'niya vekae, huno ha pai'nigeno, he lama gemo nehane, huno ha paiteno <sup>44</sup> ani a kanomo aino afe leno aulu hae'niye. Saimonife'mo, mani a kanomo age'napiye. Nokafi'mo e'na hai ne'nogekae'mo naiyamo sese hisuvafe'mo ani'mo he fika o'nami'nana'monanafa mani a kanomo'a aunuleti'mo naiyamo sese huno nateteno ayokateti'mo alino hau huno nate'niye. <sup>45</sup> Hai ne'nogekae'mo nahaeka o'ne'nana'monanafa hai'ne'na mai'nova afinateti'mo naiyale'mo haeno nege nege huno mai'niye. <sup>46</sup> Afa uvelileti'mo alika nagenopafi'mo lakika faleka o'nate'nana'monanafa mani a

kanomo'a naiyale'mo alagepa atumo ne'aiya uvelileti'mo lakino faleno nate'niye. <sup>47</sup> Ani kava'mo hu'niya'mofe'mo kaha pai'nae'mo, ani a kanomo'a nagaefe'mo lusi kava huno hau ayamopafi'mo hau'niya kava'aleti'mo huno'ae'mo, alopa hosu kava'nimo anona'nimo ago alino atale'niye, huno alino lapave neliye. Aise hosu kava'nimo alino atale'niye, huno agesa afi'nisiya vekamo'mo aise'ato'amo hau ayamopafi'mo nehaye, huno ha paiteno <sup>48</sup> ani afe'mo, hosu kavakamo ali'na atale'nove, huno ha pai'nige'apae'mo <sup>49</sup> agae'e'mo magokepi lokae'a mai'naya vaya'mogimo apakai'apimo apaipafi'mo apakesa afi'apae'mo, mani vekamo ina la'mo mai'nen'ae'mo hosu kava'amo alino atale'niye, hu'a apakesa afi'nae. <sup>50</sup> Agaemo ani afe'mo, kagesa afika fatago hu'nana kavakamo'mo kagufamo alino katino kate'niyanagi kaipamo'mo falu hu'nisigeka afa'a uvo, huno ha pai'niye.

## 8

*Yesu'e'mo mago a'ne anaga'mo lokaeli'a u'naya gemae*

<sup>1</sup> Aise afina'mo utegeni Yesu'a muki aise taonifi'e muki alopa taonifi'e'mo alagepa faigoko gemo Goti'a yagaino ne'apateya kavafe'mo ava gemo aeno hakalo huno hapa paimale hapa paimale hulino uneno huno mai'niye. Agae'e'mo tuolofu'a vaya'mo ge'amo ne'afiya vaya'e <sup>2</sup> mago a'ne anaga'e'mo lokaeli'a u'e'a hu'a mai'nae. Yesu'a hogoteno hosu apaune vaya'mo ani a'ne

anaga'ai apaipafati'mo alino hapa faino apatalege kaita hapau'niya a'ne'aina alino alagepa huno apatege hu'niya a'ne'e'mo lokaeli'a u'nae. Ani a'nefati'mo Maliya'a Maganala kotega a'mo aipafati'mo seveni'a hosu apaune vaya'mo alino hapa faino apatale'niya a'mo maige <sup>3</sup> Yovana anau'amo agimo Suy'a Heloti no'afi yate'mo ne'yagaiya vekamo a'mo maige Susana'e mago'e asole a'ne anaga'mogi'e'mo moni'e ne'ya'e'mo ha mae'a amige amige hu'a mai'nae.

*Avina yafe'mo ava gemo hu'niya gema*  
(Mt 13:1-9; Mk 4:1-9)

<sup>4</sup> Muki asole vaya'mo taoni'afati taoni'afati'mo ete ete hu'a ali'a anupa hu'a mai'nageno'ae'mo Yesu'a aeno kalafefa gemo hapa paino'ae'mo, <sup>5</sup> mago vekamo'a avina ya'mo hakalesiyafe'mo u'niye. Ne'uno'ae'mo yaga auno ataleme ataleme u'nigeno'ae'mo mago avina ya'mo kate'mo asagauno ai'nige'apae'mo vaya'mo u'e'a hu'apae'mo ae'a latapai'nageno nama anaga'mogimo e'a ne'nae. <sup>6</sup> Mago avina ya'mo yafa agotofule'mo asagauno aiteni hage'niyana ani'mo ohane'niya'mofe'mo hagegeno'ae'mo malage huno ago falu te'niye. <sup>7</sup> Mago avina ya'mo aufe nofi'mo hane'niya mopafi'mo asagauno aiteni hage'niya'monanafa aufe nofi'mo'a ago kino ati kae'niye. <sup>8</sup> Mago avina ya'mo alagepa mopafi'mo asagauno aiteni hageni haineno'ae'mo vani hataleti'a alagamo ae'niye. Gemo ne'afisaya lapakesa hane'nisiyana mani gemo alagepa hutapa afiyo, huno hapa pai'niye.

*Yesu'a aeno kalafefa gemo hu'niya gemo  
aepa'amo hapa pai'niya gemae  
(Mt 13:10-17; Mk 4:10-12)*

<sup>9</sup> Ge'amo ne'afiya vaya'mogi agaefe'mo, ani  
aeka kalafefa gemo aepa'amo na agufa gemo  
hu'nane, hu'a afi ge'nageno <sup>10</sup> Yesu'a, lapakaemo  
Goti'a yagaino ne'apateya kava'mo alino fala ki  
male'nenno ago alino afole aino ate'niya gee'mo  
ae'na kalafefa gemo aepa'amo

lapakaemo afa'a afigaya'monanafa mago  
vaya'mogimo alagi o'afigae. Apakaemo  
agegaya'monanafa age'a aeto osuge  
afigaya'monanafa afi'a aeto osuge  
hisayafe'mo

ae'na kalafefa gemo hu'na hapa nepauve.

<sup>11</sup> Ae'na kalafefa gemo nehuva gemo aepa'amo  
hane'niyana avina yakana huno Goti ge'amo  
hane'niye. <sup>12</sup> Mago avina ya'mo kate'mo

asagauno ai'niya avina yakana hu'a vaya'mogi  
Goti ge'amo afitageno'ae'mo Satani'mo eno ani  
gemo apaipafati'mo alinino ne'viye. Satani'a,  
fiku yanage'a ge'ae'mo apakesa afi'a fatago  
hisageno Goti'a apakufamo alino katino  
apategaiye, huno agesa ne'afiye. <sup>13</sup> Mago

avina ya'mo yafa agotofule'mo asagauno ai'niya  
avina yakana hu'a mago vaya'mogi Goti ge'amo  
afite'apae'mo apamogaga ne'aiye. Hafu'yamo  
mopafi o'ae'niya kava hu'a yoka apakesa  
afi'a fatago hu'nageno'ae'mo apamalageka  
nehiya afina'mo atale'a ago asagau'a ne'aiye.

<sup>14</sup> Mago avina ya'mo aufe nofi'mo hane'niya  
mopafi'mo asagauno ai'niya avina yakana hu'a

mago vaya'mogi Goti ge'amo afite'apae'mo atale u'a ma mopafi kavafe'mo hapausoli huge monie'mo apakesa ala'amo afige ma mopafi kavafe'mo apamogaga aige hu'a maime maime ne'vageno'ae'mo ani kava'mo'a aeno apati kae'nigeno alaga'amo ne'aeyana afu nole. <sup>15</sup> Mago avina ya'mo alagepa mopafi'mo asagauno ai'niya avina yakana hu'a mago vaya'mogi Goti ge'amo afite'apae'mo ali'a lama ge apaipamo alagepa apaipafi'mo malete'apae'mo alagepa kate'mo uge uge hu'a ne'mai'apae'mo alagepa alagamo ne'ae.

*Lamu kanife'mo hu'niya gemae*

*(Mk 4:21-25)*

<sup>16</sup> Vaya'mogi lamufi'mo kani ae'a kaete'apae'mo ai'a ati kaete'a hipakapi'mo no'malafa nopi'mo hai e'a maisaya vaya'mogi alagepa hu'a age'a ha le'a maisayafe'mo anaga hi'yalamute'mo ne'malae. <sup>17</sup> Muki ya'amo fala ki'niya ya'mo alino afole aino ategaiye. Muki kava'mo hu'a ae'a ati nekaya kava'mo afole yategamo afole aigiye. <sup>18</sup> Ali'nisaya vaya'mo mago'e ya'mo alino apamigiya'monanafa o'ali'nisaya vaya'mogimo ali'none, hu'a apakesa ne'afisaya vaya'aitegati'mo hapa faleno aligiye. Aligiya'mofe'mo ehetafiye, Goti ge'amo ne'afitapae'mo alagepa hutapa lapakesa afiyo.

*Yesu ita'amo'e agana'amogi'e'mo agaetegamo e'naya gemae*

*(Mt 12:46-50; Mk 3:31-35)*

<sup>19</sup> Yesu ita'amo'e agana'amogi'e'mo agaetegamo e'nayana asole vaya'mo mai'a kili

pae'naya'mofe'mo o'age'nae. <sup>20</sup> Mago vekamo'a, itakamo'e kaganakamogi'e'mo kagesayafe'mo e'a kumatega mai'nae, huno ha pai'nigeno, <sup>21</sup> ge'nimo afite'a akame nehaya vaya'mo ita'nimogi maige nagana'nimogi maige hu'a mai'nae, huno hapa pai'niye.

*Yesu'a yasie'mo alika hano huvo, huno hu'niya gema*

*(Mt 8:23-27; Mk 4:35-41)*

<sup>22</sup> Mago afina'mo Yesu'e ge'amo ne'afiya vaya'e'mo sipifi'mo hai'a mai'ne'apae'mo, ani kotu'mo mugagayaga faligamo lakaeta ugune, huno hapa pai'nige'apae'mo ani kotu agi'naleti'mo atale'a u'nae. <sup>23</sup> Ne'u'apae'mo Yesu'a au kaleno mai'niye. Ani kotute'mo lusi kava huno yasimo ali'nigeno ani'mo aino holakau holakau huno sipifi'mo haino havaiteme havaiteme u'nige'apae'mo ae'a lapanegefe'mo hu'nae. <sup>24</sup> U'a aupati'mo hau ne'ne'apae'mo, Ala kava nene, Ala kava nene, aeta lapanegefe'mo nehune, hu'a ha pai'nageno aupati'mo he tino ani'mo'a lusi kava huno aino holakau holakau hu'niya ani'e yasi'efe'mo, afa'a hano hi'ao, huno hana pai'nige'ana ge'amo afite'ana hano hu'na'ae. <sup>25</sup> Yesu'a, lapakesa afitapa fatago hu'naya kavatapimo haiya'ale'mo hane'niye, huno apafi ge'nige'apae'mo koli hute'a apakai'apimo, yasimo'e ani'mo'e'mo ge'amo afi'na'agi mani vekamo na agufa vekamo mai'niye, hu'a hute'a hapau ai'a mai'nae.

*Yesu'a negi nagi nehiya vekamo aipafati'mo  
hosu apaune vaya'mo alino hapa faitale'niya  
gema*

*(Mt 8:28-34; Mk 5:1-20)*

<sup>26</sup> Lakae'a u'a Gelasini kotegamo ava'yi hu'nae. Ani ko'mo ani agi'nale'mo hane'nigeno Galeliyamo mugagayaga faliga hane'niye.

<sup>27</sup> Yesu'a sipifati'mo ataleno lamino ani agi'nale'mo aiyamo ne'aegeno'ae'mo mago vekamo anile'mo hogoteno hane'niya taonifi'mo mai'niya vekamo aipafi'mo hosu apaune vaya'mo mai'naya vekamo ne'ege'ana fotu hu'na'ae. Agaemo kukena vaino o'alige nopi'mo ohavaege huteno kanolufike'mo yafakapi'mo mai'niye.

<sup>28</sup> Agaemo Yesu'a ageteno'ae'mo, ai, aeteno Yesu aiyafi'mo eno ago'ya fai'neni alopa gefati'mo ge huno'ae'mo, Yesuo, Hogote Anaga vekamo mafa'ne'amogae, nagaetegamo na agufa kava'mo huka natesanafe'mo ne'ane. Nagafu kisiya agufa kava'mo nagaetegamo osisanafe'mo kahao ke nehove, huno ha pai'niye.

<sup>29</sup> Yesu'a hogoteno hosu aune vekae'mo, emikeka ataleka uvo, huno ha pai'niya'mofe'mo hosu aune vekamo'a ani gemo ha pai'niye. Muki afina'mo hosu aune vekamo'a atafauno mai'nigeno seli nofiteti'mo ayatalate kite aiyalate kite hu'a ki'a ate'naya seli nofi'mo ago alino kapalu ae'nigeno hosu aune vekamo'a alino hafaitale'nigeno ka'me kotega ute ute huno mai'niye.

<sup>30</sup> Yesu'a, kagikamo ina lagae, huno afi ge'nigeno'ae'mo, Nagi'nimo Asole vaya'nae, huno ha pai'niye. Asole hosu apaune vaya'mo aipafi'mo mai'naya'mofe'mo agi'amo Asole



vaya'ae. <sup>31</sup> Hosu apaune vaya'mogi, kahao ke honanagi ive kelifi'mo alika lahafaika olato, hu'a ha pai'nae.

<sup>32</sup> Asole afu anaga'mo mago aise ave haopale'mo kahaumo ne'a mai'nae. Apakaemo Yesufe'mo, kahao ke honanagi alika lahafaitalegeta uta afu anaga'ai apaipafi'mo faleta haita maino, hu'a ha pai'nageno'ae'mo, he, afa'a viyo, huno hapa pai'niye. <sup>33</sup> Hosu apaune vaya'mo ani vekamo aipafati'mo atale lami'a afu anaga'ai apaipafi'mo fale'a hai'nage'apae'mo afu anaga'mo mulifati'mo nagu nagu hu'a lami'a anipi'mo asagau'a aite'a ani'mo nete'a fali'nae. <sup>34</sup> Ani afu'aite'mo ne'yagaiya vaya'mogi ani kava'mo agete'apae'mo apaune hetale u'a taonifi'e muki haopalega'e'mo ani kavafe'mo ava gemo hu'a hapa pai'nageno aino atagu faeno uneno hu'niye. <sup>35</sup> Muki vaya'mogi ani kavafe'mo ava gemo afite'apae'mo agesayafe'mo Yesutegamo u'a agayana hosu apaune vaya'mo ago atale'a u'naya vekamo agesa aino halo ai'nigeno kukenamo alino vaiteno Yesu aiyafi'mo mai'nige'a agete'apae'mo apamo'ya ai'nae. <sup>36</sup> Age'nageno Yesu'a hosu apaune vaya'mo aipafati'mo alino hapa faino apataleteno alino alagepa huno ate'niya kavafe'mo ava gemo hu'a hapa pai'nae. <sup>37</sup> Ani ko'mo agi'amo Gelasini kotega haopale'mo mai'naya vaya'mogimo ani kavafe'mo lusi kava hu'a koli hute'apae'mo, mani kote'mo ataleka uvo, hu'a ha pai'nageno sipifi'mo haino maitege'apae'mo ge'amo ne'afiya vaya'e'mo halate ai'a atagi ne'a u'nae.

<sup>38</sup> Ugefe nehageno'ae'mo hosu apaune vaya'mo aipafati'mo alino hapa faino apatale'niya vekamo'a Yesufe'mo, kahao ke hovanageta'a ugu'ae, huno ha pai'niyana <sup>39</sup> halate nokalega aika atagi nekuka Goti'a lusi kava huno kaha mae'niya kavafe'mo ava gemo huka hapa paiyo, huno ha pai'nigeno uno muki taonifi mai'naya vaya'aife'mo Yesu'a lusi kava huno ha mae'niya kavafe'mo ava gemo huno hapa pai'niye.

*Yesu'a mago a kanomo alino alagepa huno ateteno Yailasi a'mafa'nemo alino he tino ate'niya gemae*

*(Mt 9:18-26; Mk 5:21-43)*

<sup>40</sup> Yesu'a aino atagi neno e'nige'apae'mo agava mai'ne'a ali'a falu fala hu'a ate'nae. <sup>41</sup> Mago vekamo Yu monote'mo ne'yagaiya vekamo agi'amo Yailasi'a Yesutegamo eno aiyafi'mo ago'ya fai'nenno, kahao ke hogi a'mafa'ne'nimo faligefe nehigi nagae notega ugeta'ao, huno ha pai'niye. <sup>42</sup> Magoke'atomo alino ate'niya a'mafa'nemo'mo tuolofu'a kafugamo mai'niya a'mafa'nemo kaita hau'nigeno faligefe'mo hu'niye.

Inagi Yesu'a ne'vige'apae'mo asole vaya'mogi male'a apalime apalime u'nae. <sup>43</sup> Mago a kanomo tuolofu'a kafugamo aigu'ya'mo hauge hauge huno mai'niye. Agaemo muki lota vaya'aitegamo uno moni'amo apamino hano hu'niyana ha o'mae'nae. <sup>44</sup> Ani a kanomo'a Yesu akamelegamo ne'eno'ae'mo kukena'amo atupa'ale'mo ame ne'aligeno'ae'mo malage huno aigu'ya'amo hano hu'niye. <sup>45</sup> Yesu'a, ina la'mo

eno name ali'niye, huno apafi ge'nige'apae'mo muki vaya'amogimo, lagaemo kame o'ali'none, hu'a ha pai'nae. Pita'e'mo magokepi mai'naya vaya'mogimo, Tisao, muki vaya'mogimo male'a nekapaligekae'mo ina la'mo name ali'niye, huka nehane, hu'a ha pai'nageno'ae'mo <sup>46</sup> Yesu'a, himamu'nimo ago u'niya'mofe'mo age'novana mago vekamo'a name ali'niye, huno hapa pai'nigeno <sup>47</sup> ani a kanomo'a age'niyana ago nage'niye, huno agesa afiteno atete haume haume eno Yesu haopale'mo ago'ya fai'nenomuki vaya'ai apaulagale'mo huno'ae'mo, alika alagepa huka natesanafe'mo ame ali'nogeno aiguya'nimo malage huno hano hu'niye, huno ha pai'nigeno'ae'mo, <sup>48</sup> a'mafa'ne'nimogae, kamogaga aiyo. Nagaefe'mo kagesa afika fatago nehana kavakamo'mo alino alagepa huno kate'nigi kaipamo'mo falu hu'ninageka afa'a uvo, huno ha pai'niye.

<sup>49</sup> Ha nepaigeno'ae'mo mago yagaino ne'apateya vekamo notegati'mo mago vekamo eno ava'yi huteno'ae'mo, a'mafa'nekamo ago fali'nigi tisa vekamo mago ali'ya'mo alika o'amiyo, huno ha pai'nigeno <sup>50</sup> Yesu'a afiteno'ae'mo, koli osuka nagaefeke'mo kagesa afika fatago hugeno'ao a'mafa'nekamo afa'a alagepa huno maino, huno ha pai'niye.

<sup>51</sup> Yesu'a uno ani vekamo no'ale'mo ava'yi huteno muki vaya'aife'mo, kumatega maiyo, huno hapa paiteno Pita'agi Yoni'agi Yemisi'agi ita'afo'ala'moganimogi huno nopi'mo apavalelino hai'niye. <sup>52</sup> Muki vaya'mogi faiyosago fai'a avi'ya huge huge

hu'a mai'nageno'ae'mo Yesu'a, avi'ya osiyo. Ani a'mafa'nemo alagi ofali'nifa afa'a au kaleno mai'niye, huno hapa pai'nige'apae'mo, <sup>53</sup> ago fali'niye, hu'a age'naya'mofe'mo kigi hu'a ate'nae. <sup>54</sup> Agaemo kumatega mai'niyo, huno hapa paiteno haino ayate'mo atafau'neni, a'mafa'neyo, he tiyo, huno ha pai'nigeno <sup>55</sup> auneme'amo halate aino atagi neno eno agufafi fale'nigeno malage huno he ti'niye. Yesu'a, ne'ya'mo alita amiyo, huno hapa pai'niye. <sup>56</sup> Ita'afo'ala'moganimi hanau ai'na'ageno'ae'mo, mago vekae'mo utana ha opai'ao, huno hana pai'niye.

## 9

*Yesu'a ge'amo ne'afiya vaya'aife'mo, umenitata hutapa Goti ge'amo aeta hakalo hiyo, huno hapa pai'niya gemae*

*(Mt 10:5-15; Mk 6:7-13)*

<sup>1</sup> Yesu'mo tuolofu'a vaya'mo ge'amo ne'afiya vaya'aife'mo ge hu'nige'a e'a mai'nageno'ae'mo hosu apaune vaya'aina ali'a hapafai'a apatalege kaita nehapausiya vaya'mo ali'a alagepa hu'a apatege hisayafe'mo himamu'amo alino apamiteni'ae'mo, <sup>2</sup> Goti'a yagaino ne'apateya kavafe'mo ava gemo aeta hakalo hutapa hapa paitetapa kaita hapau'niya vaya'aina alita alagepa hutapa apatemale apatemale hutapa umenitata hiyo. <sup>3</sup> Mago yatapimo o'alitapa afa'a viyo. Hayopa kayotapigi kutapigi ne'yatapigi monitapigi lole siotitapigi hutapa o'alitapa afa'a viyo. <sup>4</sup> Utaapa haisaya nopi'mo ataletapa

o'utapa ani nopi'mo maiyo. <sup>5</sup> Inagi ali'a falu fala hu'a olapatesaya taonifi'mo apakaefe'mo faigoko gemo hisiyafe'mo alagena kava'mo hutapa lapaiyalegati'mo mumusopamo alitapa kalo paetaletapa viyo, huno hapa paiteno alino apate'nige'a u'nae. <sup>6</sup> Muki haopalega umenitata hu'a taoni'afi taoni'afi'mo alagepa faigoko gemo ae'a hakalo hu'a hapa paige kaita hapau'niya vaya'mo ali'a alagepa hu'a apatege hu'a umenitata hu'nae.

*Heloti'a Yesufe'mo ava gemo afi'niya gemae  
(Mt 14:1-2; Mk 6:14-16)*

<sup>7</sup> Heloti'a yagaino ne'apateya vekamo'mo Yesu'a muki hu'niya kavafe'mo ava gemo afitenoa'e'mo lusi kava huno agesa afi'niye. Mago vaya'amogimo, Yoni'a fali'niyateti'mo halate he ti'niye, hu'a hu'nage'apae'mo mago vaya'amogimo, Ilaiya'a afole ai'niye, hu'a hu'nage'apae'mo <sup>8</sup> mago vaya'amogimo, akeya'vilaga vekamo Gotitegati gemo alinino eno aeno hakalo huno hapa nepaiya vekamo fali'niyateti'mo halate he ti'niye, hu'a hu'nae. <sup>9</sup> Heloti'a, Yoni'a lugo'amo ago he'na hatagau'na atale'nova'monanafa ava gemo ne'afuva vekamo ina lafe'mo ava gemo nehafi, huno huteno Yesu'mo agesiyafeke'mo mai'niye.

*Yesu'a faefu tauseni'a vaya'aina ne'ya'mo alino  
apami'niya gemae  
(Mt 14:13-21; Mk 6:30-44)*

<sup>10</sup> Apa vaya'mo halate Yesutegamo ai'a atagi ne'e'a muki hu'naya kavafe'mo ava gemo hu'a ha pai'nageno afitenoa'e'mo apavalelino uno

Metasaita taoni haopalegamo apakai'apige'mo u'a mai'nae. <sup>11</sup> Asole vaya'mogimo afite'apae'mo Yesu'a akame hu'a e'a ava'yi hu'nageno'ae'mo alino falu fala huno apateteno Goti'a yagaino ne'apateya kavafe'mo ava gemo huno hapa paige kaita hapau'niya vaya'aina alino alagepa huno apatege huno mai'niye. <sup>12</sup> Yegemo lamino falegefe hu'nige'apae'mo tuolofu'a vaya'mogi Yesutegamo e'a, ka'me kotegamo eta mai'nona'mofe'mo muki vaya'mo alika apatege'a u'a ani haopalega hane'niya taonifati'e kotegati'e'mo ne'ya'apimo miya fai'a nete'a havaeyo, hu'a ha pai'nageno'ae'mo, <sup>13</sup> lapakaemo ne'ya'mo alitapa apamiyo, huno hapa pai'nige'apae'mo, faefu'a peleti maya'e lole noyamela'e'mo hane'nigi ne'ya'mo nesaya ya'mo uta miya failita esupiye, hu'a afi ge'nae. <sup>14</sup> Faefu tauseni'a agufa vaya'mo mai'nae. Agaemo ge'amo ne'afiya vaya'aife'mo, fifiti fifiti'a vaya'mo alita anupa hutapa apatete apatete hutetapa alita anupa hutapa, kahaule'mo maiyo, hutapa hapa paiyo, huno hapa pai'nige'a <sup>15</sup> ani gemo hu'a hapa pai'nage'apae'mo kahaule'mo mai'nae. <sup>16</sup> Agaemo faefu'a peleti maya'e lole noyamela'e'mo ali'nenoko koku'nategamo alino maku huno age'nenoko Gotife'mo hao ke heteno alino lo aeno akaya heteno ge'amo ne'afiya vaya'mo apami'nige'apae'mo alini u'e'a hu'a apami'nage'apae'mo <sup>17</sup> ne'a apamu hu'nae. Ne'a apamu hute'a atalaya atupa'amo ali'a tuolofu'a honafa yuvapafi'mo male'a havaite'nae.

*Pita'a Yesufe'mo Kalaisi vekamo mai'nane,  
huno ha pai'niya gema*

*(Mt 16:13-19; Mk 8:27-29)*

<sup>18</sup> Mago afina'mo Yesu'a agailage'mo nunumu'mo nehige'apae'mo ge'amo ne'afiya vaya'mo magokepi lokae'a mai'nae. Mai'ne'apae'mo Yesu'a, vaya'mogimo, nagaefe'mo ina la'nae, hu'a nagi'nimo ne'ae, huno apafi ge'nige'apae'mo, <sup>19</sup> mago vaya'amogimo, Yoni'a ani'mo faleno ne'apateya vekamo mai'niye, hu'a huge mago vaya'amogimo, Ilaiya'a mai'niye, hu'a huge mago vaya'amogimo, mago akeya'vilaga vekamo Gotitegati gemo alinino eno aeno hakalo huno hapa nepaiya vekamo fali'niyateti'mo halate he ti'niye, hu'a huge nehae, hu'a ha pai'nageno'ae'mo <sup>20</sup> Yesu'a, ani gemo nehaya'monanafa lapakaemo ina la'nae, hutapa nagi'nimo ne'ae, huno loka huno apafi ge'nigeno'ae'mo Pita'a, Goti'a lekana paino kate'niya vekamo Kalaisi ne'mogamae, huno ha pai'nigeno <sup>21</sup> Yesu'a lokiya gemo huno'ae'mo, magoke vekae'mo mani gemo ha opaiyo, huno hapa pai'niye.

*Yesu'a, falite'na halate he tiguve, huno hu'niya gema*

*(Mt 16:20-28; Mk 8:30-9:1)*

<sup>22</sup> Huteno'ae'mo, Vemo Mafa'nemo'mo lusi kava huno agafu kisiya ya'mo aligiye. Vayatama vayanagi mono hu'a ne'apataya vaya'aite'mo yagai'a ne'apataya vayanagi ke'aepa gemo avo'mo kae'a ali'a apaya

ne'malaya vayanagi hu'a apakame'ya amisage'a amagisageno faliteno lole'e mago'e afina'mo maiteno halate he tigiye, huno hapa paiteno <sup>23</sup> Yesu'a muki vaya'aife'mo, mago vekamo'a nakame hugefe'mo hu'nisiyana hau'niya kavafe'mo, ha'ao o'nahaiye, huno huteno muki afina'ae afina'ae'mo malipu yosa'amo alino kofilino nakame hino. <sup>24</sup> Ina lagimo ma mopafi'mo alagepa hu'a maige maige hu'a maisaya kavafe'mo hapau'nisige'a yagai'a ate'a mai'nisafige'a alagepa hu'a ne'maisaya kava'apimo alagi hano hugiya'monanafa ina lagimo nagaetefe'mo alagepa hu'a ne'maisaya kava'apimo atale'nisafige'a alagepa hu'a maisaya kava'apimo aligae. <sup>25</sup> Mago vekamo'a muki ma mopafi'mo hane'nisiya ya'amo alino hano huno ali'nisiyana alino ago'ya lagauge auneme'amo lageso huge hisiyana akamelegati mago'e ya'mo afa'a ali'nifiye. Ha'ao alagi o'ali'niye. <sup>26</sup> Ina lagimo nagae'e ge'nile'efe'mo apavagage nehisifigeno Vemo Mafa'nemo'a ha le konali ya'amo Afo'amotegati'mo ali'niya ha le konali ya'amo aliteno apaote enisole vaya'ai ha le konali ya'api'e enisole vaya'a'e'mo emineno'ae'mo apakaefe'mo avagage hugiye. <sup>27</sup> Lama gemo lapa nepauve, Manile he ti'a mai'naya vayapati'mo mago vaya'mo ofali'a afa'a mai'ne'apae'mo Goti'a yagaino apatesiya kava'mo afole aisige'a agegae.

*Ge'amo ne'afiya vaya'mogi Yesu ha le konali  
ya'amo age'naya gemae  
(Mt 17:1-13; Mk 9:2-13)*



28 Magoke salemo utegeni Pita'agi Yoni'agi Yemisi'agi huno apavalelino nunumu hisiyafe'mo mago avefi'mo hai'niye. 29 Nunumu nehigeno'ae'mo aeto agufa augosamo alino ha male'nigeno kukena'alegati'mo alave alave'age'mo huteno yaveyave'ageke'mo hu'niye. 30 Lole vekala'mo akeya'vilaga vekala'mo Mosese'e Ilaiya'e'mo afole aite'ana 31 ha le konali ya'a'e'mo mai'ne'anae'mo Yulusalemu taonifi'mo uno falisiya kavafe'mo Yesugi'e'mo ge huge afige hu'ana mai'na'ae. 32 Pita'e anakae'e'mo apau mai'mai hu'nige'a apau'mo kale'ne'a apaupati'mo age'a ayake'a agayana Yesu ha le konali ya'amo'a aeno ha le'nige'a age'nae. Agete'a apakayana Yesu'e'mo magokepi he ti'ana mai'na'a vekala'e'mo mai'nage'a apake'nae. 33 Lole vekala'mo atale'ana ne'va'ageno'ae'mo Pita'a Yesufe'mo, Tisao, kanalenageta manile maigune. Lole'e mago'e yege no'mo kigune. Kagae no'mo kite Mosese no'mo kite Ilaiya no'mo kite huteta manile'mo maigune, huno ha pai'niya'monanafa na agufa gemo nehufi huno agesa o'afi'niye. 34 Ani gemo nehigeno'ae'mo mago hiya'mo'a yege aulagale'mo kino ati kae'nige'apae'mo hiyapi'mo mai'ne'apae'mo koli hu'nae. 35 Ani hiyapati'mo mago gemo huno'ae'mo, Nahau nayamopafi'mo nahau'niya mafa'ne'nimo mai'nigi ge'amo afiyo, huno nehige'apae'mo 36 agayana Yesu'a agai'age'mo mai'nige'a age'nae. Ani afinateti'mo age'naya kavafe'mo ava gemo hu'a hapa opai'nae.

*Yesu'a mago mafa'nemo alino alagepa huno ate'niya gemae*

*(Mt 17:14-21; Mk 9:14-29)*

<sup>37</sup> Egamo avefati'mo emine ne'lege'apae'mo muki vaya'e'mo e'a fotu hu'nae. <sup>38</sup> Ani vayapati'mo mago vekamo'a, Tisao, kahao ke hovanagi, ago, magoke mafa'ne'nimo mai'niye. <sup>39</sup> Hosu aune vekamo'a atafau'nigeno kagegage huteno atete nehigeno avanumo'mo halo halo nehigeno amagino ateno ne'vigeno'ae'mo managi lami managa lami nehiye. <sup>40</sup> Nagaemo gekamo ne'afiya vaya'aife'mo, ani hosu aune vekamo alita hafaitalegeno vino, hu'na hapa pai'novana afa'a ali'a hafai'a atalesaya kava'mo afa'a osu'nae, huno ha pai'nigeno <sup>41</sup> Yesu'a, hemeni afina'mo mai'naya vaya'mogitapae, lapakesa afitapa fatago nosageno'ae'mo hosu lapaipa lapakesa hane'niya kavafe'mo lusi kava huno alaga ne'nahaegi na magi afina'mo lapakae'e'mo mago'e hu'na lokae'na maima maima ne'visugetapae'mo afitapa alagepa hugae. Mafa'nekamo avalelika eno, huno ha pai'nigeno <sup>42</sup> avalelino ne'egen'ae'mo hosu aune vekamo'a alino ago'ya faino mopafi'mo atale'nigeno atete huno mai'niye. Yesu'a hosu aune vekamo alino hafaino ataleteno mafa'ne'amo alino alagepa huno ateteno afo'amo'mo avaleno ami'niye. <sup>43</sup> Muki vaya'mogi Goti ayamufa'a'e lokiya'a'e'mo agete'apae'mo hapau ai'nae. Inagi agaemo ge'amo ne'afiya vaya'aife'mo, <sup>44</sup> mani hemenimo hisuva gemo afitapa alagepa hu'netapa alita lapaipafi'mo maleyo. Mago vaya'mogi Vemo Mafa'nemo

avaleli u'a hosu vaya'ai apayapi'mo ategae, huno hapa pai'niyana ani gemo afi'a alagepa osu'nae. <sup>45</sup> Afi'a aeto osisayafe'mo huno fala kino hu'nige'apae'mo loka hu'a afi gesayafe'mo hu'nayana koli hute'a ge hu'a afi oke'nae.

*Lagaepati'mo ina la'mo hogote vekamo mai'niye, hu'a hute'a ge huge afige hu'naya gemae (Mt 18:1-5; Mk 9:33-37)*

<sup>46</sup> Ina la'mo lagaepati'mo aeno laga se'niya vekamo mai'niye, hu'a hute'a ge vai'nae.

<sup>47</sup> Yesu'a apaipafi'mo apakesa ne'afiya apakesa apaketenoe'mo mago aise mafa'nemo avalelino eno haupi'mo ateno mai'niye.

<sup>48</sup> Apakaefe'mo, ina lagimo nagaetefe'mo mani magufa aise mafa'nemo ali'a falu fala hu'a ne'atesafi ani kava hu'a ali'a falu fala hu'a ne'natae. Ina lagimo ali'a falu fala hu'a ne'natafi ani kava hu'a alino nate'nige'na emi'ne'nova veka'e'mo ali'a falu fala hu'a ne'atae. Lapakaepati'mo mago henaga

mai'nisiya vekamo'a hogote vekamo maigiye, huno hapa pai'niye. <sup>49</sup> Yoni'a, age'nonana mago vekamo'a kagikaleti'mo hosu apaune vaya'mo alino hapafaino apatale'nigeta age'none. Agaemo ani kava'mo nehiyana lakame huno umenitata nosiya'mofe'mo ani kava'mo osuka afa'a ataleka maiyo, huta ha pai'none, huno ha pai'nigeno <sup>50</sup> Yesu'a, hutapa atafautapa o'ateyo. Mago vekamo kametimo o'mai'nisiyana lao vekamo mai'niye, huno ha pai'niye.

*Samaliya kotega vaya'mogi Yesu'mo ali'a fala fala hu'a o'ate'naya gemae*

<sup>51</sup> Goti'a Yesu'mo koku'napi avalelino uno haisiya afina'mo ago eno hogo hu'nigeno'ae'mo Yesu'a lokiya vaino agesa afino'ae'mo, Yulusalemu taonifi'mo haiguve, huno agesa afitenno'ae'mo <sup>52</sup> mago apa vaya'mo alino apate'nige'apae'mo Samaliya vaya'ai taonifi'mo u'a alo hu'a atesayafe'mo u'a hogote'nae. <sup>53</sup> U'naya'monanafa Samaliya vaya'mogi, Yulusalemu kotegamo ugefe nehiya'mofe'mo lagaemo alita falu fala huta o'ategaune, hu'a hapa pai'nage'apae'mo atale'a halate ai'a atagi ne'a e'nae. <sup>54</sup> Ge'amo ne'afi'a vekala'mo Yemisi'e Yoni'e'mo ani gemo afite'anae'mo, Ala kava nene, Ilaiya'a hogoteno hu'niya agufa kava'mo huta'a koku'napife'mo atae'mo ge hisu'ageno emineno leno apasaga lisiyafe'mo kahau'nifiye, hu'ana afi ge'na'ageno <sup>55</sup> aino afe le'nenno'ae'mo, na agufa la'aunela'ame'mo mai'nifi, hutana o'age'na'ae. Vemo Mafa'nemo'mo vaya'mo apamagisiyafe'mo emi'no'me'nifa vaya'ai apakufamo alino katino apatesiyafe'mo emine'niye, huno ge hanau'niye. <sup>56</sup> Atale'a alu taonifi'mo u'nae.

*Yesu'a akame hu'a visaya kavafe'mo hu'niya gema*

*(Mt 8:19-22)*

<sup>57</sup> Kate'mo ne'vageno'ae'mo mago vekamo'a eno Yesufe'mo, muki visana kotegamo kakame hu'na umenitata huguve, huno ha pai'nigeno <sup>58</sup> Yesu'a, yagagafa'e namamogi'e'mo apano'mo hane'niya'monanafa Vemo Mafa'nemo'a havaesiya no'mo ohane'niye, huno ha

pai'niye. <sup>59</sup> Alu vekae'mo, eka nakame huvo, huno ha pai'nigeno'ae'mo, Ala kava nene, he kanalene huka huge'nao hogote'na afo'nimo'mo u'na ali'na ki'na atete'nae, huno ha pai'nigeno'ae'mo, <sup>60</sup> afa ato, fali kavategamo ne'maiya vaya'mogimo falisaya vaya'apimo ali'a ki'a apatesaya kava'mo hane'niye. Kagaemo apatalekuka Goti'a yagaino ne'apateya kavafe'mo ava gemo aeka hakalo huka hapa paiyo, huno ha pai'niye. <sup>61</sup> Alu vekamo'a, Ala kava nene, kakame hu'na umenitata hisuvafe'mo hogote'na u'na no'nifi'mo mai'naya vaya'mo naya'mo apami'na ali'na falu fala hu'na apatete'na apatale'na visuvafe'mo he kanalene huka huge'nao, huno ha pai'nigeno <sup>62</sup> Yesu'a, mago vekamo'a pulumakamo'mo ai'yumo aisiyafe'mo aeni kayote'mo atafau'nen'ae'mo aino afe leno akamelegamo ne'agesiya vekamo'mo Goti'a yagaino ne'apateya kegiyafi'mo afa'a ohaigiye, huno ha pai'niye.

## 10

*Yesu'a seveti'a vaya'mo alino apate'nige'a u'naya gema*

<sup>1</sup> Ala kava ne'mo'a seveti'a vaya'mo lekana paino apateteno lole vekala'mo alino lokaeno anatete anatete huteno'ae'mo, muki visuva taoni'afi'e kotega'e'mo utapa hogonetege'na vino. <sup>2</sup> Hoyafati'mo ne'ya'mo ago afu le'niyana alisaya vaya'mo aise'amo mai'naya'mofe'mo hoyo aepa vekae'mo, hoyakafati'mo ne'ya'mo

alisaya vaya'mo alika apatege'a viyo, hutapa nunumu'mo hiyo. <sup>3</sup> Viyo, hu'na hute'na ali'na lapatesugetapa visayategamo aikeli sipisipigana hutapa afela kalamo mai'nayategamo ugae. <sup>4</sup> Lapakaemo hanipausitapigi kutapigi sutapigi hutapa o'alitapa afa'a viyo. Kategamo ne'utapae'mo ge apamamaesayafe'mo o'maitapa viyo. <sup>5</sup> Utaapa haisaya nopi'mo mai'nisaya vaya'aife'mo, lapaipamo'mo falu hino, hutapa hapa paiyo. <sup>6</sup> Aipamo'mo falu nehisiya vekamo mai'nisiyana afa'a aipamo'mo falu hu'nisigeno maigiye. Aipamo'mo falu nosisiya vekamo mai'nisiyana getapimo'a ha o'maesigeno afa yatega asagauno aigiye. <sup>7</sup> Alu nopi alu nopi'mo uteta osutapa haisaya nopike'mo maiyo. Ali'ya'mo ne'aliya vaya'mogi miya'apimo alagi alisaya vaya'mo mai'naya'mofe'mo lapamisaya ne'ya'e ani'e'mo alitapa neyo. <sup>8</sup> Visaya taonifi'mo mai'nisaya vaya'mogimo ali'a falu fala hu'a lapatesagetapae'mo mai'netapa ne'ya'mo lapamisaya ya'mo afa'a alita neyo. <sup>9</sup> Kaita hapau'nisiya vaya'mo alitapa hapagetapa apatetetapae'mo, Goti'a yagaino ne'apateya kava'mo lapaopale'mo ago e'niye, hutapa hapa paiyo. <sup>10</sup> Visaya taonifi'mo mai'nisaya vaya'mogimo ali'a falu fala hu'a olapatesagetapae'mo taoni'apifi kate'mo utapa he titapa mai'netapae'mo, <sup>11</sup> lapakaetegamo faigoko gemo hanesiyafe'mo apakae taonifi'mo lapaiyalegati'mo mumusopamo alitapa kalo paetaletapa ugae. Afiyo, Goti'a yagaino ne'apateya kava'mo lapaopale'mo ago

afole ai'niya'monanafa o'age'nae, hutapa hapa paiyo. <sup>12</sup> Lapa nepauve, Goti'a agoti huno apatesiya afina'mo Sotomi taonifi'mo mai'naya vaya'mogimo mago hosu ya'mo aligaya'monanafa mani taonifi'mo mai'naya vaya'mogi mago'e hu'a hosu ya'mo aligae.

*Mago taonifi'mo mai'naya vaya'mogi apakesa afi'a fatago osu'naya vaya'aife'mo hu'niya gemae (Mt 11:20-24)*

<sup>13</sup> Kolasini taonifi mai'naya vayanagi Metasaita taonifi mai'naya vayanagi vaehae. Mago vekamo'a uno Taiya taonifi'e Saitoni taonifi'e'mo no'agaya agufa aune kava'mo lapakaetegamo hu'nova agufa aune kava'mo hu'niesinana apakaemo akeya'vilaga ago apaipamo ali'a afe lete'apae'mo kogu a'nemogi ali'a ne'vaiya agufa kukenamo ali'a vaite'a hapamo faletale'a mai'naesine. <sup>14</sup> Mai'naesina'mofe'mo agoti huno apatesiya afina'mo Taiya taonifi mai'naya vaya'e Saitoni taonifi mai'naya vaya'e'mo aise kayo'mo aligaya'monanafa lapakaemo alopa kayo'mo aligae. <sup>15</sup> Kapeneyamu taonifi vaya'mogitapae, lapavaleno alino anale lapate'niyanageno alino afepi lapateteno ata kopi'mo alino lapategaiye. <sup>16</sup> Ge'amo ne'afiya vaya'aife'mo, getapimo ne'afiya kava hu'a ge'nimo ne'afiye. Apakame'ya nelapamiya kava hu'a apakame'yamo ne'namiye. Apakame'ya ne'namiya kava hu'a alino nate'nige'na emi'ne'nova veka'e'mo apakame'ya ne'amiye, huno hapa paiteno alino apate'nige'a u'nae.

*Ge'amo ne'afiya vaya'mo atagi ne'a e'naya gemae*

<sup>17</sup> Seveti'a vaya'mo atagi ne'a Yesutegamo e'apae'mo apamogaga aite'apae'mo, Ala kava nene, kagikale'mo ne'aetae'mo hosu apaune vaya'aife'mo hiyo huta hu'nona gemo afi'nae, hu'a ha pai'nageno'ae'mo, <sup>18</sup> agovana Satani'mo koku'napati'mo alino alave nehiya yakana huno asagauno ne'aige'na age'nove. <sup>19</sup> Afiyo, nagalo'yave'e sokopiyoni'e'mo lapaiyaleti'mo aetapa latapaisayafe'mo himamu'nimo ali'na lapami'nove. Kame vayatapimogi himamu'apimo aetapa apaka sesayafe'mo himamu'nimo ali'na lapami'novanage'a muki vaya'mogi afa'a olahapaegae. <sup>20</sup> Himamu'nimo ago ali'naya'mofe'mo hosu apaune vaya'mogi getapimo afi'naya kavafeke'mo lapamogaga o'aitapa Goti'a koku'napi hane'niya mukufi'mo lapakitapimo ago avo'mo kae male'niya kavafeke'mo lapamogaga aiyo, huno hapa pai'niye.

*Yesu'a Gotife'mo amogaga ai'niya kavafe'mo hu'niya gemae*

*(Mt 11:25-27; 13:16-17)*

<sup>21</sup> Ani afina'mo Yesu'a Aote Auneme'aleti'mo aipafi'mo amogaga ne'aino'ae'mo, Afo, koku'nate'e ma mopale'e'mo yagaika ne'anatana vekamae. Kagaemo afite'a age'naya vaya'mogimo o'afisayafe'mo mani kava'mo alika fala ki male'nana'monanafa mafa'negana hu'a ne'maiya vaya'mo alika apave li'nana kavatefe'mo kahao ke nehove. He, Afo, kahau'nigekae'mo, afole aiyo,



huka hu'nane, huno nunumu hu'niye.  
<sup>22</sup> Huteno'ae'mo, Afo'nimo'mo muki yate'e  
vaya'aite'e'mo yagaisuvafe'mo alino nate'niye.  
Muki vaya'mogimo mafa'ne'amo o'age'nafa  
afo'amoke'mo age'niye. Ani kava hu'a  
vaya'mogimo muki ya'mo Afo'amo'mo  
o'age'nafa mafa'ne'amoke'mo age'niye.  
Ani kava huno mafa'ne'amo'a lekana  
paino apate'nisiya vaya'mo alino apave  
lisige'apae'mo muki ya'mo Afo'amo'mo agegae,  
huno hapa pai'niye. <sup>23</sup> Apakai'apige'mo  
mai'ne'apae'mo Yesu'a aino afe leno ge'amo  
ne'afiya vaya'aife'mo, lapakaemo age'naya  
agufa kava'mo hu'a age'nisaya vaya'mogi  
Goti aulagale'mo alagepa hu'a mai'nayanage'a  
afa'a apamogaga aigae. <sup>24</sup> Lapa pai'nae'mo,  
hogote'a muki vaya'mo Gotitegati gemo alini  
e'a ae'a hakalo hu'a hapa nepaiya vaya'e muki  
vaya'mo ala'apimo mai'ne'a yagai'a ne'apataya  
vaya'mogi'e'mo lapakaemo ne'agaya agufa  
kava'mo agesayafe'mo hu'nayana o'age'nae.  
Lapakaemo ne'afiya agufa gemo afisayafe'mo  
hu'nayana o'afi'nae, huno hapa pai'niye.

*Samaliya vekamo'a kame'amo ha mae'niya  
gema*

<sup>25</sup> Mago ke'aepa gemo ne'afiya vekamo'a  
Yesu'mo amalageka hisiyafe'mo he tino, Ti-  
sao, alagepa hu'na maige maige hu'na maisu-  
vafe'mo na agufa kava'mo hisuve, huno afi  
ge'nigeno'ae'mo, <sup>26</sup> ago avo'mo kae male'niya  
ke'aepa gemo'a na agufa gemo hu'niye. Lekana

pai'nana gemo'mo na yane hu'niye, huno afi ge'nigeno'ae'mo,

<sup>27</sup> Ala kava ne'mo Gotikamofeke'mo muki kaipafatinagi muki kaunekamepatinagi muki himamukafatinagi muki kagesa ne'afina yapatinagi huka kahau kayamopafi'mo kahaino. Kagaikae'mo kahau kayamopafi'mo kahau'niya kava huka kahaopale'mo mai'naya vaya'aife'mo kahaino,

huno ha pai'nigeno'ae'mo, <sup>28</sup> he, lama gemo nehane. Ani kava'mo huka maima maima uvo alagepa huka maige maige huka maisana ya'mo aligananagi, huno ha pai'nigeno <sup>29</sup> agaemo av-agage osisigeno agi'amo alagepa huno hane-siyafe'mo Yesufe'mo, nahaopale'mo mai'niya vekamo ina la'ae, huno afi ge'niye.

<sup>30</sup> Yesu'a, mago vekamo Yulusalemu taonifati'mo eno Yeliko taonifi'mo lamisiyafe'mo e'niye. Kategamo ne'vige'apae'mo kumaya alisayafe'mo ne'apamagiya vaya'mogi e'a atafau'a kukena'amo asagi'a alite'a amagi'a ate'a u'nageno faligefe'mo hu'niye. <sup>31</sup> Ani afina'mo mago vekamo mono huno ne'apateya vekamo ani kate'mo uno ageteno ka agi'nalegati'mo aino kalaeno u'niye. <sup>32</sup> Ani kava huno mago Livai nofi vekamo mono ali'yate'mo mai'niya vekamo eno ageteno ka agi'nalegati'mo aino kalaeno u'niye. <sup>33</sup> Agege'ana atale'ana u'na'a'monanafa mago Samaliya vekamo'mo eno ageteno'ae'mo hau huno ateteno <sup>34</sup> uno amagi'naya amute'mo uveli'e nofi alagafati aniteti'e'mo alino lakino faleno ateteno hayaeno

ateteno noki afu'amo agotofule'mo asagauno faino ateteno avalelineno nata vaya'mo e'a nehavaya nopi'mo ate'neni yagaino ate'niye. <sup>35</sup> Ega'amo monimo alino ani e'a nehavaya note'mo ne'yagaiya vekamo amiteni'ae'mo, alagepa huka yagaika ato. Henaga'amo, mago'e monimo aliguve, huka hisana'mo'mo esuva afina'mo kamiguve, huno ha pai'niye, huno Yesu'a ani vekae'mo, <sup>36</sup> lole'e mago'e vayapati'mo kumaya vaya'mogi amagi'naya vekamo haopale'mo mai'niya vekamo haiya vekae, huno afi ge'nigeni'ae'mo, <sup>37</sup> hau huno ate'niya vekae, huno ha pai'nigeni'ae'mo, uka ani agufa kava'mo huvo, huno ha pai'niye.

*Yesu'a Mata'e Maliya'e'mo no'anifi'mo haino mai'niya gema'e*

<sup>38</sup> Henaga'amo Yesu'e ge'amo ne'afiya vaya'e'mo Yulusalemu taonifi'mo ugefe'mo ne'u'apae'mo mago taonifi'mo u'a ava'yi nehageni'ae'mo mago a'mo agi'amo Mata'a alino falu fala huno ateteno no'afi'mo avalelino hai'niye. <sup>39</sup> Yesu'a haino mai'nigeni'ae'mo Mata agana'amo'mo Maliya'a Yesu aiyafi'mo mai'neni hu'niya gemo afi'niye. <sup>40</sup> Afi'niya'monanafa Mata'a lusi ne'ya'mo yagita hisiyafe'mo agesa afi'neni'ae'mo hau'e hau'e huteno eno Yesufe'mo, Ala kava nene, nagana'nimo'mo natale'nige'na nagai'nige'mo ali'ya'mo ne'aluva kavafe'mo kagesa no'afipiye. Uka atokamo'mo ha'mao, huka ha paiyo, huno ha pai'nigeni'ae'mo, <sup>41</sup> Matao, Matao, muki kavafe'mo kagesa ala'amo ne'afinageno

kaipamo'mo atete nehiya'monanafa alagepa huka maisanafe'mo magoke alisana ya'mo hane'niye. <sup>42</sup> Maliya'a ani alagepa yafeke'mo agesa afiteno lekana paino ali'niya'mofe'mo mago vekamo'a ayapati'mo alino hafaleno o'atalegaiye, huno ha pai'niye.

## 11

*Yesu'a nunumu hisaya kavafe'mo hu'niya gemaē*

*(Mt 6:9-15; 7:7-11)*

<sup>1</sup> Yesu'a nunumu huno hano huteno mai'nigeno'ae'mo mago vekamo ge'amo ne'afiya vekamo'a, Ala kava nene, Yoni'a nunumu hisayafe'mo ge'amo ne'afiya vaya'aina alino apaya male'niya kava huka alika laya malo, huno ha pai'nigeno'ae'mo, <sup>2</sup> nunumu hisayafe'mo ina gemo hutapa hiyo.

Afotimogae, koku'napi mai'nanageno kagikamo'mo alagepa huno kaote hane'niyanagi ali'a asaga hiyo. Vaya'aite'mo yagaika apatesana kava'mo ma mopafi'mo afole aino. Muki koku'napi ne'maiya vaya'mogimo gekamo akame nehaya kava hu'a ma mopafi'mo mai'naya vaya'mogimo gekamo akame hiyo. <sup>3</sup> Muki feluga'ae feluga'ae'mo nesuna ne'ya'mo hemenimo alika lamiyo. <sup>4</sup> Lagaetegamo hosu kava'mo nehaya vaya'aife'mo, afa'a ateyo, huta nehuna agufa gemo huka kagaetegamo hosu kava'mo nehisunagekae'mo lagaefe'mo, afa ateyo, huka huvo. Lamalageka

hisiyategamo lavalelikuka olateka hosu  
vekamo ayapati'mo alika hafaleka latalo,  
hutapa nunumu'mo hiyo.

5-6 Yesu'a apakaefe'mo, lapakaepati'mo  
mago vekamogamo hani'ilaga folagu'mo  
uka kao vekae'mo, Ve'nimo, nao vekamo  
eno no'nifi'mo mai'niyana ne'ya'mo nesiya  
ya'mo alagi ohane'nigi lole'e mago'e peleti  
mayamo alika anona huka nato, huka ha  
paisanageno'ae'mo <sup>7</sup> no'afati'mo, ago kita  
ki maleta mafa'ne anaga'ni'e nagai'ni'e'mo  
ago havae'nona'mofe'mo he ti'na ne'ya'mo  
ali'na okamiguvanagi afa'a ateka uvo, huno  
kaha paisiyana na agufa kava'mo hugane.  
<sup>8</sup> Lapa nepauve, kao vekamo mai'niya'mofe'mo  
ali'na okamiguve, huno nehisiagekae'mo  
mago'e mago'e huka ge hukae'mo, afa'a  
alika namiyo, huka ge nehisanageno'ae'mo  
ne'ya'mo alino kamigiye, huno hapa pai'niye.  
<sup>9</sup> Inagi nagaemo, afa'a afi nekegeno'ao alino  
lapamigiyanagi. Kahauya hutaleyo agetapa  
avatetapa aligayanagi. Kitale'mo hakalu hakalu  
nehigeno'ao kitamo yakino lapategaiyanagi.  
<sup>10</sup> Ge hu'a afi nekaya vaya'mogimo ne'aliye.  
Kahauya nehaya vaya'mogi age'a ne'aliye.  
Kitale'mo hakalu hakalu nehaya vaya'mo kitamo  
yakino ne'apate. <sup>11</sup> Mafa'netapimogi, noyamemo  
alika namiyo, hu'a lapa paisagetapae'mo  
nagalo'yavemo alitapa apamigafiye. <sup>12</sup> Inagi  
mafa'netapimogi, kokole amu'mo alika namiyo,  
hu'a lapa paisagetapae'mo sokopiyonimo  
alitapa apamigafiye. <sup>13</sup> Lapakaemo hosu

vaya'mo mai'naya'monanafa alagepa ya'mo alitapa mafa'netapimo ne'apamiya kava huno mago'e huno koku'napi afotapimofe'mo kaote Kaunekame'mo alika namiyo, hu'a afi gesaya vaya'aina afa'a alino apamigiye, huno hapa pai'niye.

*Yesufe'mo, Satani himamu'aleti'mo ani agufa ali'ya'mo ne'aliye, hu'a hute'a hu'a faipa hu'a ate'naya gema*

*(Mt 12:22-30; Mk 3:20-27)*

<sup>14</sup> Yesu'a gemo aino halo aino nosiya vekamo aipafati'mo mago hosu aune vekamo alino hafaitalegeno u'nigeno ani vekamo'a agemo ai'nige'a afite'apae'mo hapau ai'naya'monanafa <sup>15</sup> mago vaya'mogimo, Mielisimuli himamu'aleti'mo hosu apaune vaya'aina alino hapa faino ne'apatale, hu'a hu'nage'apae'mo <sup>16</sup> mago vaya'mogi, koku'napi aune kava'mo huka alika lave liyo, hu'a ha pai'nageno'ae'mo <sup>17</sup> apaipafi'mo apakesa afi'naya kava'apimo ageteno'ae'mo, magoke gamani vaya'mogi yagai'a ne'apataya vaya'mogimo apakai'apimo ali'a fako hu'a apatete'a kame hisayana ani gamanimo ago asagauno aigiye. Magoke afamo anagapati'mo apakai'apimo ali'a fako hu'a apate'nisayana atagu fae'a u'e'a hu'a maisageno apaki ohanegaiye. <sup>18</sup> Lapakaemo nagaefe'mo, Mielisimuli himamu'aleti'mo hosu apaune vaya'aina alino hapafaino ne'apatale, hutapa nehaya'monanafa Satani'a agai'a vaya'mo hosu apaune vaya'aitegamo kame huno

apatesiyana haiya kava hu'a Satani nofi vaya'mo lokiya vai'a maigae. <sup>19</sup> Nagaemo Mielisimuli himamu'aleti'mo hosu apaune vaya'mo ali'na hapafai'na ne'apatalesuvana haiya kava hu'a getapimo ne'afiya vaya'mogi ali'a hapafai'a ne'apatalae. Getapimo ne'afiya vaya'mogimo lapakaefe'mo, hosu gemo hu'nae, hu'a lapa paigae. <sup>20</sup> Nagaemo Goti'a ati yagaina ayateti'mo hosu apaune vaya'mo ali'na hapafai'na ne'apatalesuvana Goti'a yagaino ne'apateya kava'mo ago eno lapaopale'mo afole ai'niye. <sup>21</sup> Mago ayamufa vekamo'a ati'e naipe'a'e'mo aliteno no'ale'mo yagaino mai'nisiyana kagemi ya'amo afa'a hanegaiya'monanafa <sup>22</sup> mago no aepa vekamo ayamufamo ago aeno aga se'niya vekamo'mo eno no aepa vekamo amagino aeno aga seteno muki ya'amo'a naha maegaiye, huno agesa afi'niya ya'amo alige muki kagemi ya'amo alige hulinuno ao vaya'aina alino fako huno apamigiye. <sup>23</sup> Nao vaya'mo o'mai'nisayana kame vaya'nimo mai'nae. Nagae sipisipimo ali'a anupa hu'a no'apataya vaya'mogimo ali'a atagu fae'a ne'apatalae.

*Hosu aune vekamo halate aino atagi neno e'niya gemae*  
(Mt 12:43-45)

<sup>24</sup> Hosu aune vekamo mago vekamo aipafati'mo alino hafaitalegeno ataleno u'niya hosu aune vekamo'a ani'mo ohane'niya kote'mo uteno maino falu hisiya yafe'mo kahauya hulino uneno hugeteno o'ageno atale'na halate ai'na atagi ne'na u'na no'nifi'mo fale'na

hai'na maiguve, huno hu'niye. <sup>25</sup> Huteno eno ageyana ani nopi'mo vagi vagi huno alino kanale hu male'nigeno afa'a hane'nigeno age maleteno <sup>26</sup> aino atagineno uno seveni'a hosu apaune vaya'mogi mago'e hu'a ae'a aga se'a hosu kava'mo nehaya hosu apaune vaya'mo apavalelino e'nige'apae'mo ani nopi'mo hai'a mai'nae. Hosu aune vekamo aipafi'mo mai'niya vekamo'a hogoteno hosu kava'mo huno mai'niya'monanafa henaga'amo mago'e huno lusi hosu kava'mo huno mai'niye, huno hapa pai'niye. <sup>27</sup> Mago a kanomo asole vaya'ai folagapi'mo mai'niya a kanomo'mo alopa gefati'mo ge huno'ae'mo, alino kateteno nu'mo kami'niya afe'mo Goti'a hao ke he'nigeno alagepa huno ne'maiye, huno hu'nigeno <sup>28</sup> Yesu'a, lama gemo nehana'monanafa Goti ge'amo afite'a akame nehaya vaya'aife'mo hapao ke nehege'a alagepa hu'a ne'maiye, huno ha pai'niye.

*Mago vaya'mogi alagena kava'mo alika lave liyo, hu'a hu'naya gemae*

*(Mt 12:38-42; Mk 8:12)*

<sup>29</sup> Asole vaya'mo e'a kili pae'a mai'nageno'ae'mo, hemeni afina'mo mai'naya vaya'mo hosu vayane. Apakaemo, alagena kava'mo huka alika lave liyo, hu'a nehaya'monanafa ali'na apave oliguve. Alagena kava'mo hu'na ali'na apave oliguva'monanafa Yona'a Gotitegati gemo alinineno aeno hakalo huno hapa nepaiya vekamo'a mago alagena kavakana huno afole ai'niya kava hu'na ali'na



apave liguve. <sup>30</sup> Yona'a Niniva taonifi'mo mai'naya vaya'ai apaulagale'mo alagena kavakana huno afole ai'niya kava huno Vemo Mafa'nemo'a hemeni afina'mo mai'naya vaya'ai apaulagale'mo alagena kavakana huno afole aigiye. <sup>31</sup> Goti'a agoti huno apatesiya afina'mo Si'ma kotegamo mai'naya vaya'aite'mo yagaino ne'apateya ala a kanomo'mo he tino hemeni afina'mo mai'naya vaya'aife'mo, hosu vayane, huno hapa paigiye. Ani a kanomo'mo Salomoni'a alagepa huno afi'niya vekamo ge'amo afisiyafe'mo afagitegati'mo e'niya'monanafa Salomoni'mo ago aeno aga se'niya vekamo manile'mo mai'niyana ge'amo alagepa hu'a no'afiye. <sup>32</sup> Goti'a agoti huno apatesiya afina'mo Niniva taonifi'mo mai'naya vaya'mogi he ti'a hemeni afina'mo mai'naya vaya'aife'mo, hosu vayane, hu'a hapa paigae. Yona'a Goti gemo aeno hakalo huno hapa pai'nige'apae'mo apaipamo ali'a afe le'naya'monanafa Yona'mo ago aeno aga se'niya vekamo manile'mo mai'niya vekamo ge'amo alagepa hu'a no'afiye.

*Apaipafi lamue'mo hu'niya gemae*

*(Mt 5:15; 6:22-23)*

<sup>33</sup> Vaya'mogi lamufi'mo kani ae'a kaete'apae'mo hipakapi'mo o'malege samofi'mo malete'a avayamo ai'a akani malege nosafa nopi'mo hai esaya vaya'mogimo alagepa hu'a age'a hale'a maisayafe'mo afole yate'mo hi'yalamuteke'mo ne'malae. <sup>34</sup> Lapaulagamo'mo aeno ha nelegeno'ae'mo lapaipafi'mo lamugana huno aeno ha nele. Lapaulagamo alagepa huno

nehanesiyana muki lapaipafi'e'mo aeno ha nele. Lapaulagamo alagepa huno nohanesiyana muki lapaipafi'e'mo hani'mo nehiye. <sup>35</sup> Ehetapiye, hu'na, Naipafi'mo aeno ha nelefi aeno ha nolefi hutapa lapakesa afiyo. <sup>36</sup> Lapaipafi'mo aeno ha le'nisiya'mo'mo magokayaga lapaopale'mo hani ya'mo ohanesigeno muki lapakufafilagamo aeno ha lesigeno lamumo'mo lapakufale'mo aeno ha neleya kava huno aeno ha legaiye, huno hapa pai'niye.

*Mono vaya'ai hosu kava'apie'mo hu'niya gema*

*(Mt 23:1-36; Mk 12:38-40)*

<sup>37</sup> Ani gemo huno hano hutegenoa'e'mo mago Falasi vekamo'a, eka no'nifi'mo ne'ya'mo no, huno ha pai'nigeno eno no'afi'mo haino hi'yalamute'mo fai mai'niye. <sup>38</sup> Yesu'a ne'ya'mo nesiyafe'mo mono kava'mo akame huno aya'mo sese osu'nigeno'a'e'mo Falasi vekamo'a ageteno'a'e'mo hau ai'niye. <sup>39</sup> Ala kava ne'mo'a, Falasi vaya'mogitapamo kapu agotofu'alega'e yuvapa agotofu'alega'e'mo sese nehaya'monanafa lapaipafi'mo lapa'ye nehiya kava'e hosu kavatapi'e'mo havai te'niye. <sup>40</sup> Negi vayane, Goti'a amega apakufamo alo hu'niya vekamo'a apaku'afi'e'mo alo osu'nifiye. <sup>41</sup> Lapakaemo agotofulega sese nehaya'monanafa agu'afilaga hane'niya ya'e ya'e'mo alitapa kagemi ya'apimo ohane'niya vaya'aina apamigeno lapakaetefe'mo muki ya'mo alagepa huno haneno. <sup>42</sup> Falasi vaya'mogitapae, vaehae, lapakaetegamo aiye

aiye avovo kava'mo afole aigiyanagi. Lapakaemo kifenagi atunagi hefigi hutapa alita fako hutapa ofalinimo ne'amiyana fatago kava'mo osutapa Gotife'mo lapau lapayamopafi'mo nolapaiye. Goti'a ofalinimo ne'amiya kava'mo kanale kava'mo hane'niyanagi mago'e kava'mo hutapa fatago kava'mo hutetapa Gotife'mo lapau lapayamopafi'mo lapaino. <sup>43</sup> Falasi vaya'mogitapae, eheta piye, lapakaetegamo aye aye avovo kava'mo afole aigiyanagi. Mono nopi'mo hogote vaya'mogi ne'maiya siate'mo maisayafeke'mo lapau'niye. Maketi kumate'mo ge lapamamae'a ali'a falu fala hu'a lapatesayafeke'mo lapau'niye. <sup>44</sup> Ke'aepa gemo avo'mo kaetapa alita apaya ne'malaya vayanagi Falasi vayanagi hutapa aeta ati nekaya vayanagi vaehae, lapakaetegamo aye aye avovo kava'mo afole aigiyanagi. Lapakaemo fali'nage'a ki'a apate'naya vaya'ai keligana hutapa mai'nae. Vaya'mo keli avayale'mo u'e'a nehu'apae'mo, kefa'amo hane'niye, hu'a no'agae, huno hapa pai'niye. <sup>45</sup> Mago ke'aepa gemo afi'niya vekamo'a, Tisao, lagae'efe'mo hosu vaya'mo mai'nae, huka nehane, huno ha pai'nigeno'ae'mo, <sup>46</sup> vaehae, hu'na, ke'aepa gemo afi'naya vaya'aitega'e'mo aye aye avovo kava'mo afole aigiye. Lapakaemo vaya'aina kana hu'niya ali'ya'mo alitapa ne'apamiya'monanafa magoke ati yagaina lapayateti'mo ali'ya'mo no'aliye. <sup>47</sup> Vaehae, hu'na, Lapakaetegamo aye aye avovo kava'mo afole aigiye. Lapakinago vaya'mo

Gotitegati gemo alini'e'a ae'a hakalo hu'a hapa nepaiya vaya'aina hapa'e'nagetapae'mo kanolu'apile'mo konali alitapa apate'nae.

<sup>48</sup> Hapa'e'nagetapa kanolu'apile'mo konali alitapa ne'apataya'monanafa lapakae'e lapakinago vaya'e'mo magoke agufa lapakesa ne'afiye. <sup>49</sup> Ani kavafe'mo Goti'a alagepa huno agesa afiteno age'niya vekamo'a, nagaemo ge'nimo alini'a u'a ae'a hakalo hu'a hapa nepaiya vaya'e apa vaya'e'mo ali'na apatesuge'a u'a mai'nisage'apae'mo kamiti apamagige apaini hu'a apatege hugae, huno hu'niye.

<sup>50</sup> Ma mopamo alo hu'niya afinateti'mo ma mopafi vaya'mogimo Gotitegati gemo alini'a e'a ae'a hakalo hu'a hapa nepaiya vaya'mo kamiti hapaeege hapaeege hu'a mai'nae. Goti'a hemeni afina'mo mai'naya vaya'mo ani hosu kavatefe'mo agoti huno apategaiye. <sup>51</sup> Hogote'a Evo'mo haete'a mago'e vaya'mo hapaeme hapaeme e'a henaga'amo Sekalaiyasi'a mono no kumate'mo hae'nae. He, lapa pai'nae'mo, Goti'a hemeni afina'mo mai'naya vaya'mo ani kavatefe'mo agoti huno apategaiye.

<sup>52</sup> Ke'aepa gemo ne'afiya vaya'mogitapae, vaehae, lapakaetegamo aiye aiye avovo kava'mo afole aigiyanagi. Lapakaemo alagepa gemo afisayafe'mo nopi ki'mo ago alinitutapa male'nae. Faletapa ohai'netapa fale'a haigefe'mo nehaya vaya'mo ka'mo akanitapa ne'apatae, huno hapa pai'niye. <sup>53</sup> Hapa paiteno ataleno ne'vige'apae'mo ke'aepa gemo avo'mo kae'a ali'a apaya ne'malaya vaya'e Falasi vaya'mogi'e'mo

ge'apileti'mo kame hu'a atete'a muki kavafe'mo loka hu'a afige afige hu'a mai'nae. <sup>54</sup> Agoti hu'a atesayafe'mo hosu gemo hisiya'ae'mae, hu'a hute'a ane'ai hanagigekana hu malete'a agava hu'a mai'ne'a afi'a yagai'a mai'nae.

## 12

*Ae'a ati nekaya kavafe'mo ehetapiye, huno hu'niya gema*

*(Mt 10:26-27)*

<sup>1</sup> Muki asole vaya'mo e'a ali'a anupa hu'a fai'a kili pae'a mai'nageno'ae'mo Yesu'a ge'amo ne'afiya vaya'aife'mo, Falasi vaya'ai peleti mayafi'mo aeno apafu neleya yafe'mo ae'a ati nekaya kavafe'mo ehetapiye. <sup>2</sup> Goti'a muki hu'a ae'a ati nekaya kava'mo alino afole aino apave ligiye. Muki kava'mo hu'a fala nekiya kava'mo muki vaya'ai apaulagale'mo afole aigiye. <sup>3</sup> Lapakaemo hanipi'mo nehaya gemo ha le'yategamo afole aisige'a afigae. Lapakaemo kitamo ki male'netapae'mo sumi gefati'mo nehaya gemo ali'a anupa hu'a mai'nisayate'mo ae'a hakalo hu'a hapa paisage'a afigae.

*Vaya'aife'mo koli osutapa Gotifeke'mo koli hiyo, huno hu'niya gema*

*(Mt 10:28-31)*

<sup>4</sup> Nao vaya'mogitapae, ma mopafi vaya'aife'mo koli osiyo. Afa'a lapaesagetapa faligaya'monanafa mago'e hu'a lapakafu kisiya ya'mo ali'a olapamigae. <sup>5</sup> Ina lafe'mo koli hisafige'na lapa paiguve. Afa'a lapaesigetapa falitesageno'ae'mo himamu'aleti'mo alino ata

kopi'mo yaga auno lapatalesiya nefeke'mo koli'amo hiyo. He, agaefeke'mo koli'amo hiyo, hu'na nehuve. <sup>6</sup> Vaya'mogimo naya magokayaga'a aise namamo lole asagefa monilateti'mo miya nefaiya'monanafa Goti'a ani agufa magoke namae'mo age kanino no'atale. <sup>7</sup> Nama anaga'mo ina agufa ya'mo mai'nagetapae'mo aeta apaka setapa mai'naya'mofe'mo Goti'a mago'e huno yagaino lapategaiyanagi koli osiyo. Goti'a lapayoka'mo magoke magoke huno lekana paino age'niye, huno hapa pai'niye.

*Yesu vaya'amo mai'none, hu'a ae'a hakalo hu'a hapa nepaiya kavafe'mo hu'niya gemae  
(Mt 10:32-33; 12:32; 10:19-20)*

<sup>8</sup> Nagaemo lapa pai'nae'mo, vaya'mogimo mago vaya'ai apaulagale'mo nagi'nimo aete'apae'mo Yesu'mo akame nehuve, hu'a ae'a hakalo hu'a hapa nepaisaya vaya'aife'mo Vemo Mafa'nemo'mo Goti enisole vaya'amogi apaulagale'mo vaya'nimo mai'nae, huno apaki'apimo aegaiye. <sup>9</sup> Vaya'mogimo mago vaya'ai apaulagale'mo nagi'nimo o'ae'a afa'a mai'nisaya vaya'aife'mo Goti enisole vaya'amogi apaulagale'mo vaya'nie, hu'na apaki'apimo o'ae'na afa'a maiguve. <sup>10</sup> Muki vaya'mogimo Vemo Mafa'nee'mo hu'a faipa hu'a atesaya vaya'ai hosu kava'apimo Goti'a afa'a alino atalegaiya'monanafa Aote Auneme'ae'mo hu'a faipa hu'a atesaya vaya'ai hosu kava'apimo alagi alino o'atalegaiye.

11 Vaya'mogimo agoti hu'a lapatesayafe'mo mono nopi'mofi yagai'a ne'apataya vaya'aitegamofi kanisole vaya'aitegamofi hu'a lapavaleli'a visagetapa he titapa mai'netapae'mo, na agufa gemo hugupi na agufa gemo huta ge'apile'mo aeta atagaina huta hapa paigupi, hutapa lapakesa afitetapa atete osiyo. 12 Aote Auneme'amo'mo ani afina'mo na agufa gemo hisafigeno alino lapaya malesigetapa afa'a hugae, huno hapa pai'niye.

*Negi nagi kagemi ya'e vekamo ava gemo hu'niya gemae*

13 Asole vayapati'mo mago vekamo'a, Tisao, afo'nimo'mo ago falitegeno muki kagemi ya'amo nepu'nimoke'mo ali'niye. Kagaemo ina gemo huka ha paiyo, kaganakamo'mo kagemi ya'mo alika fako huka amiyo, huka ha paiyo, huno ha pai'nigeno'ae'mo, 14 ina la'mo nagaefe'mo kagemi yatanimo alino fako huno lanamisiya vekae, huno lekana paino nate'niye, huno ha paiteno'ae'mo 15 muki vaya'aife'mo, lapakaemo kagemi yafe'mo lapa'ye hisiya kava'mo afole o'aisiyafe'mo ehe alagepa hutapa yagaitapa lapateyo. Lusi kagemi ya'mo ne'aliya kava'mo'a alagepa hu'a maisaya kava'mo aepa'amo ohane'niye, huno hapa paiteno 16 ani kavafe'mo huno aeno kalafefa gemo huno hapa paino'ae'mo, mago kagemi ya'e vekamo'a hoyafati'mo asole ne'ya'mo afole ai'niye. 17 Agaemo aipafi'mo agha afino'ae'mo, ne'ya'nimo malesuva noko'nimo ago kili pae'niya'mofe'mo nagaemo na agufa

kava'mo huguve. <sup>18</sup> Nagaemo ina kava'mo huguve. Ne'ya'nimo ne'malova noko'nimo halate ali'na halagape vai'na alopa alopa noko'nimo kite'na muki ne'ya'ni'e kagemi ya'ni'e'mo ali'na ani nokopi'mo malegauve. <sup>19</sup> Malete'nae'mo, naune'nameyo, muki kafuga'ae'mo alagepa huka maisanafe'mo muki kagemi yakamo alika male'nane. Ne'yakamo nege anikamo nege nehuka kamogaga aika maika falu huka maiyo, hu'na huguve, huno agesa afi'niye. <sup>20</sup> Agesa afi'niya'monanafa Goti'a, negi vekae, hemeni hani'ilagamo kagupi mafa'nemo halate alika namiyo, hu'na hisugeka faligane. Falisanage'apae'mo ina lagimo ageka male'nana kagemi yakamo aligae, huno ha pai'niye, huno hapa paiteno'ae'mo, <sup>21</sup> ani kava hu'a apakai'apilefeke'mo kagemi ya'apimo age'a ne'malaya'monanafa Gotitefe'mo age'a no'malaya vayane, huno hapa pai'niye.

*Ma mopafi yafe'mo lapakesa ala'amo afitapa lapausoli osiyo, huno hu'niya gema*  
(Mt 6:25-34)

<sup>22-23</sup> Yesu'a ge'amo ne'afiya vaya'aife'mo, ani kava huno hane'niya'mofe'mo lapa pai'nae'mo, afa'a ne'maiya kava'mo'a hogote kava'mo hane'neni ne'ya'mo ago aeno aga se'niye. Lapakufamo hogote ya'mo hane'neni kukenamo ago aeno aga se'niye. Aeno aga se'niya'mofe'mo ma mopafi maisaya kavafe'mo, vae, na agufa ne'ya'mo negaune, na agufa kukenamo alita vaigune, hutetapa lapakesa ala'amo afitapa lapausoli osiyo. <sup>24</sup> Nama



anagafe'mo lapakesa afiyo. Nama anaga'mogimo avina ya'mo ali'a male'ne'a hoyamo ali'a o'vaige ne'ya'apimo ali'a no'apifi'mo o'malege hu'a ne'maiya'monanafa Goti'a ne'ya'apimo afa'a alino ne'apamiye. Lapakaemo nama anaga'mo ago aetapa apaka se'naya'mofe'mo Goti'a mago'e huno ne'ya'mo afa'a alino lapamigiye. <sup>25</sup> Lapakaepati'mo mago vekamo'a agesa ala'amo afino hausoli hu'nisiya'mo'mo Goti'a faligiye, huno lekana paino ate'niya afinapati'mo mago'e huno aise'amo alino yatala huno o'ategaiye. <sup>26</sup> Lapakaemo ani aise kava'mo hisaya himamutapimo ohane'niya'mofe'mo na kava higetapa alu kava alu kavafe'mo lapausoli nehae. <sup>27</sup> Lapakaemo kahaufilaga ausee'mo lapakesa afiyo. Ausemo'a agai'amo hageteno ali'ya'mo o'alino kukena'amo alo nosiye. Alo nosiya'monanafa ausemo kukena konali ya'amo'a ala veka'apimo yagaino ne'apateya vekamo agi'amo Salomoni'a alino vai'niya kukena'a'e konali ya'a'e'mo ago aeno aga se'niye. <sup>28</sup> Goti'a kahaufilaga kahaumo hemenimo hane'niyanageno ega'amo atamo lesiya kahaumo ausemo alino vaino ne'apateya'mofe'mo mago'e huno kukenatapimo alino vaino lapategaiye. Gotife'mo aise'amo lapakesa afitapa fatago nehaya vayanagi afiyo. <sup>29</sup> Ne'ya'mo nesaya yafe'mo kahauya hutetapa na agufa ne'ya'mo negaune hutapa osuta lapausoli osiyo. <sup>30</sup> Malaga vaya'mogimo ani yafe'mo hapa'ye nehige'apae'mo kahauya nehaya'monanafa

Afotapimo'a afa'a maisayafe'mo aligae huno ago age'niye. <sup>31</sup> Goti'a yagaino lapatesiya kavafe'mo kahauya higeno'ao ma mopafi'mo maisaya ya'e'mo alino lapamigiyanagi. <sup>32</sup> Aise sipisipi anaga'mogitapamo lapamo'yamo o'aiyo. Afotapimo'mo yagaino ne'apateya kote'mo maisayafe'mo hau'niyanagetapa haita faletetapa muki ya'amo aligaya'mofe'mae. <sup>33</sup> Kagemi yatapimo alitapa maketi hige'a miya faitesagetapa alisaya monimo alitapa fako hutapa kagemi ya'apimo o'male'nisaya vaya'aina apamiyo. Koku'napi'mo alagepa kagemi yatapimo alitapa malegeno'ao hano osuno afa'a haneno. Koku'napi yatapimo kumaya'mo o'alige kafamo'mo o'nege hisigeno alagepa huno hanege hanege huno hanesiya yatapimo lapaya mukiki hutapa aliyo. <sup>34</sup> Kagemi ya'apimo age'a ne'malaya kotefeke'mo apaipa kalite'a apakesa ne'afiye.

*Ala kava ne'mo eminesiya'ae'mo alo hutapa maiyo, huno hu'niya gemae*

*(Mt 24:42-44)*

<sup>35</sup> Kukena'apimo ali'a vaite'a lamu'apifi'mo kani ae'a kaete'a alo hu'a mai'naya vayakana hutapa maiyo. <sup>36</sup> Mago ali'ya aepa vekamo'a a'mo ali'nige'apae'mo lusi yagita hu'nayategamo ugefe'mo hu'nige'apae'mo ali'ya'amo ne'aliya vaya'mogi agava mai'nae. Eno hakalu hakalu nehisige'apae'mo malage hu'a kitamo yaki'a atesayafe'mo yagai'a agava mai'naya vayakana hutapa maiyo. <sup>37</sup> Aepa vekamo esiya afinafe'mo ohavae'a afa'a yagai'a

agava mai'naya vaya'aifeke'mo hapao ke hegaiye. Lama gemo lapa pai'nae'mo hapao ke heteno'ae'mo, haitetapa hi'yalamute'mo siate'mo maiyo, huno hapa paiteno ali'ya'mo ne'aliya kukenamo alino vaili'nenon ne'ya'mo alino apamigiye. <sup>38</sup> Hani'ilaga folagu'mo osu'nisigeno esifi folagu'mo hano hutesiya afina'mo esifi huno eteno'ae'mo yagai'a agava mai'nisaya vaya'aifeke'mo hapao ke hegaiye.

<sup>39</sup> No aepa vekamo'a kumaya ne'aliya vekamo esiya afinafe'mo afi'niyesinana au okaleno afa'a yagaino mai'nisigeno kumaya ne'aliya vekamo'a eno no'amo aeno akaino kumaya o'ali'niyesine. <sup>40</sup> Ani kava'mo hutapa alo hutapa maiyo. Vemo Mafa'nemo hemenimo emi'no'megaiye, hutapa nehisageno'ae'mo eminegaiye, huno hapa pai'nigeno, <sup>41</sup> Pita'a, Ala kava nene, lagaefe'mo mani aeka kalafefa gemo laha nepaipi muki vaya'aife'mo hapa nepaine, huno loka huno afi ge'nigeno'ae'mo <sup>42</sup> ali'ya aepa vekamo'a mago alagepa huno afi'nisiya vekamo'a ali'ya'amo ne'aliya vaya'aite'mo yagai'nenon ne'ya'apimo alino fako huno apamisiyafe'mo lekana paino ategaiye. <sup>43</sup> Ali'ya'amo alagepa huno ne'alisiya'mo'mo ali'ya aepa vekamo'a eno'ae'mo hao ke hegaiye. <sup>44</sup> Lama gemo lapa nepauve, ali'ya aepa vekamo'a, muki ya'nile'mo yagaiyo, huno ha paigiya'monanafa <sup>45</sup> ali'ya'amo ne'aliya vekamo'a, hemenimo ali'ya aepa veka'nimo o'megaiye, huno huteno ali'ya'mo ne'aliya ve a'nemo aepa faino apamagiteno alopa ne'ya'e ani'e'mo neteno negi maleno

mai'nen'o'ae'mo <sup>46</sup> o'megaiye, huno agesa afi'nisiya afina'mo malage huno eno heno folagapati'mo apalo atiteno ge'amo no'afiya vaya'aitegamo alino ategaiye. <sup>47</sup> Ali'ya'mo ne'aliya vekamo'a ali'ya aepa veka'amo ge'amo ago afi'niyana alo huteno akame nosisiyana lusi kava huno amagigiya'monanafa <sup>48</sup> ali'ya'mo ne'aliya vekamo'a ali'ya aepa vekamo hau'niya kava'mo o'afi'nen'o amagisiya hosu kava'mo hu'nisiya'mo'mo vase huno amagigiye. Vaya'mogimo alopa ya'mo apami'nage'a ali'naya vaya'aife'mo, alopa ya'mo namiyo, hu'a hugae. Alopa ya'mo apami'nage'a ali'naya vaya'ai anona'apimo alopa anonamo mago'e huno hanegaiye.

*Ali'na fako hu'na apatesuvafe'mo emi'ne'nove,  
huno hu'niya gemae  
(Mt 10:34-36)*

<sup>49</sup> Atamo ali'na ma mopafi'mo yaga ausuvafe'mo emi'ne'nove. Aepa faino lesiyafe'mo nahau'niya'monanafa ole'niyanageno legaiye. <sup>50</sup> Ani'mo fale'a ne'apataya kava hu'a hosu kavateti'mo ali'a fale'a nategae. Kana nahaume nahaume ne'visige'na u'na aliguve. <sup>51</sup> Ma mopafi vaya'mo magokepi mai'a falu hu'a maisayafe'mo emine'niye, hutapa lapakesa ne'affiye. Ha'ao, ago lapa pai'nae'mo, ali'na fako hisuvafe'mo emi'ne'nove. <sup>52</sup> Ani afinateti'mo magoke nopi'mo faefu'a vaya'mo mai'nisayateti'mo ali'a fako hu'a lole'e mago'e vaya'mogi lole vekala'anitegamo kame hu'a anatesage'ana lole vekala'moganimo anonale lole'e mago'e vaya'aitegamo kame

hu'ana apatega'ae. <sup>53</sup> Ali'a fako hute'apae'mo afo'amo'mo mafa'ne'alegamo kame huno atesigeno mafa'ne'amo'a afo'amotegamo kame huno atesigeno ita'amo'mo a'mafa'ne'alegamo kame huno atesigeno a'mafa'ne'amo'a ita'amotegamo kame huno atesigeno mago a'mo'a anofelo'amotegamo kame huno atesigeno anofelo'amo'a anofelotegamo kame huno ategaiye, huno hapa pai'niye.

*Afole aisiya alagena kavafe'mo hu'niya gema*  
(Mt 16:2-3)

<sup>54</sup> Yesu'a muki vaya'aife'mo, lapakaemo ago age'nayana yegemo lamino nefaleya kotegamo hiya'mo ki'nigetapa agetetapae'mo hemenimo ko'mo aisiyafe'mo hiye, hutapa nehageno'ae'mo ani kava'mo afole ne'aiye. <sup>55</sup> Ago age'nayana lusi yasimo ali'nigetapa agetetapae'mo alagepa ko'mo aligefe hiyanageno yegemo legaiye, hutapa nehageno'ae'mo ani kava'mo afole ne'aiye. <sup>56</sup> Aetapa ati nekaya vayanagi ma mopale alagena kava'mo ago age'naya'monanafa na kava higetapa hemenimo nehuva alagena kava'mo no'agae. <sup>57</sup> Na kava higetapae'mo alita fako hutetapa alagepa kava'mo no'agae, huno hapa pai'niye.

*Alika nanu aeka anato, huno hu'niya gema*  
(Mt 5:25-26)

<sup>58</sup> Kagaemo hosu kava'mo hu'nisanageno agoti huno kategefe hisiya vekamo'a agoti gemo ne'afiya vekalegamo kavalelino ne'visigekae'mo alika alagepa huka ato. Alagepa huka alika fako osisana'mo'mo agoti gemo ne'afiya

vekamo'a kavalelinuno amisigeno kavaleno alino ati vekamo amisigeno alino kalavusi huno kategaiye. <sup>59</sup> Muki anonakale'mo o'amisanageno magoke monitomo lageso hisigekae'mo kalavusifati'mo ataleka o'ugane, huno hapa pai'niye.

## 13

*Lapaipamo alitapa afe olesaya vaya'mo faligae, huno hu'niya gemae*

<sup>1</sup> Ani afina'mo mago vaya'mo Yesutegamo e'a, Galeliya kotega vaya'mogi sipisipi ofalinimo ne'amige'apae'mo Pailati ati vaya'amogi e'a hapaenageno sipisipimo kola'e vaya'mogi kola'e'mo magokepi aino lakino hane'niye, hu'a ha pai'nageno'ae'mo <sup>2</sup> Yesu'a, ani kava hute'a fali'naya'mofe'mo hosu kava'apimo'a muki Galeliya kotega vaya'ai hosu kava'apimo ago aeno aga se'niye, hutapa lapakesa ne'afifiye. <sup>3</sup> Ha'ao, lapaipamo alitapa afe olesayana ani kava hutapa faligae. <sup>4</sup> Silomi kotegamo lusi yatala yafa no'mo aino halagape vaino asagauno aino eitini'a vaya'mo apamagi'nige'a fali'naya vaya'ai hosu kava'apimo'a muki Yulusalemu taonifi'mo mai'naya vaya'ai hosu kava'apimo ago aeno aga se'niye, hutapa lapakesa ne'afifiye. <sup>5</sup> Ha'ao, lapaipamo alitapa afe olesayana ani kava hutapa faligae, huno hapa pai'niye.

*Alagamo no'aeya yosae'mo hu'niya gemae*

<sup>6</sup> Inagi mago gemo aeno kalafefa gemo huno hapa paino'ae'mo, mago vekamo'a hoyafifi'mo fiki yosamo hane'nigeno yosa

alagamo ae'nisiya'ae'mo agesiyafe'mo e'niyana o'ae'niye. <sup>7</sup> Agaemo yosa hoya'afi'mo ali'ya'mo ne'aliya vekae'mo, lole'e mago'e kafugamo e'na agege agege hu'novana alagamo o'ae'nige'na age'nove. Lanitani mopamo ago leno hau hu'nigeno'ae'mo no'aeyanagi he'ya aika atalo, huno ha pai'nigeno'ae'mo, <sup>8</sup> ali'ya aepa vekae, hemeni kafugamo afa'a ato. Mago mopamo ai'yu aite'na malasini mo malegauve. <sup>9</sup> Anaga kafugamo alagamo aesiya'mo'mo kanalene. Alagamo o'aesigekae'mo eka he'ya aika atalegane, huno ha pai'niye, huno hapa pai'niye.

*Yesu'a akame'yamo aeno fagagi'niya a kanomo alino api aino ate'niya gemae*

<sup>10</sup> Mago Sapati afina'mo Yesu'a Yu vaya'ai mono nopi'mo haino alino apaya ne'malegeno'ae'mo <sup>11</sup> Mago a kanomo eitini'a kafugamo akame'ya ayamufamo aeno fagagi'nigeno ape hulitata huno mai'niye. <sup>12</sup> Mono nopi'mo mai'nigeno Yesu'a ageteno'ae'mo, Ane, kakame'yamo aeno fagagi'niya nofikamo hatu mae'na kate'nove, huno ha paiteno <sup>13</sup> agufale'mo aya'mo male'nigeno malage huno akame'yamo aino api ai'nigeno he tino'ae'mo Goti agi'ale'mo alino asaga huno ate'niye. <sup>14</sup> Ate'niya'monanafa Yesu'a Sapati afina'mo alino api aino ate'niya kavafe'mo monote'mo ne'yagaiya vekamo'a aipamo le'nigeno muki vaya'aife'mo, sigisi'a afina'mo ali'ya'mo alisaya afina'mo hane'niya'mofe'mo alino alagepa huno lapatesiyafe'mo sapati afina'mo o'metapa alu

afinake'mo eyo, huno hapa pai'nigeno <sup>15</sup> Ala kava ne'mo'a ge'ale'mo aeno atagaina huno hapa paino'ae'mo, aetapa ati nekaya vayanagi Sapati afina'ae afina'ae'mo pulumakatapimofi hositapimofi hutapa no'apifati'mo hatu maeta apatetetapa ani'mo nesayafe'mo apavalelitapa ne'vae. <sup>16</sup> Hatu maeta ne'apataya'mofe'mo ani a kanomo Emalehamu aginago a kanomo eitini'a kafugamo lusi yatala afina'mo Satani'a nofi aeno ate'nigeno mai'niya a kanomo hatu mae'na atesuva kava'mo ohane'nifiye, huno hapa pai'nige'apae'mo <sup>17</sup> kame vaya'amogi afite'a apavagage hu'niya'monanafa muki vaya'mogi no'agaya agufa alagepa kava'mo hu'nige'a agete'apae'mo apamogaga ai'nae.

*Masateti avina ya'e yisi'efe'mo aeno kalafefa gemo hu'niya gemae*

*(Mt 13:31-32; Mk 4:30-32)*

<sup>18</sup> Agaemo, Goti'a yagaino ne'apateya kava'mo haiya agufa kavakana huno hane'niye. Goti'a yagaino ne'apateya kavafe'mo haiya agufa gemo hu'na ae'na kalafefa gemo huguve. <sup>19</sup> Ina kavakana huno hane'niyana mago vekamo'a masateti avina ya'mo aise avina ya'atomogeno hoyamo aliteno hakale male'nigeno hageno haino mago yosagana huno hane'nigeno nama anaga'mo haleli'e'a akopale'mo hakalet'e'a apano'mo ki male'nae, huno hapa paiteno'ae'mo, <sup>20</sup> Goti'a yagaino ne'apateya kava'mo haiya agufa kavakana huno hane'niye. <sup>21</sup> Ina kavakana huno hane'niyana mago a kanomo'a falaovafi'mo ali'a atagu fae male'nageno ko nesiya ya'mo agi'amo



yisimo alino talamufi'mo hane'niya falaovafi'mo atagu fae male'nigeno aino atagu faeno uneno huno muki falaovafi'mo ali'ya'mo ali'nigeno kosi'niye, huno hapa pai'niye.

*Aise kipapi'mo haitapa falesayafe'mo lapaya mukiki hiyo, huno hu'niya gemae*  
(Mt 7:13-14,21-23)

<sup>22</sup> Yesu'a muki aise taonifi'e alopa taonifi'e'mo umenitata huno alino apaya malemale malemale hume hume uno Yulusalemu taonifi'mo u'niye.  
<sup>23</sup> Mago vekamo'a eno, Ala kava nene, Goti'a magoke magoke vaya'ai apakufamo alino katino ne'apatefiye, huno afi ge'nigeno'ae'mo,  
<sup>24</sup> aise kipapi'mo haitapa falesayafe'mo lapaya mukiki hiyo. Nagaemo lapa pai'nae'mo, asole vaya'mo hai'a falegefe hugaya'monanafa afa'a hai'a ofalegae. <sup>25</sup> No aepa vekamo'a he tino kitamo ki male'nisigetapae'mo kumatega he titapa mai'netapae'mo kitale'mo hakalu hakalu nehutapae'mo, Ala nene, kitamo yakika lato, hutapa nehisageno'ae'mo, olapake'nova vayanagi haiya'alegati ne'ae, huno lapafi gesigetapae'mo, <sup>26</sup> kagae'e'mo magokepi lokaeta mai'neta ne'ya'mo ne'none. Kagaemo kumatile'mo alika laya male'nane, hutapa ha paisageno'ae'mo, <sup>27</sup> olapake'nova vayanagi haiya'alegati ae. Muki vaya'amogitapamo hosu kava'mo nehaya vayanagi nagaetegati'mo ataleta lapaune hetapa viyo, huno lapa paigiye. <sup>28</sup> Lapakaemo alino lapafaitalesigetapa mai'netapae'mo apakesayana Emalehamu'agi Aisiki'agi Yekopu'agi muki vaya'mo Gotitegati

gemo alini e'a ae'a hakalo hu'a hapa nepaiya vaya'e'mo Goti'a yagaino ne'apateya kote'mo mai'nisagetapa malaga mai'netapa apaketetapae'mo avi'ya huge lapaipamo le'ninagetapa lapavepi'mo hanitapa agafu kige huta maigae. <sup>29</sup> Muki asole vaya'mo yegemo haine ne'eya kotegati'mo ege yegemo lamino nefaleya kotegati'mo ege aluga aluga haopalegati'mo ege hu'a e'a Goti'a yagaino ne'apateya kote hi'yalamute'mo siate mai'ne'apae'mo ne'ya'mo negae. <sup>30</sup> Afiyo, mago hemenimo henaga ne'maiya vaya'mo hogote vaya'mo maisage'a mago hemenimo hogote'a ne'maiya vaya'mo henaga vaya'mo maigae, huno hapa pai'niye.

*Yesu'a Yulusalemu taonifi'mo mai'naya vaya'aife'mo hau huno apate'niya gemae  
(Mt 23:37-39)*

<sup>31</sup> Ani afina'mo mago Falasi vaya'mo Yesutegamo e'a, Heloti'a kahaefefe'mo nehiyanagi kaune ho, hu'a ha pai'nageno'ae'mo, <sup>32</sup> ani vekamo'a aigofe huteno afela kalamo'a humi nami kava'mo nehiya agufa kalagana huno mai'niya vekalegamo utapae'mo, afiyo, hemeni'e ega'e'mo hosu apaune vaya'mo vaya'ai apaipafati'mo ali'na hapa fai'na apatalege kaita hapau'nisiya vaya'mo ali'na hapage'na apatege hute'na olaga'amo ka atupale'mo u'na ava'yi huguve, huno hiye, hutapa ha paiyo. <sup>33</sup> Fiku yanage'a apakaemo Gotitegati gemo alinino eno aeno hakalo huno hapa nepaiya vekamo alu kotegamo

amagisageno faligiye. Yulusalemu taonifike'mo faligiye. <sup>34</sup> Yulusalemuvo, Yulusalemuvo, monote'mo ne'yagaiya vaya'mogitapa lapakaemo Gotitegati gemo alini e'a ae'a hakalo hu'a hapa nepaiya vaya'mo hapaeye alino apate'nige'a lapakaetegamo ne'vaya vaya'mo yafa kayoteti'mo kamiti apamagige hutapa ne'maiya vayane. Kokolemogimo apana'aumo ali'a hapakufi'mo ne'apataya kava hu'na muki afina'mo mafa'netapimo nagaetega apavaleli'na esuvafe'mo nahau'niya'monanafa lapakaemo olapau'niye. <sup>35</sup> Afiyo, Goti'a ago lapataleno u'niye. Nagaemo lapa pai'nae'mo o'nagetapa maime maime ne'utapae'mo Ala kava ne'mo agi'alefe'mo ne'eyanagi Goti'a ha maeno, hutapa nehutapae'mo ani afina'mo nagegae, huno hapa pai'niye.

## 14

*Yesu'a agufamo ko si'niya vekamo alino alagepa huno ate'niya gemae*

<sup>1</sup> Mago Sapati afina'mo Yesu'a Falasi vekamo yagaino ne'apateya vekamo nopi'mo ne'ya'mo nesiyafe'mo haino mai'nige'apae'mo yagai'a mai'ne'a aulu he'a mai'nae. <sup>2</sup> Inagi mago vekamo agufamo ko si'niya vekamo Yesu haopale'mo mai'niye. <sup>3</sup> Yesu'a ani vekamo ageteno'ae'mo ke'aepa gemo ne'afiya vaya'e Falasi vaya'efe'mo, Sapati afina'mo ali'a alagepa hu'a ne'apataya kavafe'mo ke'aepa gemo'a huno'ae'mo, hiyo huno hu'nifi osiyo, huno hu'niye, huno apafi

ge'nige'apae'mo <sup>4</sup> ge osu'a mai'nae. Agaemo alino alagepa huno ateteno'ae'mo, afa'a uvo, huno ha paiteno'ae'mo, <sup>5</sup> lapakaepati'mo haiya vekamo'mo mafa'ne'amofi pulumaka'amofi huno sapati afina'mo kelifi'mo asagauno aino mai'nisigeno'ae'mo kelifati'mo malage huno lamino o'avalegaiye, huno apafi ge'nige'apae'mo <sup>6</sup> ge'ale'mo afa'a ae'a atagaina hu'a ha opai'nae.

*Lusi yagitamo hu'a ne'nayategamo mai'nenohapa pai'niya gemae*

<sup>7</sup> Yesu'a apakeyana vaya'mo e'a ala apaki vaya'mo ne'maiya siate'mo mai'nageno apaketeno'ae'mo aeno kalafefa gemo huno hapa paino'ae'mo, <sup>8</sup> a'mo lagaugefe'mo lusi yagita huteno'ae'mo ge hisigetapa etapae'mo ala apaki vaya'mogi ne'maiya yate'mo haitapa o'maiyo. Fiku yanageno mago aeno kaga se'nisiya vekamo esigeno'ae'mo <sup>9</sup> lanakaefe'mo ge hu'niya vekamo'mo eno kaha paino'ae'mo, he tika ugeno'ao ani vekamo maino, huno hisigekae'mo lusi kava huno kavagage hisigeka lamika henaga siate'mo maigane. <sup>10</sup> Hugiya'mofe'mo ge hisigeka ukae'mo henaga siate'mo haika maiyo. Kagaefe'mo ge hu'niya vekamo'mo eno'ae'mo, ve'nimo, ala apaki vaya'mogimo ne'maiya siate'mo haika maiyo, huno kaha paisigekae'mo kagae'e'mo magokepi lokae'a mai'naya vaya'ai apaulagale'mo ala kagikamo aligane. <sup>11</sup> Muki vaya'mogimo apakai'api apaki'apile'mo ali'a asaga nehisaya'mo'mo Goti'a apaki'apile'mo alino afepi apategaiye. Mago vaya'mogimo apakai'api apaki'apile'mo ali'a afepi

ne'atesaya'mo'mo Goti'a apaki'apile'mo alino asaga huno apategaiye, huno hapa pai'niye. <sup>12</sup> Agaemo agaefe'mo ge hu'niya vekae'mo, yagita hisana afina'mo kao vayanagi konagakagi nofi vayakagi nokalega kagemi ya'apile vayanagi huka ge osuvo. Fiku yanage'a yagita hisaya afina'mo kagaefe'mo eno, hu'a ge hisageka visanage'apae'mo anonakalefe'mo kamigae. <sup>13</sup> Yagita nehana afina'mo kagemi ya'apimo o'male'nisaya vayanagi apakufamo hosu'nisiya vayanagi apaiyamo hosu'nisiya vayanagi apaulagamo ali hu'nisiya vaya'aifenagi huka ge huvo. <sup>14</sup> Anonakalefe'mo afa'a okamigaya'mofe'mo Goti aulagale'mo alagepa huka mai'neka afa'a kamogaga aigane. Goti'a fatago vaya'mo kanolufati'mo he tisaya afina'mo anonakalefe'mo kamigiya'mofe'mae, huno hapa pai'niye.

*Alopa ne'yafe'mo aeno kalafefa gemo hu'niya gema*

*(Mt 22:1-10)*

<sup>15</sup> Agae'e'mo hi'yalemute'mo mai'neno ne'ya'mo ne'niya vekamo'a ani gemo afitenoa'e'mo, Goti'a yagaino ne'apateya kote'mo hai'a mai'ne'a ne'ya'mo ne'a maisaya vaya'mogimo Goti aulagale'mo alagepa hu'a mai'nayanage'a afa'a apamogaga aigae, huno hapa pai'niya gee'mo loka hu'nigeno <sup>16</sup> Yesu'a, mago vekamo'a lusi yagita nehuno'ae'mo asole vaya'aife'mo ge hu'niye. <sup>17</sup> Ne'ya'mo ago kae maleteno apa vekae'mo, ge hu'nova vaya'aitegamo ukae'mo, muki ne'ya'mo ago kae

male'niyanagi eyo, huka hapa paiyo, huno ha paiteno alino ate'nigeno uno ani gemo huno hapa pai'niye. <sup>18</sup> Muki vaya'amogi magoke agufa ge'age'mo hu'apae'mo, visuna afinatimo ohane'niyanageta afa'a o'ugune, hu'a hu'nae. Mago vekamo'a, mago mopamo miya fai male'novanage'na u'na agegauva'mofe'mo kahao ke hovanage'na o'uguve, huno ha pai'nigeno <sup>19</sup> mago alu vekamo'a, teni'a pulumakamo ali'ya'mo ne'aliya pulumakamo miya fai male'novanage'na ali'ya'mo kanale hu'a ne'alifi no'alifi hu'na u'na agegauva'mofe'mo kahao ke hovanage'na afa'a o'uguve, huno ha pai'nigeno <sup>20</sup> mago alu vekamo'a, nagaemo hememitomo a ali'novanage'na afa'a o'uguve, huno ha pai'niye. <sup>21</sup> Ali'ya'amo ne'aliya vekamo halate aino atagineno eno ali'ya aepa vekae'mo ani gemo ha pai'nigeno afitenoa'e'mo aipamo le'nigeno ali'ya'amo ne'aliya vekae'mo, malage huka uka taonifi'mo alopa kate'e aise kate'e'mo ne'ukae'mo kagemi ya'apimo o'male'nisaya vayanagi apakufamo hosu'nisiya vayanagi apaulagamo ali hu'nisiya vayanagi apaiyamo hosu'nisiya vayanagi huka apavalelika eka nagae nopi'mo apato, huno ha pai'nigeno <sup>22</sup> ali'ya'amo ne'aliya vekamo'mo ani kava'mo ago huteno'ae'mo, Ala nene, naha pai'nana kava'mo ago hu'nova'monanafa mago vaya'mo maisaya ya'mo afa'a hane'niye, huno ha pai'nigeno <sup>23</sup> ne'ya aepa vekamo'a ali'ya'amo ne'aliya vekae'mo, kale kategati'e hoyo kategati'e'mo uka no'nifi'mo fai'a kili

paesayafe'mo apayate alika apavalelika eno.  
<sup>24</sup> Muki vaya'aife'mo hogote'na ge hu'nova  
vaya'mogimo ne'ya'nimo afa'a e'a o'negae, huno  
hu'niye, huno Yesu'a hapa pai'niye.

*Vaya'mogimo hogote'a alagepa hu'a apakesa  
afite'a Yesu'mo akame hisaya kavafe'mo hu'niya  
gema*

*(Mt 10:37-38)*

<sup>25</sup> Yesu'a asole vaya'e'mo magokepi  
ne'uno'ae'mo aino afe leno hapa paino'ae'mo,  
<sup>26</sup> Nagaetegamo esiya vekamo'mo afo'amofenagi  
ita'amofenagi a'aenagi mafa'ne'aenagi  
konaga'amogifenagi asa'amogifenagi agai'amo  
alagepa huno maisiya yafenagi huno hogoteno  
hau'nisiyana ge'nimo ne'afiya vekamo afa'a  
o'maigiye. <sup>27</sup> Ina lagimo malipu yosa'apimo ali'a  
kofili'a nakame nosisafige'a ge'nimo ne'afiya  
vaya'mo afa'a o'maigae. <sup>28</sup> Lapakaepati'mo ina  
la'mo lusi yatala no'mo kisiyafe'mo hogoteno  
agesa no'afiye. Itopale mai'nenno'ae'mo, ina  
agufa kava hu'na ki'na hano hisuvafe'mo na  
magi monileti'mo muki ya'amo miya faigufi,  
huno agesa afigiye. <sup>29</sup> Hogoteno agesa o'afi'nenno  
no'mo aepa faino ki'nisiyana moni'amo hano  
hisigeno'ae'mo no'amo kino osuno afa'a  
ategaiye. Vaya'mogi e'a agete'apae'mo, <sup>30</sup> ani  
vekamo'a no'mo aepa faino ki'niya'monanafa  
afa'a kino hano osugiye, hu'a faipa hu'a ategae.

<sup>31</sup> Ani kava huno haiya ala kini vekamo'a kame  
hisiyafe'mo hogoteno agesa no'afiye. Ha'ao,  
hogoteno agesa afino'ae'mo, teni tauseni'a ati  
vaya'nimo mai'nayanage'na u'na mago alu

kini veka'e'mo kame hugu'ana ati vaya'amo tueti tauseni'a ati vaya'amo mai'nae. Nagaemo kame hu'na ae'na aga sesufi agaemo kame huno aeno naga sesifi, huno agesa afigiye. <sup>32</sup> Kame hisu'ana afa'a ae'na o'aga segauve, huno agesa afi'nisiyana kame hisa'a kini vekamo o'meno afagitega mai'nisigeno'ae'mo apa vaya'aife'mo, kame osuta afa'a atesunafe'mo na kava hisune, hutapa afi geyo, huno hapa paiteno alino apatesigela ugae. <sup>33</sup> Ani kavakana hu'a ina lagimo muki apakai'api yafe'mo apakame'yamo no'amisafi ge'nimo ne'afiya vaya'mo afa'a o'maigae, huno hapa pai'niye.

*Yesu'mo ataleno usiya vekamo haga nosiya hagegana huno mai'niya gemae*

*(Mt 5:13; Mk 9:50)*

<sup>34</sup> Hagemo kanale ya'mo hane'niya'monanafa haga nehiya ya'amo hano hisigeno'ae'mo haiya kava huno halate haga hisiya ya'amo alino ha maleno ategaiye. <sup>35</sup> Ani agufa hagemo'a ali'ya'amo alagi ohane'niya'mofe'mo ali'a yaga au'a ne'atalae. Gemo afisaya lapakesa hane'nisiyana mani gemo alagepa hutapa afiyo, huno hapa pai'niye.

## 15

*Lageso hu'niya sipisipie'mo ava gemo hu'niya gemae*

*(Mt 18:12-14)*

<sup>1</sup> Mago afina'mo takesi moni ne'aliya vaya'e Yu mono no'afiya vaya'mogi'e'mo Yesu ge'amo afisayafe'mo e'nae. <sup>2</sup> Falasi



vaya'e ke'aepa gemo avo'mo kae'a ali'a apaya ne'malaya vaya'mogi'e'mo hagalu hagalu hu'a ge ne'apae'mo, ani vekamo'a hosu vaya'aina alino falu fala huno apateteno apakae'e'mo magokepi lokaeno mai'neni ne'ya'mo ne'ne, hu'a hu'nae. <sup>3</sup> Hu'naya'mofe'mo Yesu'a ina gemo huno aeno kalafefa gemo hapa paino'ae'mo, <sup>4</sup> Vani hataleti'a sipisipifati'mo magoke sipisipimo apataleno uno lageso hu'nisigeno'ae'mo aepa vekamo'mo afa'a mai'naya sipisipi anaga'amo ka'me kotega kahaule'mo apataleno uno kahauya hume hume uno ageno ava teteno'aeke'mo afa'a maigiye. Lapakaepati'mo ina la'mo ani agufa kava'mo afa'a osugiye. <sup>5</sup> Ageno avateteno avaleno alino agi'nafi'mo ateteno amogaga aime aime no'alegamo egaiye. <sup>6</sup> No'alega eno ava'yi huteno'ae'mo ao vaya'e no'ale vaya'efe'mo ge hisige'a esageno'ae'mo, nagae sipisipimo lageso hu'niya sipisipimo kahauya hu'na ago age'na avatete'na avaleli'na e'novanagi nagae'e'mo egeta magokepi lamogaga aino, huno hapa paigiye. <sup>7</sup> Nagaemo lama gemo lapa nepauve, ani kava'mo hu'a koku'napi mai'naya vaya'mogi ani agufa kavafe'mo apamogaga ne'aiye. Apakaemo 99'a fatago vaya'mogimo apaipamo ali'a afe lesaya kava'apimo ohane'niya vaya'aife'mo aise'amo apamogaga ne'aiya'monanafa mago hosu vekamo'mo aipamo alino afe lesige'apae'mo mago'e hu'a apamogaga ne'aiye, huno hapa pai'niye.

*Lageso hu'niya alaga monie'mo ava gemo hu'niya gemae*

8 Ani kava'mo huno mago a kanomo'a naya lole'a vani kina alaga monimo male'niya monifati'mo magoke monimo lageso hisigeno'ae'mo lamu'afi'mo alino kani aeno kaeteno no'afi'mo muki ya'afilagamo aulaga halino lusi kava huno vagi vagi huno kahau ya hume hume uno ageno ava teno aliteno'aeke'mo afa'a maigiye. Haiya a kanomo'a ani agufa kava'mo afa'a osugiye. 9 Ageno aliteno'ae'mo ao vaya'e no'ale vaya'efe'mo ge hisige'a esageno'ae'mo, lageso hu'niya monimo ago age'na avatete'na ali'novanagi egeta nagaegi'e'mo magokepi lamogaga aino, huno hapa paigiye, huno hapa paiteno'ae'mo, 10 nagaemo lama gemo lapa nepauve, ani kava'mo huno mago vekamo'a aipamo alino afe lesige'apae'mo koku'napi vaya'mogimo enisole vaya'ai apaulagale'mo apamogaga ne'aiye, huno hapa pai'niye.

*Lageso hu'niya mafa'nee'mo ava gemo hu'niya gema*

11 Yesu'a, mago vekamo'mo lole mafa'ne'ala'mo mai'na'ae. 12 Henaga mafa'ne'amo'mo afo'amofe'mo, Afo, kagemi yakamo alika fako huka nagai'ni kagemi ya'amo namige'nao, huno ha pai'nigeno afo'amo'mo kagemi ya'amo alino fako huno anami'niye.

13 Aise afina'mo utegeno henaga mafa'ne'amo'mo muki kagemi ya'amo alino anupa huno alinino afagi kotegamo uno mai'nenno'ae'mo muki moni'amo fiku atale'niye. 14 Muki moni'amo ago ataleno

hano hu'nigeno'ae'mo ani kotegamo ne'yafe'mo kafu hu'naya afina'mo afole ai'nigeno aepa faino muki ya'ae'mo kafu hu'niye. <sup>15</sup> Kafu hu'niya'mofe'mo ani kotega mai'niya vekae'mo uno, kagaete'mo ali'ya'mo aligesuve, huno afi ge'nigeno'ae'mo, uka afu anaga'nimo ne'ya'mo alika apamiyo, huno ha paiteno alino ate'nigeno uno afule'mo yagaino mai'niye. <sup>16</sup> Agaemo afu anaga'ai yosa alaga ne'yapati'mo alino nesiyafe'mo hu'niyana ani kotega vaya'mogi ne'ya'mo alagi o'ami'nae. <sup>17</sup> Inagi hogoteno negi nagi kava hu'niyana ani afina'mo agesamo aino halo ai'nigeno agesa afino'ae'mo, afo'nimo ali'ya'amo ne'aliya vaya'mogi mago'e huno lusi ne'ya'mo hane'nige'a ne'naya yafena naga netege'na aise afina'mo faligesuve. <sup>18</sup> Atale'na he ti'na afo'nimotega u'nae'mo, Afo, Gotitegamo hosu kava'mo hute'na kagaetega'e'mo hosu kava'mo hu'novanagi <sup>19</sup> nagaefe'mo mafa'ne'niye, huka hisana kava hu'na o'mai'nove. Ali'yakamo ne'aliya vayakana huka ali'yakale'mo alika natege'na ali'yakamo alino, hu'na ha paiguve, huno agesa afiteno <sup>20</sup> ataleno he tino afo'amotegamo e'niye. Afagitega ne'egenno afo'amo'mo ageteno'ae'mo hau huno ateteno nagu nagu huno uno anu kiteno haeno ne'niye. <sup>21</sup> Mafa'ne'amo'mo, Afo, Gotitegamo hosu kava hute'na kagaetega'e'mo hosu kava hu'novanagi nagaefe'mo, mafa'ne'niye, huka hisana kava hu'na o'mai'nove, huno ha pai'niya'monanafa <sup>22</sup> afo'amo'mo ali'ya'amo ne'aliya vaya'aife'mo,

malage hutapa hogote lokiya yatala kukenamo uta alinitetapa waitapa ateyo. Aenimo alinitetapa ayate'mo waita atetetapa aiyale'mo su'mo waitapa ateyo. <sup>23</sup> Afaya'a'e aikeli pulumakamo uta kegi'yafati'mo avalelitetapa amagigetao ne'ya'mo yagita huta neta ateta maita magokepi'mo lamogaga aita maigune. <sup>24</sup> Mafa'ne'nimo fali kavategati'mo ataleno afa'a ne'maiyategamo eno mai'niye. Ani kava huno uno lageso hu'niyategati'mo e'nige'na agete'na avale'nova'mofe'mo lamogaga aita ne'ya'mo negaune, huno hapa pai'nige'apae'mo aepa fai'a apamogaga ai'a mai'nae.

<sup>25</sup> Apamogaga ne'aigeno'ae'mo yege mafa'ne'amo hoyafilagamo mai'niyateti'mo eno no haopaleti'mo afiyana yoke huge apaiya aige nehageno afi'niye. <sup>26</sup> Agaemo ali'ya ne'aliya vekae'mo ge higeno e'nigeno'ae'mo, na agufa kava'mo nehae, huno afi ge'nigeno'ae'mo, <sup>27</sup> Kaganakamo'mo e'nigeno afokamo'mo afaya'e pulumakamo amagino yagita huno ne'ate, fali'niyateti'mo e'niya'mofe'mae, huno ha pai'nigeno <sup>28</sup> aipamo le'nigeno nopi'mo haisiyafe'mo ohau'nigeno kumatega mai'nigeno'ae'mo afo'amo'mo emineno, kahao ke hogi nopi'mo haikeno, huno ha pai'niyana, <sup>29</sup> muki kafuga'ae kafuga'ae'mo ali'yakamo ali'na mai'ne'nae'mo magoke afina'mo gekamo amagi'na o'atale'nova'monanafa nao vaya'e'mo lamogaga aisunafe'mo meme aikelimo heka o'nami'nane. <sup>30</sup> O'nami'nana'monanafa mafa'nekamo'mo uno kumai a'ne'aite'mo muki monikamo fiku ataleno hano huteno

e'nigekae'mo kagaemo hogote afaya'e pulumakamo heka ami'nane, huno ha pai'nigeno'ae'mo, <sup>31</sup> mafa'ne'nimogae, muki afina'mo nagae'e'mo magokepi maiteta'ae'mo muki nagae ya'amo kagaika ya'mo hane'niye. <sup>32</sup> Kaganakamo'mo fali kavategati'mo eno afa'a mai kavategamo mai'niye. Lageso hu'niyategati'mo e'nige'na agete'na avale'nova'mofe'mo kanalenageta laipamo'mo falu hu'nigeta lamogaga ne'aune, huno ha pai'niye, huno Yesu'a hapa pai'niye.

## 16

*Kagemi yate'mo hosu kava huno ne'yagaiya vekae'mo ava gemo hu'niya gema*

<sup>1</sup> Yesu'a ge'amo ne'afiya vaya'aife'mo, mago alopa kagemi ya'amo hane'niya vekamo mai'nigeno ani kagemi ya'ale'mo yagaino ne'ateya vekamo mai'niye. Mai'nige'apae'mo mago vaya'mogi e'a, kagemi yakale'mo yagaino ne'ateya vekamo'a kagemi yakamo fiku alino ne'atale, hu'a ha pai'nageno'ae'mo <sup>2</sup> agaefe'mo ge hu'nigeno e'nigeno'ae'mo, na agufa kava'mo hu'nana kavafe'mo kava gemo afi'nove. Hu'nisana kavafe'mo kagesa afika avo'mo kaeka namiyo. Kagemi ya'nile'mo mago'e huka yagaika o'nategane, huno ha pai'nigeno <sup>3</sup> kagemi ya'ale'mo yagaino ne'ateya vekamo'a, na kava hisuve. Aepa vekamo'a naha faino natalesiyafe'mo hiye. Nayamufa vekamo o'mai'nova'mofe'mo hoyo ali'ya'mo afa'a o'aliguve. Mago vaya'ai ne'yatefe'mo

aukaya hisuvafe'mo navagage hugiye. <sup>4</sup> Hisuva kava'mo hemenimo ago age'nove. Aepa vekamo'a naha faitalesige'apae'mo mago vaya'mogi nagaefe'mo, lagae nopi'mo eka maiyo, hu'a naha paisage'nae'mo hisuva kavafe'mo nagesa afi'nove, huno aipafi'mo agesa afi'niye. <sup>5</sup> Ala veka'apimo'a anona'apimo hane'niya vaya'aife'mo ge hu'nige'a magoke magoke vaya'mo ete ete hu'nageno'ae'mo hogoteno e'niya vekae'mo, anonakamo na magi hane'niye, huno afi ge'nigeno'ae'mo, <sup>6</sup> vani hataleti kalisi talamumo hane'niye, huno ha pai'nigeno'ae'mo, anonakalefe'mo malage huka asepamo alika apake aika fifti'ae huka avo'mo kao, huno ha pai'niye. <sup>7</sup> Alu vekae'mo, anonakamo na magi hane'niye, huno afi ge'nigeno'ae'mo, vani hataleti'a falaova ku'mo hane'niye, huno ha pai'nigeno'ae'mo, anonakalefe'mo malage huka asepamo alika apake aika eiti'ae huka avo'mo kao, huno ha pai'niye. <sup>8</sup> Aepa vekamo'a kagemi ya'ale'mo hosu kava'mo huno yagaino ne'ateya vekamo agi'ale'mo alino asaga huno ateteno'ae'mo, agufae'mo alagepa huno agesa afi'niya vekae, huno hu'niye. Ma mopafi vaya'mogimo ma mopafi vaya'aitegamo alu kava alu kava'mo hisayafe'mo alagepa hu'a apakesa afite'a hale yate'mo ne'maiya vaya'aina ae'a apaka se'a mai'nae. <sup>9</sup> Nagaemo lapa nepauve, ma mopafi hosu monileti'mo alita lapao ya'mo hiyo. Lapakaemo falisage'a lapao vaya'mogi ali'a falu fala hu'a lapatetesagetapae'mo no'apifi'mo hanege hanege huno hanesiya no'apifi'mo

faletapa haigayanagi. <sup>10</sup> Mago vekamo'mo aise yate'mo alagepa huno yagai'nisiya'mo'mo ani kava huno alopa yate'e'mo alagepa huno yagaigiye. Mago vekamo'mo aise yate'mo alagepa huno o'yagai'nisiya'mo'mo ani kava huno alopa yate'e'mo alagepa huno o'yagaigiye. <sup>11</sup> Lapakaemo ma mopafi hosu monile'mo alagepa hutapa no'yagaisayana ina la'mo lama ge monimo alino lapamigiye. <sup>12</sup> Alu vaya'ai yate'mo alagepa hutapa yagaita o'apate'nisayana ina la'mo lapakaitapi ya'mo alino lapamigiye. <sup>13</sup> Ali'ya'mo ne'aliya vekamo'a lole ali'ya aepa vekala'ani gemo afiteni akame huno ali'ya'mo afa'a o'aligiye. Mago vekae'mo hau'nisigeno alu vekae'mo hosu aipamo kalino ategaiye. Mago vekamo ge'amo ne'afisiyana alu vekae'mo akame'yamo amigiye. Goti ali'ya'ale'e moni ali'yate'e'mo afa'a o'maigae, huno hapa pai'niye. <sup>14</sup> Falasi vaya'mogimo monie'mo hapa'ye nehiya vaya'mogi ani muki hu'niya ge'amo afite'apae'mo apaipamo le'a ate'nae. <sup>15</sup> Yesu'a apakaefe'mo, lapakaemo vaya'ai apaulagale'mo kanale vaya'mo maisayafe'mo muki kava'mo nehaya'monanafa Goti'a lapaipafi'mo ne'age. Vaya'mogimo mago kavafe'mo agi'ale'mo ali'a ne'asagaya'monanafa Goti aulagale'mo alagi hosu'niya kava'mo hane'niye. <sup>16</sup> Ke'aepa ge'e Gotitegati gemo alini e'a ae'a hakalo hu'a hapa nepaiya vaya'ai ge'api'e'mo haneme haneme ne'egenoe'mo Yoni'a afole ai'niye. Yoni'a afole ai'niya afinateti'mo Goti'a yagaino ne'apateya kavafe'mo alagepa faigoko ge'amo

aeta hakalo huta hapa paime hapa paime eta hemeni'e'mo hapa nepaunage'apae'mo muki vaya'mo afela vayakana hu'a apaya mukiki hu'a hai'a nefalae. <sup>17</sup> Ani gemo nehuva'monanafa koku'na'e ma mopa'e'mo hano hisiya kava'mo alagi kana osu'niya'monanafa ke'aepa gemo'a aise ya'ato'amo hano hisiyafe'mo lusi kava huno mago'e huno kana hu'niye.

<sup>18</sup> Haiya vaya'mogimo a'ne'apimo hapa fai'a apatalete'a alu a'nemo ne'alisafi kumai kava'mo nehae. Haiya vekamo'a hafaino atale'nisiya a kanomo ne'alisifi kumai kava'mo nehiye, huno hapa pai'niye.

*Kagemi ya'e veka'e Layosi'efe'mo anava gemo hu'niya gemae*

*(Mt 5:31-32; 19:9; Mk 10:11-12)*

<sup>19</sup> Yesu'a, mago kagemi ya'e vekamo'a muki afina'mo alagepa kukenamo hogote kukena'ageke'mo alino vaige alagepa ne'ya'age'mo nege huno mai'niye.

<sup>20</sup> Mai'nigeno'ae'mo mago vekamo agi'amo Layosi'mo ne'yafe'mo hau'nigeno'ae'mo aukaya nehiya vekamo lusi amu'mo ale'niye. Mago vaya'mogimo ani vekamo avaleli u'a kagemi ya'e vekamo lafi hi'yana'amo malaga havae'a ate'nageno havaeno mai'neni'ae'mo

<sup>21</sup> hi'yalamuteti'mo asagauno aisiya ne'ya atupamo alino nesiyafe'mo mai'niye. Mai'nige'apae'mo kalamogi e'a amute'mo sagani sagani hu'a ne'a mai'nae. <sup>22</sup> Afa'a mai'neni' aukaya nehiya vekamo fali'nige'apae'mo enisole vaya'mogi emi e'a avaleli hai'a koku'napi



Emalehamu haopale'mo ate'nageno mai'niye. Ani kava'mo huno kagemi ya'e vekamo fali'nige'apae'mo alini u'a ki'a ate'nae. <sup>23</sup> Ata kopi'mo lamino mai'nigeno lusi kava huno agafu nekigeno'ae'mo alino maku huno ageyana Emalehamu haopale'mo Layosi'mo avaleli hai'a ate'nageno Emalehamu'e'mo mai'na'ageno anake'niye. <sup>24</sup> Anaketeno'ae'mo alopa gefati'mo keya aino'ae'mo, Naginago afo Emalehamuvo, kahau huka nateteka Layosi'mo alika ategeni uno ati yagaina ayateti'mo anipi'mo aeteno alinino emineno, navenafu'nale'mo malesigeno falu nahaino. Ata kopi'mo mai'nogeno lusi nagafu'mo nekiye, huno ha pai'nigeno <sup>25</sup> Emalehamu'a naginago mafa'neo, kagesa afika ho huvo. Kagaemo ma mopafi mai'nekae'mo muki afina'mo alagepa ya'age'mo alika mai'nanageno Layosi'a hosu ya'age'mo alino mai'niya'monanafa hemenimo alagepa huno mai'nigeka kagaemo lusi kava huno kagafu nekiye. <sup>26</sup> Mago'e gemo hane'niyana Goti'a folagapi'mo mago lusi kalokalopamo male'niyanage'a ma kote mai'naya vaya'mogi lakae'a kagaetegamo o'visage'a kagae kote mai'naya vaya'mogi lakae'a ma kotegamo o'megae, huno ha pai'nigeno'ae'mo <sup>27</sup> Kagemi ya'e vekamo'a mago'e huno ge huno'ae'mo, naginagomo, kahao ke hovanagi, Layosi'mo alika ategeni'ao afo'nimo notegamo uno lamino hapa paino. <sup>28</sup> Faefu'a konaga'nimogi mai'nayanageno uno, ehetapiye, huno hapa paisige'a afite'apae'mo mani lusi kava huno apakafu kisiya kote'mo emi o'megae, huno ha

pai'nigeno <sup>29</sup> Emalehamu'a, Mosesa' avo'mo kae male'niya ge'e Gotitegati gemo alini e'a ae'a hakalo hu'a hapa nepaiya vaya'mogi avo'mo kae male'naya ge'e'mo hane'niyanage'a afa'a afigae, huno ha pai'nigeno'ae'mo, <sup>30</sup> Ha'ao, naginagomo, o'afigaya'mofe'mo mago fali'nisiya vekamo'mo he tinuno hapa paisige'apaeke'mo afite'a apaipamo ali'a afe legae, huno ha pai'nigeno'ae'mo, <sup>31</sup> Mosesa' avo'mo kae male'niya ge'e Gotitegati gemo alini e'a ae'a hakalo hu'a hapa nepaiya vaya'mogi avo'mo kae male'naya ge'e'mo o'afisayana mago fali'nisiya vekamo'a he tinuno hapa paisiya gemo o'afigae, huno ha pai'niye, huno Yesu'a hapa pai'niye.

## 17

*Apayate ne'aliya kavafe'mo hu'niya gemae  
(Mt 18:6-7,21-22; Mk 9:42)*

<sup>1</sup> Yesu'a ge'lamo ne'afiya vaya'aife'mo, Vaya'mo apayate aligaya'monanafa apayate alisaya vaya'mo vaehae, hu'na, lusi hanageke ya'mo aligae. <sup>2</sup> Lusi hanageke ya'mo aligaya'monanafa mago vekamo'a ani agufa aise mafa'nemo'a hosu kava'mo hisiyafe'mo hogoteno ayate'mo o'ali'nisige'apae'mo atafau'a alopa yafate'mo nofi aete'a lugo'afi'mo aete'a alini u'a solovala anipi'mo yaga au'a atalesageno'ae'mo aise hanageke ya'mo aligiye. <sup>3</sup> Lapakaitapile'mo alagepa hutapa yagaitapa lapateyo. Konagakamo'mo kagaetegamo hosu kava'mo hu'nisigekae'mo hosu kava'mo hu'nane, huka ge hauvo. Aipamo alino

afe lesigekae'mo hosu kava'amo alika atalo.  
4 Konagakamo'mo magoke felugamo seveni'a afina'mo kagaetegamo hosu kava'mo huteno seveni'a afina'mo eno'ae'mo, kagaetegamo hosu kava'mo hu'novanage'na mago'e hu'na ani agufa hosu kava'mo osuguve, huno hisigekae'mo hosu kava'amo alika atalo, huno hapa pai'nige'a  
5 apa vaya'amogi, lagesa afita fatago hu'nona kavatile'mo mago'e huka alika ko sika lato, hu'a ha pai'nageno 6 Ala kava ne'mo'a, lapakesa afitapa fatago hu'nisaya kava'mo aise avina yakana huno hane'nisiyana mago yosae'mo, kagae'e hafuyaka'e'mo aika vakaika lamika anipi'mo halate hago, hutapa hisageno'ae'mo getapimo afa'a afigiye, huno hapa pai'niye.

*Ali'ya'mo ne'aliya vaya'aife'mo apava gemo hu'niya gemae*

7 Lapakaepati'mo kayo kayo vekatapimo'a mopafi'mo ai'yumo ai'nisifi sipisipile'mo yagaino apate'nisifi huno mai'nenosigekae'mo, malage huka haikeka hi'yalamute'mo mai'neka ne'ya'mo no, huka ha paigapiye. 8 Ha'ao, ani gemo osugana'monanafa hogoteka ne'ya'nimo kaeka hatika nate'neka ali'ya'mo alisana kukenakamo alika vaili'neka ne'ya'nimo alinikeka namiyo. Namige'na netesugeka kagaemo henaga'amo negane, huka ha paigane. 9 Ge'amo akame nehiya'mofe'mo kahao ke hove, huno hugifiye. Ha'ao. 10 Ani kava'mo hutapa muki gemo Goti'a lapa pai'niya ge'amo afitetapae'mo akame hutetapa ani gemo hutapae'mo, ali'ya'mo ne'aluna

vaya'age'mo mai'none. Alagepa kava'mo afa'a osu'nona'monanafa ali'yatigeke'mo ali'none, hutapa hiyo, huno hapa pai'niye.

*Yesu'a teni'a vaya'mo lepalosi ya'mo hapau'niya vaya'mo alino alagepa huno apate'niya gema*

<sup>11</sup> Yesu'a Yulusalemu taonifi'mo ugefe'mo Samaliya ko'mo hanete Galeliya ko'mo hanete hutegeni folagapi hane'niya kate'mo uno <sup>12</sup> mago taonifi'mo haino falegefe'mo nehige'apae'mo teni'a lepalosi vaya'mo e'a fotu hugefe'mo muga afagi'ale'mo e'a he ti'a mai'ne'apae'mo <sup>13</sup> alopa geleti'mo, Yesuvo, Ala kava nene, kahau huka lato, hu'a ha pai'nageno <sup>14</sup> Yesu'a apaketen'ae'mo, utapa mono hu'a ne'apataya vaya'aina lapakufamo alita apave liyo, huno hapa pai'nige'apae'mo kategamo ne'vageno'ae'mo apakufalafa'mo alino hamale'niye. <sup>15</sup> Ani vayapati'mo mago vekamo'a alino agufalegamo ageyana agufalafa'mo alino hamale'nigeno ageteno'ae'mo aino atagi neno ne'eno'ae'mo alopa gefati'mo Goti agi'ale'mo alino asaga hulino eno <sup>16</sup> Yesu aiyafi'mo ago'ya faiteno hao ke he'niye. Ani vekamo Samaliya kotega vekae. <sup>17</sup> Yesu'a ani vekamo ageteno'ae'mo, teni'a vaya'mo ali'na alagepa hu'na apate'novana naeni'a vaya'mo haiya'alega mai'nae. <sup>18</sup> Na kava higeno'ae'mo mani magoke alu nofi vekamo'a Goti agi'ale'mo alino asaga huno atesiyafe'mo e'niye, huno hapa paiteno agaefe'mo, <sup>19</sup> kagesa afika fatago hu'nana

kavakamo'mo alino alagepa huno kate'niyanagi  
he tika afa'a uvo, huno ha pai'niye.

*Goti'a yagaino ne'apateya kavafe'mo ava gemo  
hu'niya gemaē*

*(Mt 24:23-28,37-41)*

<sup>20</sup> Mago Falasi vaya'mogimo Yesufe'mo, hainu  
afina'mo Goti'a yagaino apatesiya kava'mo afole  
aigiye, hu'a afi ge'nageno'ae'mo, Goti'a ya-  
gaino apatesiya kava'mo afole aisiya'mo'mo  
muki vaya'mogimo apaulagafati'mo o'agegae.  
<sup>21</sup> Vaya'mogi, manile afole ai'niye, hu'a osuge,  
mugalega afole ai'niye, hu'a osuge hu'a os-  
ugae. Afiyo, Goti'a vaya'ai apaipafi'mo yagaino  
ne'apate, huno hapa pai'niye.

<sup>22</sup> Ge'amo ne'afiya vaya'aife'mo, henaga'amo  
lapakaemo, Vemo Mafa'nemo aise afina'mo  
agesunafe'mo nehune, hutapa hugayana  
o'nagegae. <sup>23</sup> Mago vaya'mogi lapakaefe'mo,  
mugalegamo utapa ageyo, hu'a lapa paige,  
manile etapa ageyo, hu'a lapa paige  
hisagetapae'mo ge'apimo afitetapa utapa  
apakame osiyo. <sup>24</sup> Alino alave alave  
nehigeno'ae'mo muki koku'nate'mo aeno  
ha lege'apae'mo muki vaya'mogi ne'agaya  
kava huno Vemo Mafa'nemo eminesige'a  
agegae. <sup>25</sup> Eminegaiya'monanafa hogoteno lusi  
agafu kisiya ya'mo ne'alisige'apae'mo hemeni  
afina'mo mai'naya vaya'mogimo apakame'yamo  
amigae.

<sup>26</sup> Noa'a mai'niya afina'mo haiya agufa  
kava'mo hu'a mai'nafi Vemo Mafa'nemo  
afina'e'mo ani agufa kavake'mo hu'a

maigae. <sup>27</sup> Ne'ya'mo nege ani'mo nege a'mo alige a'mafa'nemo lagauli'a uge hume hume ne'ageno'ae'mo Noa'a sipifi'mo haino mai'nigeno'ae'mo ani'mo heteno muki vaya'aina ago aeno apati kae'niye. <sup>28</sup> Ani kava hu'a Loti'a mai'niya afina'mo ne'ya'mo nege ani'mo nege mago ya'mo miya faige maketi huge hoyamo vaige no kige hume hume ne'ageno'ae'mo <sup>29</sup> Loti'a Sotomi taonifati'mo ataleno ne'vigeno'ae'mo ani afina'mo ata'e ata neleya yafa'e'mo ko aigekana huno koku'napati'mo emineno muki vaya'mo apaleno apasaga li'niye. <sup>30</sup> Ani agufa kavake'mo hu'a mai'nisageno Vemo Mafa'nemo afole aigiye. <sup>31</sup> Ani afina'mo kumatega mai'nisaya vaya'mogi no'apifati'mo kagemi ya'apimo alisayafe'mo fale'a ohaiyo. Hoyalega mai'nisaya vaya'mogi no'apilega halate ai'a atagi ne'a o'viyo. <sup>32</sup> Lapakaemo Loti a'a'mo'mo hu'niya kavafe'mo lapakesa afitapa ho hiyo. <sup>33</sup> Ina lagimo ma mopafi'mo alagepa hu'a maige maige hu'a maisaya kavate'mo yagai'a ne'atesafigeno alagepa hu'a ne'maisaya kava'apimo hano hugiya'monanafa ina lagimo alagepa hu'a ne'maisaya kava'apimo atale'nisafige'a alagepa hu'a maisaya kava'apimo aligae. <sup>34</sup> Nagaemo lapa pai'nae'mo, ani hani'ilagamo lole vekala'mo magoke hipale'mo lokae'ana havae'nisa'apati'mo mago vekamo avaleli'a ute'a mago vekamo ategae. <sup>35</sup> Lole atala'mo magokepi lokae'ana ali'ya'mo ne'alisa'apati'mo mago a kanomo avaleli'a ute'a mago a

kanomo ategae. <sup>36</sup> Lole vekala'mo hoyafi'mo lokae'ana mai'nisa'apati'mo mago vekamo avaleli'a ute'a mago vekamo ategae, huno hapa pai'nige'apae'mo, <sup>37</sup> Ala kava nene, haiya'alegamo ani agufa kava'mo afole aigiye, hu'a afi ge'nageno'ae'mo, afu anaga'mo kefa'apimo hane'niya yategamo hakiki anaga'mo haleli e'a ali'a anupa hu'a ne'maiye, huno hapa pai'niye.

## 18

*Kogu a'e agoti gemo ne'afiya veka'efe'mo anava gemo hu'niya gemae*

<sup>1</sup> Agaemo vaya'mogimo muki afina'mo nunumu'mo hisaya kavafe'mo alaga'mo hapaesige'a o'atalesaya kavafe'mo ani agufa aeno kalafefa gemo huno hapa pai'niye. <sup>2</sup> Agaemo, mago agoti gemo ne'afiya vekamo mago taonifi'mo mai'neni Gotife'mo koli osuge muki vaya'aife'mo koli osuge huno mai'niye. <sup>3</sup> Mai'nigeno'ae'mo ani taonifi'mo mago kogu a kanomo'mo muki afina'mo ani vekalegamo uno ha paino'ae'mo, kame huno ne'nateya vekamo'a nagaetegamo hosu kava'mo nehigi alika fako huka la'ato, huno ha paige ha paige huno mai'niye. <sup>4</sup> Hogoteno ha o'maeno afa'a mai'niyana henaga'amo aipafi'mo agesa afino'ae'mo, Gotife'mo koli osuge vaya'aife'mo koli osuge hu'nova'monanafa <sup>5</sup> mani kogu a kanomo'a lusi kava huno alaga ne'nahaeya agufa gemo nehiyanage'na afa'a ali'na fako hu'na ategauve. Ali'na fako hu'na o'atesuvana

muki afina'mo ege ege huno maisigeno mago'e huno lusi alaga'mo nahaegaiye, huno agesa afi'niye. <sup>6</sup> Ala kava ne'mo'a, hosu vekamo'a agoti gemo ne'afisiya vekamo ge'amo afiyo. <sup>7</sup> Goti'a lekana paino apate'niya vaya'mogi muki feluga'a'e hani'ilaga'a'e'mo aukaya hu'a ge huge huge nehisageno'ae'mo ani kava'mo huno afiteni alino fako huno apateteno afa'a hapa o'maesifiye. Yatala afina'mo apakava maisiyana afa'a hapa maegaiye. <sup>8</sup> Lama gemo lapa nepauve, malage huno alino fako huno apateteno hapa maegaiya'monanafa Vemo Mafa'nemo emineno kahauya huno apakesa afi'a fatago nehaya vaya'mo apakesifiye, huno hapa pai'niye.

*Falasi veka'e takesi monimo ne'aliya veka'efe'mo anava gemo hu'niya gemae*

<sup>9</sup> Mago vaya'mogi Gotife'mo apakesa o'afi'a apakai'apieke'mo apakesa afi'apae'mo, lagaemo alagepa vaya'mo mai'nonanageta lagaitimo laha maegauna'monanafa mago alu vaya'mo afa'a ina agufa vaya'mo mai'nae, hu'a nehaya vaya'aife'mo Yesu'a ina gemo aeno kalafefa gemo huno hapa pai'niye. <sup>10</sup> Lole vekala'moganimo nunumu'mo hisa'afe'mo Yu vaya'ai alopa mono nopi'mo hai'na'ae. Mago vekamo Falasi vekamo maigeno alu vekamo takesi moni ne'aliya vekamo mai'niye. <sup>11</sup> Falasi vekamo'mo he tino mai'neni agai'ae'mo nunumu'mo hu'niye. Nunumu'mo huno'ae'mo, Gotiyo, muki alu vayakana hu'na o'mai'nova'mofe'mo kahao ke nehove. Mago kanale kava'mo osuge aigofe gemo hute'a kumaya'mo alige



kumai kava'mo huge nehaya vayakana hu'na o'mai'nove. Ani takesi monimo ne'aliya vekagana hu'na o'mai'nove. <sup>12</sup> Nagaemo muki sale'ae sale'ae'mo ne'ya'mo nete'na lole afina'mo o'ne'na mo si'nove. Nagaemo muki ali'nova yapati'mo naeni'a ya'mo alite'na magoke ya'mo nekamuve, huno nunumu'mo hu'niye. <sup>13</sup> Hu'niya'monanafa takesi monimo ne'aliya vekamo afagi'ale'mo he tino mai'nen alino maku huno o'age'nen haifi'yale'mo ne'amagino'ae'mo, Gotiyo, alagi hosu vekamo mai'novanagi kaipamo lanitani huka nateteka kahau huka nato, huno nunumu'mo hu'niye. <sup>14</sup> Lapa nepauve, Goti'a takesi moni ne'aliya vekae'mo, naulagale'mo fatago vekamo mai'nane, huno ha pai'nigeno no'alegamo uno fatago vekamo mai'niya'monanafa alu vekamo mago ya'mo o'alino afa'a u'niye. Goti'a muki vaya'mogimo apakai'api apaki'apile'mo ali'a asaga hu'a ne'atesaya vaya'ai apaki'apile'mo alino afepi apategaiya'monanafa Goti'a apakai'api apaki'apile'mo ali'a afepi ne'atesaya vaya'ai apaki'apile'mo alino asaga huno apategaiye, huno hapa pai'niye.

*Yesu'a asago mafa'ne anaga'aife'mo Goti'a lapa maeno, huno hu'niya gemae*

*(Mt 19:13-15; Mk 10:13-16)*

<sup>15</sup> Yesu'a asago mafa'ne anaga'ai apakufale'mo aya'mo malesiyafe'mo apavaleli'a ne'age'apae'mo ge'amo ne'afiya vaya'mogi apakete'apae'mo ge hapau'nae.

<sup>16</sup> Ge hapau'naya'monanafa Yesu'a aise

mafa'ne'aife'mo, nagaetegamo eyo, huno huteno, ka akanitapa o'apatetapa afa'a apatalege'apao nagaetegamo o'meyo, hutapa osiyo. Goti'a yagaino ne'apateya kegi'yafi'mo ani agufa mafa'negana vaya'mo hai'a maigae. <sup>17</sup> Lama gemo lapa nepauve, Vaya'mogi Goti'a yagaino ne'apateya ya'mo aise mafa'nemogi ne'aliya kava hu'a no'alisayana Goti'a yagaino ne'apateya kegi'yafi'mo afa'a fale'a ohaigae, huno hapa pai'niye.

*Lusi kagemi ya'amo hane'niya vekamo'mo  
Yesutegamo e'niya gemae*

*(Mt 19:16-30; Mk 10:17-31)*

<sup>18</sup> Mago yagaino ne'apateya vekamo'a Yesufe'mo, alagepa tisao, alagepa hu'na maige maige hu'na maisuva ya'mo alisuvafe'mo na agufa kava'mo hisuve, huno afi ge'nigeno'ae'mo, <sup>19</sup> na kava hige'kae'mo nagaefe'mo alagepa tisao, huka nehane. Ma mopafi vayapati'mo mago alagepa vaya'mo o'mai'nafa Gotike'mo magoke'age'mo alagepa vekamo mai'niye. <sup>20</sup> Goti ke'aepa ge'amo ago afi'nane,

*kumai kava'mo osuvo, vaya'mo ohapaeyo,  
kumaya'mo o'aliyo, aigofe gemo osuvo,  
itaka'afokala'mogani anaiyafi'mo mai'neka  
ge'animo afiyo,*

huno ha pai'nigeno'ae'mo, <sup>21</sup> mafa'ne mai'nova afinateti'mo muki ani ke'aepa gemo akame hume hume e'na hemeni'e'mo mai'nove, huno ha pai'nigeno <sup>22</sup> Yesu'a ani gemo afiten'o'ae'mo, magoke kava'atokamo aeka aga se'nane. Muki kagemi yakamo alika

maketi huge'a miya faitesageka alisana monimo alika fako huka kagemi ya'apimo o'male'nisaya vaya'aina apamigeno'ao alagepa yakamo koku'napi'mo haneno. Ani kava'mo hutekae'mo eka nakame huvo, huno ha pai'nigeno <sup>23</sup> ani gemo afitenoa'e'mo lusi kagemi ya'amo hane'niya'mofe'mo lusi kava huno aipamo'mo kana hu'nigeno <sup>24</sup> hosu augosamo kali'nigeno Yesu'a ageteno'a'e'mo, <sup>25</sup> kamo afugefamo'mo nekaya kapi'mo faleno haisiyafe'mo aise'amo lokiya vai'niya agufa kava'mo hane'niya'monanafa mago kagemi ya'e vekamo'mo Goti'a yagaino ne'apateya kegi'yafi'mo faleno haisiya kava'mo'a mago'e huno lusi lokiya vai'niya kava'mo hane'niye, huno ha pai'nige'a <sup>26</sup> afite'apae'mo, ina lagimo maige maige hu'a maisaya ya'mo afa'a aligae, hu'a afi ge'nageno'a'e'mo, <sup>27</sup> vaya'mogimo alagi osisaya agufa kava'mo Goti'a afa'a hugiye, huno hapa pai'nigeno <sup>28</sup> Pita'a, afiyo, lagaemo muki yatimo ago ataleta eta kakame nehune, huno ha pai'nigeno'a'e'mo, <sup>29</sup> lama gemo lapa nepauve, muki vaya'mogi Goti'a yagaino ne'apateya kavatefe'mo no'apimofi a'ne'apimofi konaga'apimogimofi ita'api afo'apimogimofi mafa'ne'apimofi hu'a apatale'a e'a mai'nisaya vaya'mo <sup>30</sup> ma mopafi mai'nageno'a'e'mo Goti'a lusi kava huno mago'e ya'mo fiku ne'apamiyanageno henaga'amo afole aisiya afina'mo alagepa hu'a maige maige hu'a maigae, huno hapa pai'niye.

*Yesu'a napa tali afina'mo, falite'na he tiguve,*

*huno hapa pai'niya gemae*

*(Mt 20:17-19; Mk 10:32-34)*

<sup>31</sup> Yesu'a tuolofu'a vaya'mo apaote apavalelino uno'ae'mo, afiyo, Yulusalemu taonifi'mo ne'visunageno'ae'mo akeya'vilaga Gotitegati gemo alini e'a ae'a hakalo hu'a hapa nepaiya vaya'mogimo Vemo Mafa'nee'mo ava gemo avo'mo kae male'naya gemo afole aigiye. <sup>32</sup> Avaleli u'a alu vaya'ai apayapi'mo apamisage'apae'mo hosu kigi hu'a atege hu'a faipa hu'a atege apavenatu'na'mo he'a atege <sup>33</sup> nofi kayoteti'mo amagige hute'a kamiti amagisageno faliteno lole'e mago'e afina'mo utesigeno halate he tigiye, huno hapa pai'nige'apae'mo <sup>34</sup> afi'a aeto osu'nae. Ani gemo aepa'amo afi'a aeto osisaya agufa gemo fala ki'niya gemo hane'niya'mofe'mo alagepa hu'a o'afi'nae.

*Yesu'a aulagamo ali hu'niya vekamo alino ayakeno ate'niya gemae*

*(Mt 20:29-34; Mk 10:46-52)*

<sup>35</sup> Yesu'a Yeliko taonimo haopale'mo ne'egenno'ae'mo mago aulaga ali hu'niya vekamo ka agi'nale'mo mai'nenno'ae'mo muki vaya'aife'mo monie'mo aukaya huge huge huno mai'niye. <sup>36</sup> Asole vaya'mo e'a ai'a aga se'a ute ute hu'nageno apaiya gemo afitenno'ae'mo, na agufa kava'mo nehae, huno apafi ge'nige'apae'mo, <sup>37</sup> Yesu'a Nasalasa kotega vekamo ne'e, hu'a ha pai'nageno afitenno'ae'mo <sup>38</sup> alopa gefati'mo ge huno'ae'mo, Nevini'a ala kini vekamo aginagomo Yesuo, kahau

huka nato, huno ge hu'nige'a <sup>39</sup> hogote'a e'naya vaya'mogimo, ge osuka afa'a maiyo, hu'a ge hau'naya'monanafa mago'e huno ge huno'ae'mo, Nevini'a ala kini vekamo aginagomo, kahau huka nato, huno ge hu'nigeno <sup>40</sup> Yesu'a eno he tino mai'nen'ae'mo, avalelitapa eyo, huno hapa pai'nige'apae'mo avaleli'a e'nageno'ae'mo, <sup>41</sup> kagaemo na kava hu'na katesuvafe'mo nehane, huno afi ge'nigeno'ae'mo, Ala kava nene, naulaga'nimo alika ayakeka nato, huno ha pai'nigeno <sup>42</sup> Yesu'a, kaulagamo afa ageka ayako. Nagaefe'mo kagesa afika fatago hu'nana kavakamo'a alino alagepa huno kate'niye, huno ha pai'nigeno <sup>43</sup> malage huno aulagamo ageno ayaketen'akame huno ne'uno'ae'mo Goti agi'ale'mo alino asaga hume asaga hume u'nige'a agete'apae'mo muki vaya'amogimo Goti agi'ale'mo ali'a asaga hu'a ate'nae.

## 19

### *Sakiyasife'mo ava gemo hu'niya gemae*

<sup>1</sup> Yeliko taonifi'mo uno ava'yi huteno ne'vigeno'ae'mo <sup>2</sup> mago vekamo agi'amo Sakiyasi'a takesi monimo ne'aliya vaya'aite'mo yagaino ne'apateya vekamo lusi kagemiya'amo hane'niya vekamo mai'niye. <sup>3</sup> Agaemo haiya agufa vekamofi huno agesiyafe'mo hu'niyana aupa vekamo mai'niya'mofe'mo asole vaya'mogi ae'a akani'nageno'ae'mo o'age'niye. <sup>4</sup> O'ageno'ae'mo aeno apaka seno nagu nagu huno ne'uno'ae'mo mani

kateke'mo egaiyanage'na agegauve, huno agesa afiteno mago yosafi'mo haino mai'neno agesiyafe'mo agava mai'niye. <sup>5</sup> Yesu'a ani mai'niya yate'mo eno he tino mai'neno alino maku huno ageteno'ae'mo, Sakiyasiyo, malage huka emikeno. Hemenimo kagae nopi'mo uta'a maigu'ae, huno ha pai'nigeno <sup>6</sup> malage huno emineno amogaga aiteno avalelino uno no'afi'mo alino falu fala huno ate'niye. <sup>7</sup> Ani kava'mo agete'apae'mo, hosu vekamo nopi'mo hai'niye, hu'a hute'a hagalu hagalu hu'a ge ne'nae.

<sup>8</sup> Sakiyasi'a vaya'ai apaulagale'mo he tino mai'neno'ae'mo, Ala kava nene, ago, kagemi ya'nimo folagapati'mo ali'na fako hu'na kagemi ya'apimo ohane'nisiya vaya'aina apamite'na mago vaya'aife'mo aigofe gemo hute'na kumaya'mo ali'nisuvana fo'a afina'mo ali'na fako hu'na anona'apilefe'mo apamite apamite hu'na ne'apamuve, huno ha pai'nigeno <sup>9</sup> Yesu'a, Emalehamu aginago vekamo mai'niya'mofe'mo ani afina'mo mani afamo anaga'ai apakufamo ago ali'na kati'na apate'nove. <sup>10</sup> Vemo Mafa'nemo'a lageso hu'naya vaya'mo kahauya huno apaketenno apakufamo alino katino apatesiyafe'mo e'niya'mofe'mo ani kava'mo ago afole ai'niye, huno hapa pai'niye.

*Monimo alino apami'niya kavafe'mo aeno kalafefa gemo hu'niya gemae*  
(Mt 25:14-30)

<sup>11</sup> Ani gemo afitageno'ae'mo Yulusalemu taoni haopale'mo ago uno ava'yi hu'niya'mofe'mo hemenitomo Goti'a yagaino ne'apateya kava'mo

ago afole aigiye, hu'a apakesa afi'naya'mofe'mo Yesu'a ina gemo aeno kalafefa gemo huno hapa pai'niye. <sup>12</sup> Mago yagaino ne'apateya nofi vayapati vekamo'a, Ala kini vekamo afagi kotega mai'niyategamo visugeno lekana paino natesige'na halate ai'na atagi ne'na e'na ala kini vekamo maiguve, huno agesa afi'niye. <sup>13</sup> Agaemo teni'a vaya'mo ali'ya'amo ne'aliya vaya'aife'mo ge hu'nige'a e'nageno'ae'mo magoke magoke monimo alino fako huno apamite apamite huno apamiten'ae'mo, mani monileti'mo ali'ya'mo aligeno'ao akamelegati'mo mago'e monimo afole aino. Ali'ya'mo alime alime ne'vige'na eno, huno hapa pai'niye. <sup>14</sup> Hapa paiteno u'niya'monanafa vaya'amogimo hosu apaipamo kali'a atete'apae'mo mago vaya'mo apa'mo ali'a apate'nage'a u'a Ala kini vekae'mo, ani vekamo'mo yagaino latesiyafe'mo olahau'niye, hu'a ha pai'nae. <sup>15</sup> Ha pai'naya'monanafa Ala kini vekamo'a ge'apimo o'afino ala'apimo yagaino apatesiya vekae, huno huteno lekana paino ate'nigeno aino atagi neno eno hogoteno apamiten'ae'mo u'niya monileti'mo akamelega'amo na magi monimo afole ai'nifi huno agesiyafe'mo muki vaya'aife'mo ge hu'niye. <sup>16</sup> Mago vekamo hogoteno eno'ae'mo, Ala kava nene, magoke monimo nami'nana monileti'mo akamelega'amo teni'a monimo ali'nove, huno ha pai'nigeno'ae'mo, <sup>17</sup> alagepa huka ali'ya'nimo ali'nane. Aise yate'mo alagepa huka yagai'nana'mofe'mo teni'a taonile'mo yagaisanafe'mo lekana pai'na kate'nove,

huno ha paitegeno <sup>18</sup> agae akamelegamo mago vekamo'a eno, Ala kava nene, magoke nami'nana monileti'mo akamelega'amo monimo faefu'amo ali'nove, huno ha pai'nigeno'ae'mo, <sup>19</sup> faefu'a taonile'mo yagaisanafe'mo lekana pai'na kate'nove, huno ha paitegeno <sup>20</sup> anile mago vekamo'a eno, Ala kava nene, nami'nana monimo afa'a ali'nove. Hanipausifi'mo ai'na fala ki'na ali kate'nove. <sup>21</sup> Kagaemo lokiya kaipa vekamo mai'neka mago vaya'mogi male'naya ya'mo alige mago vaya'mogi vai male'naya hoyafati'mo alige nehana'mofe'mo kagaefe'mo kolikamo hute'nae'mo fala ki'na ali'nove, huno ha pai'nigeno'ae'mo, <sup>22</sup> kagaemo hosu ali'ya'mo ali'nane. Kagaemo naha pai'nana gekaleti'mo agoti hu'na kategauve. Ago nage'nanana lokiya naipa vekamo mai'ne'na mago vaya'mogi male'naya ya'mo alige mago vaya'mogi hoyafati'mo alige hu'na mai'nogeka nage'nane. <sup>23</sup> Nage'nana'mofe'mo na kava higeka moni'nimo monimo ne'malaya nopi'mo o'male'nane. Male'nanesinana akamelagati'mo mago'e monimo aluvesine, huno ha paiteno <sup>24</sup> he ti'a mai'naya vaya'aife'mo, moni'amo alinita etapa teni'a monimo ali'niya vekamo amiyo, huno hapa pai'nige'apae'mo, <sup>25</sup> Ala kava nene, teni'a monimo ago ali'niye, hu'a ha pai'nageno'ae'mo, <sup>26</sup> lapa nepauve, ali'nisaya vaya'aina mago'e hu'na ali'na apamiguve. O'ali'nisaya vaya'ai apayapati'mo hapa falegauve, huno hapa paiteno'ae'mo, <sup>27</sup> inagi kame vaya'nimo agaemo yagaino latesiyafe'mo



olahau'niye, hu'a hu'naya vaya'mo apavalelita etapa naulagale'mo kamiti apamagiyo, huno hapa pai'niye, huno Yesu'a hapa pai'niye.

*Yesu'a Yulusalemu kotegamo ne'vige'apae'mo, ala kini vekae, hu'a hu'naya gemae*

*(Mt 21:1-11; Mk 11:1-11; Yo 12:12-19)*

<sup>28</sup> Ani gemo hapa paiteno'ae'mo hogoteno Yulusalemu taonifilagamo ne'vaya kate'mo uno <sup>29</sup> Metapesi taoni'e Metani taoni'e'mo hane'niya avemo agi'amo Alifi'aepa ave aiyafi'mo hane'niya kote'mo uno ava'yi huteno ge'amo ne'afi'a vekala'anife'mo, <sup>30</sup> lanaulagale'mo hane'niya taonifi'ina utana hai'ao. Utana ava'yi hutetanae'mo agesa'ana mago aikeli hosimo ae'a ate'nisaya hosile'mo mago vekamo'a mai'nenno alinitata osu'niya hosimo mai'nisigetana agetetanae'mo hatu maetana avalelitana e'ao. <sup>31-32</sup> Mago vekamo'a, na agufa kava hisa'afe'mo hatu maetana ne'ata'ae, huno lanafi gesigetanae'mo, Ala kava ne'mo'a ali'ya'amo alisiyafe'mo higeta'aene, hutana ha pai'ao, huno hana paiteno alino anate'nige'ana u'ana hana pai'niya kava'mo huno mai'nige'ana age'na'ae. <sup>33</sup> Aikeli hosimo nofi'amo hatu mae'ana ne'ata'age'apae'mo hosimo afo'amogimo, na agufa kava'mo hisa'afe'mo hatu maetana ne'ata'ae, hu'a anafi ge'nage'anae'mo <sup>34</sup> Ala kava ne'mo'a ali'ya'amo alisiyafe'mo higeta'aene, hu'ana hapa paite'ana <sup>35</sup> Yesutegamo avaleli'ana e'na'ae. Kukena'animo asagi'ana aikeli hosile'mo yakai male'ne'ana Yesu'mo asaga hu'ana fai'ana ate'na'ageno <sup>36</sup> mai'nenno alinino

ne'vige'apae'mo visiya kate'mo kukena'apimo asagi'a yakai'a ateme ateme u'nae. <sup>37</sup> Yulusalemu haopalega Alifi'aepa aveleti'mo uno lamigefe nehige'apae'mo muki vaya'mo ge'amo ne'afiya vaya'amogi aepa fai'a apamogaga aite'a himamu'aleti'mo no'agaya agufa aune kava'mo hu'nige'a age'naya'mofe'mo alopa gefati'mo hute'a Goti agi'ale'mo ali'a asaga hume hume u'nae. <sup>38</sup> Apakaemo,

Ala kava ne'mo agi'alefe'mo ne'eyanagi ha maeno. Goti'a lagaefe'mo aipamo'mo falu hino. Goti'a hogote vekamo anaga vekamo agi'ale'mo alitapa asaga hiyo,

hu'a huge huge hu'a mai'nae. <sup>39</sup> Mago Falasi vaya'mo asole vaya'e'mo magokepi lokae'a u'naya vaya'mogimo, Tisao, gekamo ne'afiya vaya'aife'mo, ge osiyo, huka hapa paiyo, hu'a ha pai'nageno'ae'mo, <sup>40</sup> lapa nepauve, ge osu'a afa'a maisayana yafa'mo'a age aigiye, huno hapa pai'niye.

*Yesu'a Yulusalemu taonifi'mo mai'naya vaya'aife'mo avi'ya'mo hu'niya gemae*

<sup>41</sup> Yulusalemu taonifi'mo uno ava'yi nehuno avi'ya huno'ae'mo, <sup>42</sup> Yulusalemu vaya'mogitapae, Lapakaemo Goti'a alino nanu aeno lapatesigetapa visaya ka'mo agesayafe'mo nahau'niya'monanafa aeno ati kaeno lapate'niyanagetapa afa'a o'agegae. <sup>43</sup> Henaga'amo mago afina'mo afole aisige'apae'mo kame vayatapimogi e'a mopamo kafili u'a muki lapaune hetapa visaya kate'mo male'a akani malegae. <sup>44</sup> E'a ae'a halagape

vaitalesageno mago yafate'mo akalo hu'a male'naya yafa'mo'a alu yafate'mo ohane'nisiya yafa'e vaya'e'mo ali'a mopafi'mo yaga au'a atalegae. Goti'a lapa maesiyafe'mo emine'niyana agetapa aeto osu'naya'mofe'mo kame vayatapimo egae, huno hapa pai'niye.

*Yesu'a alopa mono nopi'mo maketi ne'malaya  
vaya'mo alino hapafaino apatale'niya gemae  
(Mt 21:12-17; Mk 11:15-19; Yo 2:13-22)*

<sup>45</sup> Agaemo Yu vaya'ai alopa mono nopi'mo haino aepa faino maketi ne'malaya vaya'mo alino hapafaino apatale'niye. <sup>46</sup> Agaemo, avo'mo kae male'niya gemo'a huno'ae'mo, *no'nie'mo, nunumu'mo nehaya none, hu'a hugae*, huno avo'mo kae male'niya'monanafa lapakaemo *kumaya vaya'mo e'a fala ki'a ne'maiya none*, hutapa alita hamaletapa ate'nae, huno hapa pai'niye. <sup>47</sup> Muki afina'mo mono nopi'mo alino apaya malege malege huno mai'nige'apae'mo mono hu'a ne'apataya vaya'aite'mo yagai'a ne'apataya vayanagi ke'aepa gemo avo'mo kae'a ali'a apaya ne'malaya vayanagi ala apaki vayanagi hu'a haesaya kafe'mo kahauya hu'a mai'nae. <sup>48</sup> Hu'naya'monanafa muki afa vaya'mogi'e'mo ge'amo afisayafe'mo hapau'niya'mofe'mo haesaya ka'mo o'age'nae.

## 20

*Yesufe'mo, ina la'mo, yagaika apatesana vekae,  
huno lekana paino kate'niye, hu'a afi ge'naya  
gemae  
(Mt 21:23-27; Mk 11:27-33)*

<sup>1</sup> Mago afina'mo Yesu'a Yu vaya'ai alop mono nopi'mo haino alagepa faigoko gemo alino apaya ne'malege'apae'mo mono hu'a ne'apataya vaya'aite'mo yagai'a ne'apataya vayanagi ke'aepa gemo avo'mo kae'a ali'a apaya ne'malaya vayanagi vayatama vayanagi hu'a e'a, <sup>2</sup> haiya agufa alagena yakamo yagaika apatesana ya'mo ali'nekae'mo mani kava'mo nehane. Ina la'mo mani kava'mo huvo, huno kaha pai'niye, hu'a afi ge'nageno'ae'mo, <sup>3</sup> inage'na nagae'e'mo mago gemo lapafi gesugetapae'mo naha paiyo. <sup>4</sup> Yoni'a ani'mo faleno apatesiyafe'mo Goti'a lekana paino ate'nifi vaya'mogi lekana pai'a ate'nae, huno apafi ge'nige'apae'mo <sup>5</sup> apakai'apimo ge huge afige hu'apae'mo, ge'ale'mo na agufa ge huta ha paisune. Goti'a lekana paino ate'niye, huta hisunana na kava higetapa ge'ae'mo lapakesa afitapa fatago osu'nae, huno laha paigiye. <sup>6</sup> Vaya'mogi lekana pai'a ate'nae, huta hisunana afa vaya'mogimo yafa kayoteti'mo lamagigae. Yoni'mo Gotitegati gemo alinino eno aeno hakalo huno hapa nepaiya vekae, hu'a apakesa ne'afiya'mofe'mae, hu'a hute'a <sup>7</sup> ge'ale'mo ae'a atagaina hu'a ha pai'apae'mo, o'afi'none, hu'a ha pai'nageno'ae'mo, <sup>8</sup> naha opai'naya'mofe'mo haiya agufa alagena ya'mo yagai'a ne'apataya vaya'mogi ne'aliya agufa alagena ya'mo ali'ne'nae'mo mani kava'mo nehufi hu'na lapa opaiguve, huno hapa pai'niye.

*Hosu vaya'mogimo hoyale'mo ne'yagaiya*

*kavafe'mo aeno kalafefa gemo hu'niya gemaē*  
(Mt 21:33-46; Mk 12:1-12)

<sup>9</sup> Yesu'a aepa faino aeno kalafefa gemo huno hapa paino'ae'mo, mago vekamo'a nofi hoyamo vai maleteno mago vaya'mogi yagai'a atesageno nofi alagamo afu lesigeno agaemo mago nofi alaga'amo alisige'apae'mo apakaemo mago nofi alaga'amo alisayafe'mo apavaleno apateteno afagi kotegamo uno yatala afina'mo mai'niye. <sup>10</sup> Nofi alagamo ago afu le'nigeno'ae'mo agaemo mago nofi alagamo alisiyafe'mo ali'ya'amo ne'aliya vekamo alino ate'nigeno u'niye. U'nige'apae'mo hoyale'mo ne'yagaiya vaya'mogimo atafau'a amagite'apae'mo, afa'a ataleka uvo, hu'a ha pai'nageno o'alino afa'a ataleno e'niye. <sup>11</sup> Agaemo alu vekamo ali'ya'amo ne'aliya vekamo alino ate'nigeno u'niyana ani agufa kava'mo hu'a amagite'a agaetegamo osisaya agufa kava'mo hute'a ali'a atalageno o'alino afa'a e'niye. <sup>12</sup> Halate mago alu vekamo alino ate'nigeno u'nige'apae'mo lusi kava hu'a amagi'nageno kola'amo'mo hu'nige'a malaga alini u'a yaga au'a atale'nae. <sup>13</sup> Hoyamo afo'amo'mo, nagaemo na kava hisuve. Nahau nayamopafi'mo nahau'niya mafa'ne'nimo ali'na atesugeno visige'apae'mo ge'amo afa'a afigae, huno agesa afi'niye. <sup>14</sup> Hu'niya'monanafa hoyale'mo ne'yagaiya vaya'mogi mafa'ne'amo e'nige'a agete'apae'mo apakai'apimo ge huge afige hu'apae'mo, ani vekamo'mo afo'amo ya'mo aligiya'mofe'mo amagigetao muki ya'amo lagaemo aligunanagi, hu'a hute'a <sup>15</sup> asagauli u'a

malaga atale'ne'a kamiti amagi'nae. Hoyamo afo'amo'mo apakaetegamo na agufa kava'mo hugiye. <sup>16</sup> Eno hoya'ale'mo ne'yagaiya vaya'mo kamiti apamagiteno alino mago alu vaya'aina apamigiye, huno hapa pai'nige'a afite'apae'mo, ha'ao, fiku yanageno ani agufa kava'mo lagaetegamo afole aigiye, hu'a ha pai'nageno <sup>17</sup> Yesu'a aulu hapaeno apaketeno'ae'mo, mukufi'mo avo'mo kae male'niya gemo'a haiya agufa aepa'amo hane'niye. Ani gemo'a huno'ae'mo,

yafateti'mo no'mo nekiya vaya'mogimo mago no'mo nekiya yafafe'mo hu'apae'mo afa yafane, hu'a hute'a ali'a yaga au'a atale'nayana ani yafa'mo hogote yafa'mo alino afole aino ate'niye.

<sup>18</sup> Haiya vaya'mogimo ani yafate'mo asagau'a ne'aisafigeno aino katali katalu huno apatalegaiya'monanafa ani yafa'mo'a haiya vaya'ai apakufale'mo asagauno aisifigeno aino lata paino aise aise huno atalegaiye, huno hu'niye, huno Yesu'a hapa pai'niye. <sup>19</sup> Ke'aepa gemo avo'mo kae'a ali'a apaya ne'malaya vaya'e mono hu'a ne'apataya vaya'aite'mo yagai'a ne'apataya vaya'mogi'e'mo, ani aeno kalafefa gemo lagaefeke'mo hu'niye, hu'a hute'a ani afina'mo kalavusi hu'a ategefe'mo hu'naya'monanafa afa vaya'aife'mo koli hu'nae.

*Takesi monimo amisupiyē, hu'a afi ge'naya gemaē*

*(Mt 22:15-22; Mk 12:13-17)*

<sup>20</sup> Kalavusi hu'a atesaya kavafe'mo yagai'a mai'ne'apae'mo apamasa hisaya vaya'mo ali'a apate'nage'a u'a mai'ne'apae'mo Yesu'a alagepa hu'a e'a mai'nae, huno apakesiyafe'mo aigofe kava'mo hu'a mai'ne'a ge'amo afi'nae. Ge'amo ne'afi'apae'mo, hosu gemo nehisigetae'mo atafauta kalavusi huta ateteta Lomu vekamo yagaino nelateya vekamo avaleta amigune, hu'a hu'nae. <sup>21</sup> Apakaemo, tisao, lagaemo ago kage'nonana lama gemo alagepa huka alika apaya ne'malane. Goti ge'amo akame hisaya kate'mo visaya kavafe'mo lama gekaleti'mo alika apaya ne'malanageta kage'none. <sup>22</sup> Lagaemo Goti ke'aepa ge'amo akame hisunafe'mo takesi monimo gamani vekamo yagaino nelateya vekamo Sisana amisupi o'amisune, hu'a afi ge'nageno <sup>23</sup> humi atesayafe'mo hu'naya gemo afiteno'ae'mo, <sup>24</sup> ani alaga monimo alinitetapa nave liyo. Ani'alaga monile'mo ina la augosa'e agi'e'mo avo'mo kae male'naya agimo hane'niye, huno apafi ge'nige'apae'mo, Sisa agi'e augosa'e'mo hane'niye, hu'a ha pai'nageno'ae'mo, <sup>25</sup> Sisa ya'amo Sisa'mo amitetapa Goti ya'amo Goti'mo amiyo, huno hapa pai'nige'a <sup>26</sup> afite'apae'mo hapau aite'a ge osu'a mai'nae. Apakaemo vaya'ai apaulagale'mo ge'ale'mo hu'a atafau'a ategefe hu'nayana hu'a atafau'a o'ate'nae.

*Yesufe'mo vaya'mo falite'a he tisaya kavafe'mo  
ge hu'a afi ge'naya gema  
(Mt 22:23-33; Mk 12:18-27)*

<sup>27</sup> Mago vaya'mogi, fali'naya vaya'aife'mo he otigae, hu'a nehaya vaya'ai apaki'apimo Satiyusi mono vaya'moge'a Yesutegamo e'nae. <sup>28</sup> E'a Yesufe'mo, Tisao, Mosese'a lagaefe'mo avo'mo kaeno'ae'mo, mago vekamo'a a'mo aliteno mafa'nemo alino o'ateno falitesigeno'ae'mo konaga'amo'mo ani a kanomo aliteno agae aimu'yale'mo mafa'nemo alino apateno. Fiku yanage'a fali'niya vekamo nofi vaya'amo fali'a hano hugae, huno laha pai'niye. <sup>29</sup> Mago afina'mo seveni'a konagamo mai'nae. Nepu'apimo'a a'mo aliteno mafa'nemo alino o'ateno ataleno falitegeno <sup>30</sup> agana'amo'a kogu'amo aliteno ani kava'mo huno mafa'nemo alino o'ateno fali'niye. <sup>31</sup> Ani kava huno napa tali konaga'amo'a ani a kanomo aliteno fali'niye. Ani kava hu'a seveni'a konagamogimo ani a kanomo alite'a atale'a falite'a alite'a atale'a falite'a hu'naya'monanafa mafa'nemo ali'a o'ate'a fali'nae. <sup>32</sup> Henaga'amo ani a kanomo fali'niye. <sup>33</sup> Seveni'a konagamogimo ani a kanomo ali'naya'mofe'mo fali'nayateti'mo he tisageno'ae'mo ani a kanomo ina late'mo maigiye, hu'a afi ge'nageno'ae'mo, <sup>34</sup> ma mopafi vaya'mogimo a'mo alige a'mafa'nemogimo vele'mo maige nehae. <sup>35</sup> Goti'a mago vaya'aife'mo, saufa afina'mo fali'nayategati'mo he ti'a maisaya vaya'mo mai'nae, huno agesa ne'afiya vaya'mo he tisaya afina'mo a'mo o'alige vele'mo o'maige hugae. <sup>36</sup> Ofali'a enisole vayakana hu'a maisayafeke'mo Goti mafa'ne'amo mai'naya'mofe'mo



fali'nayateti'mo halate he tigayana alagi ofaligae.  
<sup>37</sup> Mosese'a aise yosafi'mo ata le'niya kavafe'mo  
 ava gemo huno avo'mo kae male'niyana  
 fali'naya vaya'mo he tigae, huno avo'mo kae  
 male'niye. Mosese'a huno'ae'mo,  
 Ala kava ne'mo Emalehamu Goti'amo'mo  
 maige Aisiki Goti'amo'mo maige Yekopu  
 Goti'amo'mo maige huno mai'niye,  
 huno avo'mo kae male'niye. <sup>38</sup> Agaemo alagi  
 fali'naya vaya'ai Goti'apimo'mo o'mai'nifa afa'a  
 ne'maiya vaya'ai Goti'apimo'mo mai'niye. Muki  
 vaya'amogimo Gotitefe'mo afa'a mai'nae, huno  
 agesa ne'afiye, huno hapa pai'nige'apae'mo  
<sup>39</sup> mago vaya'mo ke'aepa gemo avo'mo kae'a  
 ali'a apaya ne'malaya vaya'mogimo, Tisao,  
 ge'apile'mo alagepa huka aeka atagaina huka  
 nehane, hu'a ha pai'nae. <sup>40</sup> Apakaemo mago'e  
 hu'a loka hu'a afi gesayafe'mo koli hute'a ge hu'a  
 afi oke'a afa'a mai'nae.

*Yesu'a Kalaisi nefe'mo ge huno apafi ge'niya  
 gemae*

*(Mt 22:41-46; Mk 12:35-37)*

<sup>41</sup> Yesu'a, haiya agufa kava'mo huno Kalaisi  
 vekamo'a Nevini akamelegati aginago veka'amo  
 maigiye, hu'a nehae. <sup>42-43</sup> Nevini'a agai'amo  
 Samu mukufi'mo huno'ae'mo,  
 Ala kava ne'mo'a Ala kava ne'nie'mo, lamaga na-  
 haopale'mo fai maima maima ne'uge'nao  
 kame vayakamo apamagite'na ali'na kaiya  
 afe'alumelaga apatesuge'a maigae,  
 huno ha pai'niye. <sup>44</sup> Nevini'a ani gee'mo  
 huno'ae'mo, Kalaisi vekae'mo Ala kava  
 ne'nie, huno ha pai'niya'mofe'mo haiya kava

huno Kalaisi vekamo'a Nevini akamelegati aginago'amo mai'niye, huno apafi ge'niye.

*Yesu'a ke'aepa gemo ali'a apaya ne'malaya vaya'aife'mo hu'niya gema*

*(Mt 23:1-36; Mk 12:38-40; Lu 11:37-54)*

<sup>45</sup> Muki vaya'ai apaulagale'mo ge'amo ne'afiya vaya'aife'mo ina ge huno hapa pai'niye, <sup>46</sup> Ke'aepa gemo avo'mo kae'a ali'a apaya ne'malaya vaya'mogimo hosu kava'mo nehayanagi alagepa hutapa yagaiyo. Apakufamo avaleli'a haisayafe'mo yatala kukenamo ali'a vaite'a umenitata nehaya kavafe'mo hapau'niye. Maketi kumate'mo mai'naya vaya'mogi ge apamamaete'a amuse hu'a ne'apataya kavafeke'mo nehapaiye. Muki mono nopi'e nopi'e'mo hogote siate'mo maige yagita nehayategamo ala apaki vaya'mo ne'maiya yate'mo maige hisayafeke'mo hapau'niye. <sup>47</sup> Apakaemo kogu a'ne'aife'mo humi apatete'a kagemi ya'apimo kumaya alite'a aigofe yatala yatala gemo hu'a nunumu'mo nehae, huno hapa pai'niye.

## 21

*Kogu a kanomo'a ofalinimo male'niya kavafe'mo hu'niya gema*

*(Mk 12:41-44)*

<sup>1</sup> Yesu'a Yu vaya'ai alopa mono nopi'mo mai'nenoe'ae'mo alino maku huno apakeyana kagemi ya'apimo hane'niya vaya'mogi ofalini monimo fiku ne'atalaya kesifi'mo male'nageno apake'niye. <sup>2</sup> Mago kogu a kanomo kagemi

ya'amo alagi o'male'niya a kanomo'a eno lole asagalifa monimo male'nigeno ageteno'ae'mo, <sup>3</sup> lama gemo lapa nepauve, ani kagemi ya'amo o'male'niya kogu a'mo'a male'niya ofalinimo'a muki vaya'mogi male'naya ofalini monimo ago aeno aga se'niye. <sup>4</sup> Kagemi ya'apimo hane'niya vaya'mogi ali'ya'amo ohane'niya monimo male'naya'monanafa kogu a kanomo'a muki moni'amo ne'ya'amo miya faino nesiya moni'e'mo ago male'niye, huno hapa pai'niye.

*Yesu'a alopa mono no'mo he'a halagape vaigae, huno hu'niya gemae  
(Mt 24:1-2; Mk 13:1-2)*

<sup>5</sup> Mago vaya'mo ge'amo ne'afiya vaya'mogi, alagepa yafa'aletike'mo ki malete'a ofalini ne'malaya konali yateti'mo ali'a hu male'naya kanale no'mo hane'niye, hu'a hu'nageno'ae'mo, <sup>6</sup> hemenimo age'naya note'mo hane'niya yafa'mo akalo akalo huno hane'niyana muki yafa'amo ali'a halagape vai'a ali'a atagu fae'a atalegae, huno hapa pai'nige'apae'mo, <sup>7</sup> Tisao, hainu afina'mo ani kava'mo afole aigiye. Hogoteta na agufa alagena kava'mo agetesunageno'ae'mo afole aigiye, hu'a afi ge'nageno'ae'mo, <sup>8</sup> humi olapatesayafe'mo ehetafiye. Alagepa hutapa yagaiyo. Asole vaya'mogi e'a nagi'nimo aete'apae'mo, Kalaisi vekamo mai'nove, hu'a huge, ani afina'mo ago afole ai'niye, hu'a huge hisagetapae'mo apakame osiyo. <sup>9</sup> Mago vaya'mogi kame nehisaya kavafe'mo apava gemo huli'a ege lusi kaveta hisaya kavafe'mo apava gemo

huli'a ege hisagetapae'mo koli osiyo. Ani agufa kavako'mo hogoteno afole aisigetapae'mo hemenimo alagi ago hano hisiya afina'mo hogo nehiye, hutapa osiyo. <sup>10</sup> Mago nofi vaya'mogi alu nofi vaya'mo kame hapaege mago gamani vaya'mogi alu gamani vaya'aina kame hapaege hugae. <sup>11</sup> Muki aupilagamo lusi imima'mo alige kafu hu kava'mo afole aige kaita hapau kava'mo'a aino atagu faeno uneno hisige'apae'mo asole vaya'mo lusi kaita'mo hapauge hugiye. Koku'nate alagena kava'mo agete'apae'mo lusi kava hu'a koli hugae. <sup>12-13</sup> Ani kava'mo afole o'ai'nisige'apae'mo hogote'a apaini hu'a lapatege kalavusi hu'a lapatege mono nokopi'mo agoti hu'a lapatete'a kalavusi hu'a lapatege hugae. Apakaemo nagi'nilefe'mo lapavaleli e'a ala'apimo yagai'a ne'apataya vaya'aitega'e gamani vaya'aitega'e'mo ali'a he ti'a lapatesagetapae'mo nage nava gemo faigoko ge'nimo hapa paigae. <sup>14</sup> Lapakaemo hogotetapa lapakesa afitapae'mo nagaemo ge'apile'mo na agufa gemo ae'na atagaina hu'na hapa paiguve, hutapa lapakesa o'afiyo. <sup>15</sup> Nagai'nimo alagepa hu'a afite'a age'naya gemo ali'na lapamisuetapa hapa paisage'a afite'apae'mo getapile'mo afa'a hu'a ae'a ati kae'a ge osugae. <sup>16</sup> Itatapi afotapimogimo lapavaleli'a uge konagatapimogi lapavaleli'a uge vayatapimogi lapavaleli'a uge hu'a lapavaleli u'a agoti hu'a lapatesage'apae'mo mago vaya'amogi lapakaemo lapaesagetapa faligae. <sup>17</sup> Nakame nehaya'mofe'mo muki vaya'mogi apaini

hu'a lapategaya'monanafa <sup>18</sup> alagepa hutapa maisageno magoke lapayoka'mo lageso osugiye. <sup>19</sup> Lapakaemo alagepa kate'mo o'ataletapa lokiya waitapa maisayana maige maige hutapa maisaya ya'mo aligae.

*Yesu'a, Yulusalemu taonifi'mo lusi hanageke ya'mo afole aigiye, huno hu'niya gemae*  
(Mt 24:15-21; Mk 13:14-19)

<sup>20</sup> Lapakaemo apakesage'apae'mo ati vaya'mo e'a Yulusalemu taonifi'mo fai'a ku aisagetapa apaketetapae'mo, muki ani taonifi'mo mai'naya vaya'mo hapae'a hano hu'a apatalesaya afina'mo alagi hogo hiye, hutapa lapakesa afiyo. <sup>21</sup> Ani afina'mo Yutiya kotega mai'nisaya vaya'mo apaune hetale'a avelegamo haiyo. Alopa taonifi'mo mai'nisaya vaya'mo atale'a apaune he'a viyo. Malaga mai'nisaya vaya'mogimo Yulusalemu taonifi'mo ohaiyo. <sup>22</sup> Goti mukufi'mo avo'mo kae male'naya gemo afole aisiyafe'mo Goti'a ani afina'mo anona'apilefe'mo lusi kayo'mo apamigiye. <sup>23</sup> Goti'a ani vaya'aife'mo aipamo leno apateteno apakafu kisiya kayo'mo apamigiya'mofe'mo vaehae, apaipagu'e mai'nisaya a'ne'e mafa'nemo nu ne'apamisaya a'ne'efe'mo nahau hu'na ne'apatove. <sup>24</sup> Ati vaya'mogimo mago vaya'amo naipeleti'mo lugo'apimo he'a hatagaute'a mago vaya'amo kalavusi hu'a apatete'a muki nofi vaya'aitegamo apavaleli u'a apategae. Alu nofi vaya'mogimo e'a Yulusalemu taonifi'mo kame hute'a ali'a hosu hu'a ateme ateme ne'visageno kana'apimo alagi hano hugiye.

<sup>25</sup> Koku'napi'mo alagena kava'mo yege lenagi kai lenagi kanefi tenagi huno aeto aeto agufa kava'mo afole aigiye. Solovala ani'mo'a aino holakau holakau huno uneno nehisiqe'apae'mo muki kotegamo mai'naya vaya'mogi haiya kava hisune, hu'a hute'a lusi kava hu'a koli hugae. <sup>26</sup> Koku'napi mai'naya apaune vaya'mo lokiya'apimo aino atagu faisige'apae'mo, na agufa kava'mo ma mopafi'mo afole aigefe nehifi, hu'a apakesa afite'apae'mo fali'naya vayakana hu'a maigae. <sup>27</sup> Ani kava'mo hutesigeno'ae'mo Vemo Mafa'nemo'a hiyate'mo himamu'a'e lusi ha le konali ya'a'e'mo eminesige'a agegae. <sup>28</sup> Ani kava'mo aepa faino afole aisigetapae'mo hatu maeno lapatesiya afina'mo alagi hogo hugiya'mofe'mo alita maku hutapa agetetapae'mo lapamogaga aiyo.

<sup>29</sup> Agaemo aeno kalafefa gemo huno hapa paino'ae'mo, lapakaemo fiki yosa'e muki alu yosale'e'mo ageyo. <sup>30</sup> Saufa anupamo malegetapa agetetapae'mo, ko'mo ne'aiya afina'mo alagi hogo hiye, hutapa nehae. <sup>31</sup> Ani kava huno ani kava'mo afole aisigetapa agetetapae'mo, Goti'a yagaino apatesiya afina'mo alagi ago hogo hiye, hutapa hugae. <sup>32</sup> Lama gemo lapa nepauve, hemeni afina'mo mai'nisaya vaya'mo ofali'a afa'a mai'nisageno muki ani agufa kava'mo afole aigiye. <sup>33</sup> Koku'na'e ma mopa'e'mo hano hugiya'monanafa ge'nimo alagi hano osuno afa'a hanege hanege huno hanegaiye.

<sup>34</sup> Lapakaitapile'mo alagepa huta yagaitapa lapateyo. Fiku yanagetapa lusi yagita huge

lokiya ani'mo netetapa negi nagi gemo huge ma mopafi yafe'mo lapakesa ala'amo afige lapausoli huge nehisageno mani afina'mo malage huno kesi kateti'mo afole aigiye. <sup>35</sup> Ma mopafi muki haopalegamo mai'naya vaya'aitegamo ane'ai'mo'a yagagafamo ne'atafaiya agufa kavakana huno apatafaugiye. <sup>36</sup> Inagi muki afina'mo kava yagaitapa maiyo. Muki afole aisiya kava'amo aetapa kasalo paetapa Vemo Mafa'nemo aulagale'mo he titapa maisayafe'mo nunumu hiyo, huno hapa pai'niye.

<sup>37</sup> Muki afina'ae afina'ae'mo alopa mono nopi'mo alino apaya malege malege huno mai'nigeno hani'mo nehigeno'ae'mo Alifi'aepa avelegamo uno haino havaetale havaetale huno mai'niye. <sup>38</sup> Muki afina'mo kotilamiyapi'mo muki vaya'mogimo ge'amo afisayafe'mo agaetegamo ege ege hu'a mai'nae.

## 22

*Yutasi'a kutulu ya'mo ali'niya gemae*

*(Mt 26:1-5,14-16; Mk 14:1-2,10-11; Yo 11:45-53)*

<sup>1</sup> Lusi ne'ya'mo yagita nehaya hopa afina'mo aeno apafu noleya peleti mayamo ne'naya afina'mo agi'amo Pasova afina'mo ago afole aigefe hu'niye. <sup>2</sup> Mono hu'a ne'apataya vaya'aite'mo yagai'a ne'apataya vaya'e ke'aepa gemo avo'mo kae'a ali'a apaya ne'malaya vaya'mogi'e'mo Yesu'mo haesaya kafe'mo kahauya hu'naya'monanafa vaya'aife'mo koli hute'a o'atafau'nae. <sup>3</sup> Ani afina'mo Satani'a Isakaliyoti kotega vekamo Yutasi'mo tuolofu'a

vayapati vekamo aipafi'mo faleno haino mai'niye. <sup>4</sup> Yutasi'a apataleno uno mono hu'a ne'apataya vaya'aifenagi ati vaya'aite'mo yagai'a ne'apataya vaya'aifenagi huno hapa paino'ae'mo, haiya kava hu'na avale'na lapamisufi, huno hapa pai'nige'apae'mo ge huge afige hu'a mai'nae. <sup>5</sup> Yutasi'a hu'niya gemo afite'apae'mo apamogaga aite'a, mago monimo hageta kamigune, hu'a ha pai'nageno'ae'mo, <sup>6</sup> he, kanalene, huno huteno'ae'mo apataleno uno Yesu'a muki vaya'e'mo magokepi lokaeno o'maino agai'age'mo maisiya afina'mo avalelino uno apamisiyafe'mo yagaino mai'niye.

*Ge'amo ne'afi'a vekala'mo u'ana Pasova ne'ya'mo alo hu'na'a gemae*

*(Mt 26:17-25; Mk 14:12-21; Yo 13:21-30)*

<sup>7</sup> Inagi hopa afina'mo aeno apafu noleya peleti mayamo ne'naya afina'mo Pasova ne'ya'mo ne-sayafe'mo aikeli sipisipimo ne'amagiya afina'mo afole ai'niye. <sup>8</sup> Yesu'a Pita'e Yoni'efe'mo, utana Pasova ne'ya'mo nesunafe'mo alo hi'ao, huno hana pai'nige'anae'mo, <sup>9</sup> haiya'ale'mo uta'a alo hisu'ae, hu'ana ge hu'ana afi ge'na'ageno'ae'mo, <sup>10</sup> afi'ao, alopa taonifi'mo haitana agesa'ana mago vekamo'mo ani ke'mo alinino ne'visigetanae'mo fotu huga'ae. Akame hutana utanae'mo haisiya nopi'mo hai'ao. <sup>11</sup> No aepa vekae'mo ina gemo hutana ge hutana afi ge'ao, tisa vekamo'a kaha paino'ae'mo, nagae'e ge'nimo ne'afiya vaya'e'mo Pasova ne'ya'mo nesunafe'mo haiya'afi'mo aeka anagi male'nane, hutana afi ge'ao. <sup>12</sup> Agaemo anaga



aeno anagi male'niya nopi'mo hi'yalamu'e sia'e'mo hane'niyanageno alino lanaveligiye. Ani nopi'mo muki ya'mo alo hi'ao, huno hana pai'niye. <sup>13</sup> Hana paiteno alino anate'nige'ana u'ana aga'ana hana pai'niya agufa kavake'mo huno hane'nige'ana agete'ana alo hu'na'ae.

*Yesu'a kave'mo alino apami'niya kavafe'mo  
ava gemo hu'niya gemae*

*(Mt 26:26-30; Mk 14:22-26; 1Ko 11:23-25)*

<sup>14</sup> Ne'ya'mo nesaya afina'mo ago afole ai'nige'apae'mo Yesu'e ge'amo ne'afiya vaya'e'mo u'a hai'a hi'yalamute'mo mai'nae. <sup>15</sup> Agaemo hapa paino'ae'mo, nagafu kisiya kava'mo afole o'ai'ninage'na hogote'na lapakae'e'mo magokepi lokaeta ne'ya'mo nesunafe'mo lusi kava huno nahau'niye. <sup>16</sup> Lapa nepauve, halate Pasova ne'ya'mo o'ne'na maima maima ne'visugeno muki kava'mo afole aitesige'na negauve. <sup>17</sup> Kapumo alino nunumu huno hao ke heteno'ae'mo, alita fako hutapa neyo. <sup>18</sup> Mani afinateti'mo halate nofi alagafati ani'mo o'ne'na maima maima ne'visugeno Goti'a yagaino apatesiya kava'mo afole aisige'nae'mo negauve, huno hapa pai'niye. <sup>19</sup> Peleti mayamo alino nunumu huno hao ke heteno alino akaya heno apamiten'o'ae'mo, manimona nagufa'niye. Lapakaetefe'mo Goti'a amuve. Mani afinateti'mo nagaefe'mo lapakesa afita ho hisayafe'mo ani kava'mo huge huge hutapa maiyo. <sup>20</sup> Ne'ya'mo nete'apae'mo ani kava huno kapumo ali'nen'o'ae'mo, mani kapufi ani'mo Goti'e lapakae'e'mo magokepi

lokaetapa maisayafe'mo saufa kotalakemo hu malete'na lapa maesiya kola'nimo ai'na lakiguve. <sup>21</sup> Afiyo, nage kutulu ya'mo ali'niya vekamo aya'mo hi'yalamute'mo hane'niye. <sup>22</sup> Vemo Mafa'nemo'mo Goti'a lekana paino ate'niya kate'mo afa'a ne'viya'monanafa vaehae agaemo kutulu ya'mo ne'niya vekamo'a lusi kava huno avovo huno yulagefa'mo aigiye, huno hapa pai'nige'apae'mo <sup>23</sup> apakai'apimo ge huge afige hu'apae'mo, lagaepati'mo ina la'mo ani agufa kava'mo hugiye, hu'a hu'nae.

*Ina la'mo lagaepati'mo hogote vekamo mai'niye, hu'a hute'a ge vai'naya gemae*

<sup>24</sup> Ge'amo ne'afiya vaya'mogi apakai'apimo, lagaepati'mo ina la'mo hogote vekamo mai'niye, hu'a hute'a ge vai'nae. <sup>25</sup> Yesu'a, ma mopafi vaya'ai ala'apimo mai'ne'a yagai'a ne'apataya vaya'mogi ali'a afepi apatesayafe'mo yagai'a ne'apatae. Muki vaya'amogimo hu'apae'mo, alagepa hu'a laha maete'a yagai'a nelataya vayane, hu'a hisayafeke'mo hapau'niye. <sup>26</sup> Ani agufa kava'mo nehaya'monanafa lapakaemo ani agufa kava'mo osiyo. Lapakaepati'mo hogote vekamo'a henaga vekagana huno maino. Lapakaete'mo yagaino lapatesiya vekamo kayokayo vekagana huno maino. Hi'yalamute'mo fai mai'niya vekamo hogote vekamo mai'nifi ne'ya'mo alino ne'apamiya vekamo hogote vekamo mai'niye. <sup>27</sup> Hi'yalamute'mo mai'neno ne'ya'mo ne'niya vekamo hogote vekamo mai'niya'monanafa nagaemo ne'ya'mo alino nelapamiya vekagana

hu'na mai'nove. <sup>28</sup> Namalageka nehagetapae'mo o'nataletapa nage'e'mo magokepi'mo lokaetapa maime maime e'nae. <sup>29</sup> Afo'nimo'mo ala'apimo yagaika apatesana vekae, huno lekana paino nate'niya kava'mo hu'na yagaitapa apatesaya vayane, hu'na lekana pai'na lapate'nove. <sup>30</sup> Yagai'na apatesuva kote'mo hi'yalamu'nile'mo mai'netapa ne'ya'mo nege ani'mo nege hutapa mai'netapae'mo Isaleli vaya'mo tuolofu'a nofi vaya'aite'mo yagai'a ne'apataya vaya'ai siate'mo mai'netapa yagaitapa apatesayafe'mo lekana pai'na lapate'nove, huno hapa paiteno <sup>31</sup> Pitafe'mo, Saimoniyo, Saimoniyo, hu'na, Satani'a Gotife'mo, apakaemo apavaleka namige'nao haiya agufa kava'mo hisafige'na apamalageka hu'na apakeno, huno ha pai'niye. <sup>32</sup> Ha pai'niya'monanafa kagesa afika fatago nehana kavakamo hano osisiyafe'mo nunumu hu'na kate'nova'mofe'mo kaipamo alika afe letekae'mo konagakamogimo alika lokiya vaika apato, huno ha pai'nigeno'ae'mo, <sup>33</sup> Ala kava nene, ago alo hu'novanageta'a kage'e'mo kalavusi huteta'a magokepi faligu'ae, huno ha pai'nigeno'ae'mo, <sup>34</sup> Pitao, nagaemo kaha nepauve, kokolemo'mo age o'ai'ninagekae'mo ani afina'mo lole'e mago'e afina'mo nagaefe'mo, o'age'nova vekae, huka hugane, huno ha pai'niye.

*Yesu'a hosu afina'mo afole aigiyanihiyo, huno hapa pai'niya gema*

<sup>35</sup> Yesu'a, monitapigi kutapigi sutapigi hutapa alinitapa o'viyo, hu'na lapa paite'na ali'na

lapate'nogetapa u'naya afina'mo mago yatapimo ohane'nifiye, huno apafi ge'nige'apae'mo, ha'ao, muki yatimo afa'a hane'niye, hu'a ha pai'nageno'ae'mo, <sup>36</sup> hane'niya'monanafa hemenimo monitapi'e kutapi'e'mo hane'nisiya vaya'mogitapamo alo hiyo. Naipe'amo o'ali'nisiya vekamo'a yasi sioti'amo alinino uno male'nisige'a miya faisageno moni aliteno naipe'amo miya faino. <sup>37</sup> Lapa nepauve, Goti mukufi'mo avo'mo kae male'niya gemo'a huno'ae'mo, *ke'aepa gemo amagi'a ne'atalaya vayapi'mo mai'niya vekae, hu'a apakesa afi'nae*, huno nava gemo huno avo'mo kae male'niya gemo afole aigiye. Muki kava'amo nava gemo hu'a avo'mo kae male'naya gemo afole ne'aiye, huno hapa pai'nige'apae'mo, <sup>38</sup> Ala kava nene, ago, lole naipela'mo hane'niye, hu'a ha pai'nageno'ae'mo, alagine, huno hapa pai'niye.

*Yesu'a Alifi'aepa avelega uno nunumu'mo hu'niya gema*

*(Mt 26:36-46; Mk 14:32-42)*

<sup>39</sup> Taonifati'mo ataleno uno Alifi'aepa avelegamo nunumu'mo nehiya aupilagamo ne'vige'apae'mo ge'amo ne'afiya vaya'mo akame hu'a u'nae. <sup>40</sup> U'a ava'yi hute'apae'mo, lapamalageka hisiya kavate'mo haitapa o'alisayafe'mo nunumu'mo hiyo, huno hapa paiteno <sup>41</sup> apataleno uno yafa kayo'mo yaga aunageno uno nehaneya agufa afafale uno ale'ya fai'neni nunumu'mo huno'ae'mo, <sup>42</sup> Afo, kapufi'mo atu ofa anikana huno hane'nigi o'nesuvafe'mo kahau'nisiyana alika atalo,

hu'na huva'monanafa nagaemo nahau'niya kava'mo akame osuka kagaikamo kahau'nisiya kava'mo akame huvo, huno nunumu'mo hu'niye, <sup>43</sup> Mago enisole vekamo koku'napati'mo emineno agaemo ayamufa huno ate'niye. <sup>44</sup> Lusi kava huno kana hau'nigeno aipafi'mo kaveta hugekana hu'nigeno mai'nenoe'ae'mo magoe huno lokiya vaino nunumu'mo nehigenoe'ae'mo amuko hauteno haisemo'mo kolakana huno alino hamaleteno lusi kava huno mopafi'mo lape tape huno asagauno ai'niye. <sup>45</sup> He tino eno apakeyana ge'amo ne'afiya vaya'ai apaipamo'mo kana hu'niya'mofe'mo apau kale'a mai'nageno eno apake'niye. <sup>46</sup> Agaemo, na kava higetapae'mo lapau kaletapa mai'nae. Lapamalageka hisiya kavate'mo haitapa o'alisayafe'mo he titapa nunumu hiyo, huno hapa pai'niye.

*Yesuna atafau'a kalavusi hu'a ate'naya gemae  
(Mt 26:47-56; Mk 14:43-50; Yo 18:3-11)*

<sup>47</sup> Ani gemo hapa nepaige'apae'mo asole vaya'mo Yutasi'a tuolofu'a vayapati vekamo akame hu'a e'nae. Agaemo Yesu'mo haeno nesiyafe'mo haopale'mo e'nigenoe'ae'mo <sup>48</sup> Yesu'a, Yutasiyo, Vemo Mafa'nemo kame vaya'amogi apayapi'mo avaleka atesanafe'mo haeka ne'napiye, huno ha pai'nige'apae'mo <sup>49</sup> agae'e'mo lokae'a mai'naya vaya'mogi agaetegamo na agufa kava'mo afole aisifi hu'a age'a mai'ne'apae'mo, Ala kava nene, naipetileti'mo apaisupiye, hu'a nehu'apae'mo <sup>50</sup> apakaepati'mo mono hu'a ne'apataya

vaya'aite'mo yagaino ne'apateya vekamo ali'ya'amo ne'aliya vekamo agesamo heno lafe hutalegeno asagauno ai'niye. <sup>51</sup> Yesu'a, ani agufa kava'mo osutapa afa'a ataleyo, huno hapa paiteno agesale'mo ame aliteno halate alino alagepa huno ate'niye. <sup>52</sup> Yesu'a mono hu'a ne'apataya vaya'aite'mo yagai'a ne'apataya vaya'aifenagi mono note'mo ne'yagaiya vaya'aite'mo yagai'a ne'apataya vaya'aifenagi vayatama vaya'aifenagi huno hapa paino'ae'mo, vaya'mo apamagitenno kumaya ne'aliya vekamo kalavusi hu'a atesayafe'mo naife alige kayo'mo alige huli'a ne'aya kava hutapa kalavusi hutapa natesayafe'mo ne'afiye. <sup>53</sup> Nagaemo lapakae'e'mo muki afina'ae afina'ae'mo alope mono nopi'mo mai'nogetapae'mo o'natafau'naya'monanafa hemenimo lapakaemo ani kava'mo hisaya afina'e hani nehiya kavate'mo ne'yagaiya vekamo himamu'aleti'mo hisiya afina'e'mo ago afole ai'nigetapae'mo nehae, huno hapa pai'niye.

*Pita'a Yesufe'mo o'age'nova vekae, huno hu'niya gemae*

*(Mt 26:57-58,69-75; Mk 14:53-54,66-72; Yo 18:12-18,25-27)*

<sup>54</sup> Apakaemo kalavusi hu'a atete'a avaleli u'a mono hu'a ne'apataya vaya'aite'mo yagaino ne'apateya vekamo nopi'mo haitageno Pita'a apasa hulino u'niye. <sup>55</sup> No kumate'mo ata kaete'a loto hu'a mai'nageno'ae'mo Pita'a eno apakae'e'mo magokepi atale'mo loto hu'a mai'nae. <sup>56</sup> Mago a kanomo aliya ne'aliya a

kanomo'a eno ageyana atamo'mo aeno ha leya yate'mo Pita'a mai'nigeno aulu haeno ageteno'ae'mo, ani vekamo agae'e'mo magokepi lokaeno ne'maiya vekae, huno nehigeno'ae'mo, <sup>57</sup> Ane, nagaemo o'age'nova vekae, huno ha pai'niye. <sup>58</sup> Aise afina'mo utegeni alu vekamo'mo ageteno'ae'mo, kagaemo apakaepati vekamo mai'nane, huno nehigeno, ma vekae, nagaemo apakaepati vekamo o'mai'nove, huno ha pai'niye. <sup>59</sup> Mago'e huno aise afina'mo utegeni mago alu vekamo'mo lokiya gefati'mo huno'ae'mo, ani vekamo Galeliya kotega vekamo mai'niya'mofe'mo agae'e'mo magokepi lokaeno ne'maiya vekae, huno ge huge huge huno mai'nigeno'ae'mo <sup>60</sup> Pita'a, ma vekae, o'afuva agufa gemo nehanagi na agufa yane huka nehane, huno nehigeno'ae'mo kokolemo'mo age ai'nigeno'ae'mo <sup>61</sup> Ala kava ne'mo'a aino afe leno Pita'mo age'niye. Ala kava ne'mo'a hogoteno Pitafe'mo, kokolemo'mo age o'ai'ninagekae'mo lola'e mago'e afina'mo nagaefe'mo, o'age'nova vekae, huka hugane, huno ha pai'niya gee'mo agesa afino ho huteno'ae'mo <sup>62</sup> kumatega lamino aipafati'mo atu haegekana hu'nigeno avi'ya hu'niye.

*Yesufe'mo kigi hu'a atete'a amagi'naya gema  
(Mt 26:67-68; Mk 14:65)*

<sup>63</sup> Yesu'a atafau'naya vaya'mogimo kigi hu'a atege amagige hute'apae'mo <sup>64</sup> lavolavoleti'mo aulagafi'mo ai'a ati kae male'ne'a e'a amagite amagite hute'apae'mo, ina la'mo kamagi'nifigi kaune gemo huka laha paiyo, hu'a afi ge'nae.

<sup>65</sup> Mago'e mago'e gemo hute'a hu'a faipa hu'a ate'nae.

*Kanisole vaya'mogimo agoti hu'a ate'naya gema*

*(Mt 26:59-66; Mk 14:55-64; Yo 18:19-24)*

<sup>66</sup> Kotilamiyapi'mo kanisole vayanagi vayatama vayanagi mono hu'a ne'apataya vaya'aite'mo yagai'a ne'apataya vayanagi ke'aepa gemo avo'mo kae'a ali'a apaya ne'malaya vayanagi hu'a e'a ali'a anupa hute'apae'mo Yesu'mo kanisole vaya'aitegamo avaleli e'apae'mo, <sup>67</sup> Kalaisi vekamo mai'nisanana laha paiyo, hu'a ha pai'nageno'ae'mo, lapa paisuvana lapakesa afitapa fatago osugae. <sup>68</sup> Loka hu'na lapafi gesuvana lapakaemo ge'nile'mo aetapa atagaina huta naha paitetapae'mo afa'a o'natalegae. <sup>69</sup> Ani afina'mo utesigeno Vemo mafa'nemo'a haino himamu'age vekamo Goti'a lamaga haopale'mo fai maigiye, huno hapa pai'nige'apae'mo <sup>70</sup> inagi kagaemo, Goti Mafa'ne'amo mai'nove, huka nehapiye, hu'a afi ge'nageno'ae'mo, lapakaitapimo ago alagi nehae, huno hapa pai'nige'apae'mo, <sup>71</sup> mago'e hu'a faigoko gemo hisageta afisuna gemo alagi ohane'niye. Agai'amo ani gemo avayafati'mo higeta alagi afune, hu'a hu'nae.

## 23

*Yesu'mo Pailati aulagale'mo agoti hu'a ate'naya gema*

*(Mt 27:1-2,11-14; Mk 15:1-5; Yo 18:28-38)*



<sup>1</sup> Muki kanisole vaya'amogi he ti'a avaleli'a Pailatitegamo u'nae. <sup>2</sup> Apakaemo aepa fai'a agoti hu'a ate'apae'mo, ani vekamo'a, Gamani vaya'ai gemo o'afiyo. Alatapimo Sisa'mo takesi monimo o'amiyo. Nagaemo Kalaisi vekamo alatapimo kini vekamo mai'nove, huno laha pai'nigeta afi'none, hu'a ha pai'nageno <sup>3</sup> Pailati'a, Yu vaya'aite'mo ne'yagaina ala kini veka'apimo mai'napiye, huno afi ge'nigeno'ae'mo, he, ka-gaemo ani gemo alagi ago hane, huno ha pai'niye. <sup>4</sup> Pailati'a mono hu'a ne'apataya vaya'aite'mo yagai'a ne'apataya vaya'e muki vaya'efe'mo, agoti hu'na atesuva kava'mo o'agove, huno hapa pai'nige'apae'mo <sup>5</sup> lokiya gefati'mo hu'apae'mo, Galeliya kotegati'mo aepa faino alino apaya maleme maleme eno manile Yutiya kotega'e'mo alino apaya maleno'ae'mo muki vaya'mogi hosu kava'mo hisayafeke'mo alino he tino ne'apate, hu'a ha pai'nae.

*Heloti aulagale'mo agoti hu'a ate'naya gemae*

<sup>6</sup> Pailati'a ani gemo afitenoe'ae'mo, Galeliya kotega vekamo mai'nifiye, huno apafi ge'nige'apae'mo, <sup>7</sup> he, hu'a ha pai'nageno'ae'mo, Heloti'a yagaino ne'apateya kote vekamo mai'niye, huno huteno Helotitegamo alino ate'nigeno u'niye. Ani afina'mo Heloti'a Yulusalemu taonifi'mo eno mai'niye. <sup>8</sup> Heloti'a Yesufe'mo ava gemo hu'nageno afitenoe'ae'mo, mago no'agaya agufa aune kava'mo hisigeno agesiyafe'mo hau'nigeno yatala afina'mo agava huno mai'niya'mofe'mo Yesu'mo ageteno'ae'mo amogaga ai'niye. <sup>9</sup> Inagi Yesufe'mo loka huno

afi ge afi ge hu'niya'monanafa ge'ale'mo aeno atagaina huno ge osu'niye. <sup>10</sup> Mono hu'a ne'apataya vaya'aite'mo yagai'a ne'apataya vaya'e ke'aepa gemo avo'mo kae'a ali'a apaya ne'malaya vaya'mogi'e'mo he ti'a lokiya gefati'mo hu'apae'mo, ma agufa kava'mo hu'niye ina agufa kava'mo hu'niye, hu'a hosu faigoko gemo hu'a ate'nae. <sup>11</sup> Heloti'e ati vaya'amogi'e'mo agi'ale'mo ali'a afepi atege hu'a faipa hu'a atege hute'a alagepa kukenamo ali'a vai'a atete'apae'mo Heloti'a halate alino ate'nigeno Pailatitegamo u'niye. <sup>12</sup> Hogote'ana Heloti'e Pailati'e'mo kame kame hu'ana mai'na'a'monanafa ani afina'mo ali'ana konaga he'na'ae.

*Pailati'a malipu yosale'mo nili aigeno falino, huno hapa pai'niya gema*

*(Mt 27:15-26; Mk 15:6-15; Yo 18:39-19:16)*

<sup>13</sup> Pailati'a mono hu'a ne'apataya vaya'aite'mo yagai'a ne'apataya vaya'e Yu vaya'aite'mo yagai'a ne'apataya vaya'efe'mo ge hu'nige'apae'mo e'nageno hapa paino'ae'mo, <sup>14</sup> ani vekamo nagaetegamo avalelitetapa agoti hutapa atetetapae'mo, agaemo vaya'aife'mo, gamani vaya'ai gemo o'afiyo, huno hapa paiteno apakesa nefaiye, hutapa naha pai'nage'nae'mo lapaulagale'mo ago ali'na fako hu'na ate'nove. Afiyo, hosu kava'mo hu'niye, hutapa hosu faigoko gemo hu'naya'monanafa ani hosu kava'mo hu'niye, hu'na o'agove. <sup>15</sup> Ani kava huno Heloti'a hosu kava'amo o'ageno alino ate'nigeno halate aino atagi neno

lagaetegamo e'niye. Afiyo, kamiti amagisugeno falisiya agufa kava'mo osu'niya'mofe'mo <sup>16</sup> nofi kayoteti'mo amagite'na afa atesugeno ugiye, huno hapa pai'niye. <sup>17</sup> Pailati'a hapa afina'mo kalavusifi'mo mai'naya vayapati'mo magoke vekamo hatu maeno atesigeno visiya vekamo mai'niye. <sup>18</sup> Mai'niya'monanafa muki vaya'amogi magokepi'mo ae'a lago hu'a alopa gefati'mo hu'apae'mo, ani vekamo amagiyo, amagiyo, Malamasi'a hatu maeka ategenolagaetegamo eno, hu'a hu'nae. <sup>19</sup> Malamasi'a ani taonifi'mo gamani vaya'aina apamagi'a ali'a hapafaitalegefe hu'naya afina'mo mago vekamo kamiti amagi'nigeno fali'niya'mofe'mo kalavusi hu'a ate'nae. <sup>20</sup> Pailati'a Yesu'mo afa'a atesiyafe'mo huno'ae'mo halate ge huno apafi ge'niya'monanafa <sup>21</sup> malipu yosale'mo nili aiyo, nili aiyo, hu'a hu'nae. <sup>22</sup> Pailati'a halate napa tali afina'mo, na agufa kava'mo hu'nigetapaene. Haiya agufa hosu kava'mo hu'niye. Amagisugeno falisiya agufa hosu kava'amo o'agova'mofe'mo nofi kayoteti'mo amagite'na afa'a atesugeno ugiye, huno hapa pai'niya'monanafa <sup>23</sup> mago'e mago'e hu'a alopa gefati'mo magokepi'mo hu'a ae'a lago hu'a hu'apae'mo, malipu yosale'mo nili aiyo, nili aiyo, hu'a huge huge hu'a mai'naya gemo'mo Pailati gemo ago hu'a ae'a ati kae'naya'mofe'mo <sup>24</sup> Pailati'a ge'apimo afitenohapau'niya kava'mo hu'niye. <sup>25</sup> Gamani vaya'aina apamagino alinohapa faitalesiyafe'mo hu'niya afina'mo mago vekamo kamiti amagi'nigeno fali'niya'mofe'mo

kalavusi hu'a ate'naya vekae'mo ato hu'a ha pai'naya vekamo hatu maeno ateteno hapau'niya kava'mo akame huno Yesufe'mo malipu yosale'mo nili aigeno falino, huno ati vaya'aife'mo hapa paiteno avaleno apami'niye.

*Malipu yosale'mo nili ai'naya gemae  
(Mt 27:32-44; Mk 15:21-32; Yo 19:17-27)*

<sup>26</sup> Avaleli'a ne'vageno'ae'mo Saimoni'a Sailini taonifi vekamo kahaufilagati'mo ne'ege'a fotu nehu'apae'mo atafau'ne'a malipu yosamo ali'a agi'nale'mo kofi'a ate'nageno alino kofilino Yesu akame huno u'niye. <sup>27</sup> Asole vaya'mo akame hu'a u'nage'apae'mo a'ne anaga'mogimo yulagefa aige avi'ya huge huli'a akame hu'a u'nae. <sup>28</sup> Yesu'a aino afe leno'ae'mo, Yulusalemu a'ne anagane, avi'ya hutapa o'nateyo. Lapakaitapi'e mafa'netapi'efeke'mo avi'ya hutapa lapateyo. <sup>29</sup> Na agufa kava'mo hugiya'mofe'mae. Afiyo, mago afina'mo afole aisige'apae'mo, anamo a'negi mafa'ne ali'a no'apataya a'negi mafa'nemo nu no'apamiya a'negi hu'a alagepa hu'a ne'maiye, hu'a hugae. <sup>30</sup> Ani afina'mo *alopa avee'mo, aika nakupaeka emikeka lagufale'mo asagauka aigeta falino. Aise avee'mo, eka aeka lati kao, hu'a ha paigae.* <sup>31</sup> Hegafa yosale'mo ani kava'mo nehaya'mofe'mo vai'niya yosale'mo na agufa kava'mo hugae, huno hapa pai'niye.

<sup>32</sup> Malipu yosale'mo agae'e'mo magokepi nili aite'a ali'a he ti'a anatesayafe'mo ke'aepa gemo amagi'ana atale'na'a vekala'e'mo apavaleli'a u'nae. <sup>33</sup> Mago aupilaga agi'amo Anu Ayamufagayagamo u'a ava'yi hute'a Yesu'e

gamani ke'aepa gemo amagi'ana atale'na'a vekala'e'mo malipu yosale'mo nili aite'a ali'a he ti'a apate'nae. Mago vekamo ali'a lamaga haopale'mo he ti'a atete'a mago vekamo ali'a hoga haopale'mo he ti'a ate'nae. <sup>34</sup> Yesu'a, Afo, hu'na, na agufa kava'mo nehupi hu'a o'age'naya'mofe'mo hosu kava'mo anona'apimo afa'a alika atalo, huno nunumu'mo hu'niye. Kukena'amo ali'a fako hu male'ne'a yafateti'mo yokalo le'nae. <sup>35</sup> Muki ve a'nemo he ti'a mai'ne'a aulu he'a age'a mai'nae. Yagai'a ne'apataya vaya'e'mo magokepi lokae'a mai'ne'a hu'apae'mo, vaya'ai apakufamo alino katino apate'niye. Kalaisi vekamo Goti'a lekana paino ate'niya vekamo mai'nisiyana agai'a agufamo afa'a alino katino ategaiye, hu'a hute'a hu'a faipa hu'a ate'nae. <sup>36</sup> Ani kava hu'a ati vaya'mogi e'a atu ofa nofi alagafati ani'mo ali'a amite'apae'mo, <sup>37</sup> Yu vaya'aite'mo ala kini veka'apimo mai'nisanana kagaika kagufamo alika katika kato, hu'a hute'a hu'a faipa hu'a ate'nae.

<sup>38</sup> Avo'mo kaeno'ae'mo,

MANI VEKAMO YU VAYA'AITE'MO ALA KINI

VEKA'APIMO'MAE,

huno avo'mo kaeteno Yesu agenopalegamo malipu yosale'mo nili ai male'niye. Ani avo'mo kae'niya gemo Galiki gefati'mo kaege Latini gefati'mo kaege Himulu gefati'mo kaege huno avo'mo kae male'niye.

*Mago vekamo ke'aepa gemo amagino  
atale'niya vekamo malipu yosale'mo Yesu'e'mo*

*nili aite'a ali'a he ti'a ate'naya vekamo'a  
Yesufe'mo agesa afino fatago hu'niya gemae*

<sup>39</sup> Mago vekamo ke'aepa gemo amagino atale'niya vekamo malipu yosale'mo Yesu'e'mo nili aite'a ali'a he ti'a ate'naya vekamo'a ina ge hu'niye, Kalaisi vekamo mai'nisanana kagaika'e la'agae'e'mo lahau vaiyo, huno huteno huno faipa huno ate'niye. <sup>40</sup> Ate'nigeno mago vekamo'mo ge hauteno'ae'mo, agoti hu'a latete'apae'mo, hosu kava'mo hu'nayanage'a afa'a faligae, hu'a laha pai'nagetae'mo magokepi falisunafe'mo mai'nona'mofe'mo Gotife'mo koli nosapiye. <sup>41</sup> La'agaemo hosu kava'mo hu'no'a'mofe'mo anonati'alefe'mo kayo'mo nela'amiya'monanafa mani vekamo magoke hosu kava'mo alagi osu'niye, huno ha paiteno'ae'mo <sup>42</sup> Yesufe'mo, Ala kava nene, vaya'aite'mo alagi yagaika apatesana himamukamo alisana afina'mo nagaefe'mo kagesa afika ho huvo, huno ha pai'nigeno'ae'mo, <sup>43</sup> lama gemo kaha nepauve, hemenitomo Palanaisi kote'mo haisanageta'a nagae'e'mo maigu'ae, huno ha pai'niye.

*Yesu'a fali'niya gemae*

*(Mt 27:45-56; Mk 15:33-41; Yo 19:28-30)*

<sup>44</sup> Felugakuku'mo muki ko'alegamo hani hulinuno une'mo koti'niye. <sup>45</sup> Yegemo'mo aeno ha neleya ya'amo hano hu'nigeno'ae'mo alopa mono nopi'mo alapa'age lavolavo kitamo aeno apake aino lole hu'nigeno'ae'mo <sup>46</sup> Yesu'a alopa gefati'mo huno'ae'mo, *afo'nimogae, hu'na, naune'name'mo ali'na kayapi'mo nekamuve,*

huno huteno fali'niye. <sup>47</sup> Ati vaya'aite'mo yagaino ne'apateya vekamo'a ani gemo afitenoa'ae'mo, lama gemo nehuve, mani vekamo fatago vekamo mai'niye, huno hapa paiteno Goti agi'ale'mo alino asaga huno ate'niye.

<sup>48</sup> Muki vaya'amogi muki kava'mo hisage'a agesayafe'mo e'a ali'a anupa hu'a mai'naya vaya'mogimo age'nage'a nili ai'nageno fali'nige'a agete'a atale'a hapaifi'yamo amagite'a no'apilega u'nae. <sup>49</sup> Yesu ao vaya'e Galeliya kotegati'mo magokepi lokae'a akame hu'a e'naya a'nemogi'e'mo afagi'ale'mo he ti'a mai'ne'a aulu he'a age'nae.

*Yosefe'a Yesu agufa'amo alinino uno yafakapi'mo kino ate'niya gemae*

*(Mt 27:57-61; Mk 15:42-47; Yo 19:38-42)*

<sup>50</sup> Mago kanisole vekamo Yosefe'a Alamatiya taonimo Yu vaya'ai taonifi vekamo alagepa fatago vekamo mai'niye. <sup>51</sup> Agaemo Goti'a yagaino apatesiya kava'mo afole aisiya afinafeke'mo agava mai'niye. Agaemo alu kanisole vaya'mogi vege hute'a hu'naya kavatefe'mo, he kanalene, huno osu'niye. <sup>52</sup> Agaemo uno Pailatife'mo, Yesu agufa'amo aligesuve, huno afi ge'niye. <sup>53</sup> He, huno ha pai'nigeno eno malipu yosaleti'mo Yesu agufa'amo aino akailino emineno male'neni alagepa yaveyave lavolavoleti'mo agufale'mo hayaeno ateteno yafapi'mo ago kafi male'naya yafa kapi'mo mago vaya'mo ki'a o'apate'naya yafakapi'mo alinino uno kino ate'niye.

<sup>54</sup> Ani afina'mo ne'ya'mo nesaya ya'mo ali'a alu ne'aiya afina'mogeno Sapati afina'mo ago

afole aigefe hu'niye. <sup>55</sup> A'ne anaga'mo Galeliya kotegati Yesu'e'mo magokepi lokae'a e'naya a'nemogi Yosefe'a akame hu'a u'a agayana yafa ka'mo hane'nigeno Yesu kefa'amo kino ate'nige'a agete'apae'mo <sup>56</sup> atale'a no'apilega u'a alagepa atumo ne'aiya malasini'e uveli'e'mo alo hute'a Sapati afina'mo ke'aepa gemo akame hu'a mai'a falu hu'nae.

## 24

*Yesu'a ago he ti'niya gemae*

*(Mt 28:1-10; Mk 16:1-8; Yo 20:1-10)*

<sup>1</sup> Satepi'mo hogote afina'mo kotilamiyapi'mo a'ne anaga'mogi alagepa atumo ne'aiya malasinimo alo hu'naya malasinimo alini u'a <sup>2</sup> agayana ani yafa'mo ago alino heleve huno atale'nigeno yafa ka'mo aka hu'nige'a agete'a <sup>3</sup> u'a yafakapi'mo hai'a agayana kefa'amo ohane'nige'a age'nae. <sup>4</sup> Na kava hu'nifi, hute'a apakesa ala'amo ne'afige'anae'mo alave alave nehiya kukenamo vailifa vekala'mo hapaopale'mo afole aite'ana he ti'ana mai'na'age'apae'mo <sup>5</sup> koli hute'a ape hu'a mai'nage'anae'mo, na kava higetapa afa'a mai'niya vekamo kanolule'mo etapa kahauya nehae. <sup>6</sup> Manifi'mo o'mai'nifa ago he tino u'niye. Galeliya kotegamo mai'nenoe'mo ago lapa painoe'mo, <sup>7</sup> Vemo Mafa'nemo avaleli u'a hosu vaya'ai apayapi'mo atesage'apae'mo malipu yosale'mo nili aite'a ali'a he ti'a atesageno faliteno lole'e mago'e afina'mo kanolufi'mo maiteno ago he tigiye, huno hu'niya



gee'mo lapakesa afitapa ho hiyo, hu'ana hapa pai'na'age'apae'mo <sup>8</sup> apakesa afi'a ho hu'nae. <sup>9</sup> Yafa ka'mo atale u'a leveni'a vaya'e muki vaya'efe'mo ani kavafe'mo ava gemo hu'a hapa pai'nae. <sup>10</sup> Maliya'a Maganala kotega anagi Yovana'agi Maliya Yemisi ita'amo'agi mago'e a'ne anaganagi hu'a ani gemo apa vaya'aife'mo hapa pai'nage'a <sup>11</sup> afite'apae'mo afa'a aigofe nehae, hu'a apakesa afi'nae. <sup>12</sup> Apakesa afi'naya'monanafa Pita'a nagu nagu huno uno yafa kapi'mo ape huno ageyana hayaeno ate'niya lavolavo'age'mo hane'nigeno ageteno ataleno ne'eno'ae'mo, haiya agufa kava'mo hu'nifi, huno agesa afime afime no'alega u'niye.

*Lole vekala'mo Emeyasi kotega ne'vaya kate'mo ne'va'ageno'ae'mo Yesu'a afole ai'niya gema*

*(Mk 16:12-13)*

<sup>13</sup> Ani afina'mo ge'amo ne'afi'a vekala'mo Emeyasi taonifi'mo ugefe'mo u'na'ae. Yulusalemu taonifati'mo Emeyasi taonimo ne'vaya ka'mo aise afagi'ale'mo ina kava'mo huno leveni kilomitamano hane'niye. <sup>14</sup> Anakaemo ne'u'anae'mo afole ai'niya kavafe'mo ge huge afige hume hume ne'va'ageno <sup>15</sup> Yesu'a agai'age'mo eno anakame huno anakae'e'mo u'niye. <sup>16</sup> Anaulagale'mo mago ya'mo'a ago aino ati kae'nige'ana Yesu'mae, hu'ana o'age'na'ae. <sup>17</sup> Yesu'a, na agufa kavafe'mo ge huge afige hume hume ne'va'ae, huno anafi ge'nige'anae'mo anile'mo he ti'ana mai'ne'anae'mo anaipamo'mo kana huge hosu anaugosamo kalige hu'na'ae.

18 Ani vekalapati'mo mago vekamo agi'amo Kiliyopasi'a ge'ale'mo aeno atagaina huno ha paino'ae'mo, muki vaya'mo Yulusalemu taonifi'mo ete ete hu'a mai'naya vaya'mogi hemenimo afole ai'niya kavafe'mo ava gemo hu'a ne'afiya'monanafa kagaemo o'afika mai'napiye, huno afi ge'nigeno'ae'mo, 19 na agufa kava'mo afole ai'niye, huno anafi ge'nige'anae'mo, Yesu'a Nasalasa vekamo Gotitegati gemo alinino eno aeno hakalo huno hapa nepaiya vekamo mai'neni Goti aulagale'e muki vaya'ai apaulagale'e'mo himamu'aleti'mo lokiya kava'mo huge lokiya gemo hapa paige huno mai'niye. 20 Mai'nige'apae'mo mono hu'a ne'apataya vaya'aite'mo yagai'a ne'apataya vaya'e yagai'a nelataya vaya'mogi'e'mo kamiti amagisayafe'mo gamani vaya'aitegamo avaleli u'a atete'a malipu yosale'mo nili aite'a ali'a he ti'a ate'nae. 21 Lagaemo, ani vekamo'a Isaleli vaya'mogita hatu maeno lategaiye, huta lagesa afitetae'mo laipafati'mo lamogaga ai'niye. Ani kava'mo ago afole ai'nigeno lole'e mago'e afina'mo ago u'niye. 22 Mago lagae'e'mo mai'naya a'nemogimo mago gemo laha pai'nagetae'mo lahou ai'none. 23 Apakaemo kotilamiyapi'mo yafakapi'mo u'a agayana kefa'amo ohane'nige'a agete'apae'mo atale'a ai'a atagi ne'e'apae'mo, enisole vekala'mo anake'nonage'anae'mo, kanolufati'mo ago he tino afa'a mai'niye, hu'ana laha pai'nae, hu'a laha pai'nae. 24 Lagaepati'mo mago lole vekala'mo u'ana a'ne anaga'mogi laha

pai'naya kavafe'mo yafakapi'mo age'na'ana Yesu kefa'amo o'age'na'ae, hu'ana ha pai'na'ageno'ae'mo, <sup>25</sup> O negi vekalane, hu'na, lanakaemo muki ge'amo Gotitegati gemo alini e'a ae'a hakalo hu'a hapa pai'naya vaya'mogi hu'naya gee'mo lanakesa afitana fatago hisa'afe'mo ago lanake kani'nigetana vase vase hutana ne'afi'ae. <sup>26</sup> Apakaemo, Kalaisi vekamo hogoteno agafu kitesigeno'aeke'mo ala agi'amo aligiye, hu'a avo'mo kae male'naya gemo o'afi'na'afiye. <sup>27</sup> Agaemo Mosese'a agaefe'mo ava gemo huno avo'mo kae male'niya gemo aepa faiteno aepa'amo alino anaya male'niye. Ani kava'mo huno muki vaya'mo Gotitegati gemo alini e'a ae'a hakalo hu'a hapa nepaiya vaya'mogimo agaefe'mo ava gemo hu'naya gemo aepa'amo alino anaya maleme maleme u'niye. <sup>28</sup> Anakaemo uta'a maigu'ae, hu'ana hu'na'a taonimo haopale'mo u'a ava'yi hute'apae'mo Yesu'a ago anataleno uno afagi hugekana hu'nige'anae'mo <sup>29</sup> lokiya gefati'mo hu'anae'mo, hemenimo ago uneti'nigeno hani hugefe hiyanagi ataleka eka la'agae'e'mo maiyo, hu'ana ha pai'na'ageno eno nopi'mo haino anaka'e'e'mo lokaeno mai'niye. <sup>30</sup> Hi'yalamute'mo anaka'e'e'mo magokepi lokaeno mai'nenoe'mo peleti mayamo alino nunumu'mo huno hao ke heteno akaya heno anami'niye. <sup>31</sup> Anami'nigeno'ae'mo anaulagamo ayake'nige'ana Yesu'mae, hu'ana ageta'ageno malage huno alino lageso hu'nige'ana mago'e hu'ana o'age'na'ae.

<sup>32</sup> Anakai'animo, kategamo ne'etae'mo Goti Mukufati gemo aepa'amo alino la'aya ne'malegeno'ae'mo la'aipafi'mo haga'age gemo afole ai'nigeno la'aipamo'mo falu huteno la'amogaga ai'niye, hu'ana hu'na'ae. <sup>33</sup> Hute'anae'mo malage hu'ana he ti'ana Yulusalemu taonifi'mo ai'ana atagi ne'ana e'na'ae. E'ana ava'yi hute'ana apake'na'ana leveni'a vaye'e mago apakae'e'mo lokae'a mai'naya vaye'e'mo ali'a anupa hu'a mai'ne'apae'mo <sup>34</sup> apakaemo, alagi lama ge hu'a Ala kava ne'mo ago he ti'niye. He titeno'ae'mo Saimonitegamo ago afole ai'nigeno age'niye, hu'a hana pai'nage'anae'mo <sup>35</sup> kategamo afole ai'niya kavafe'mo ava gemo huge peleti mayamo alino akaya he'nige'ana Yesu'mae, hu'ana age'na'a kavafe'mo ava gemo huge hu'ana hapa pai'na'ae.

*Yesu'a ge'amo ne'afiya vaye'ai folaga'apifi'mo afole ai'nige'a age'naya gema*

*(Mt 28:16-20; Mk 16:14-18; Yo 20:19-23)*

<sup>36</sup> Ani gemo hapa nepai'ageno'ae'mo Yesu'a agai'age'mo folaga'apifati'mo afole aitenoe'ae'mo, lapaipamo'mo falu hino, huno hapa pai'nige'apae'mo, <sup>37</sup> afene, hu'a hute'a hapau aite'a atete hu'nae. <sup>38</sup> Agaemo, na kava higetapae'mo lapaipamo'mo kana hu'nigetapa lole lapakesa ne'afiye. <sup>39</sup> Nayapi'e naiyafi'e'mo eta agetetapa name alitetapae'mo, agaema, hutapa nageyo. Amega nagufa'e nayamufa'ni'e'mo hane'niyana afel'mo'a amega agufa'e ayamufa'e'mo ani kava huno ohane'niye, huno hapa paiteno <sup>40</sup> aya'e aiya'e'mo alino

apave li'nige'a <sup>41</sup> agete'apae'mo lusi kava hu'a apamogaga ai'naya'monanafa apakesa afi'a fatago osu'nafa lole apakesa afi'nae. Agaemo, mago ne'ya'mo manile hane'nifiye, huno apafi ge'nige'apae'mo <sup>42</sup> mago kae malefa noyame'e kevekeve anu'e'mo ali'a ami'nageno <sup>43</sup> apaulagale'mo alino ne'niye. <sup>44</sup> Neteno'ae'mo, mani kavafe'mo lapakae'e'mo mai'ne'nae'mo ago lapa pai'nae'mo, muki kavafe'mo nava gemo hu'a avo'mo kae male'naya gemo afole aigiye. Mosese'a avo'mo kae male'niya nava gegi Gotitegati gemo alini e'a ae'a hakalo hu'a hapa nepaiya vaya'mogi avo'mo kae male'naya nava gegi Samu gefi'mo avo'mo kae male'naya nava gemogi huno afole aigiye, <sup>45</sup> huno apakesa huno halo aino hapa paiteno alino apaya male'niye. <sup>46</sup> Huno hapa paiteno'ae'mo, Kalaisi vekamo agafu kisigeno faliteno'ae'mo napa tali afina'mo kanolufati'mo he tigiye. <sup>47</sup> He tino mai'nisige'apae'mo Yulusalemu taonifati'mo aepa faite'a hapa pai'apae'mo, lapaipamo alita afe legeno'ao Goti'a Kalaisi agi'aleti'mo hosu kavatapimo alino ataleno, hu'a hapa paite'apae'mo ani agufa gemo hu'a muki nofi vaya'aife'mo ae'a hakalo hu'a hapa paisaya kava'mo hane'niye, hu'a avo'mo kae male'nae. <sup>48</sup> Lapakaemo mani kava'mo ago age'naya'mofe'mo ani kavafe'mo faigoko ge'nimo hutapa hapa paisaya vaya'mo mai'nae. <sup>49</sup> Afiyo, Afo'nimo'mo, Naune'name'mo ali'na lapamiguve, huno lapa pai'niyanage'na Goti Auneme'amo

ali'na atesugeno lapakaetegamo emi'negaiye.  
Emi'negaiya'monanafa utapa Yulusalemu  
taonifike'mo hogotetapa agava maime maime  
ne'vigeno'ao Goti Auneme'amo'mo emineno  
lokiya vaino lapategaiye, huno hapa pai'niye.

*Goti'a Yesu'mo halate koku'napi'mo avalelino  
hai'niya gemae*

*(Mk 16:19-20; Apa 1:9-12)*

<sup>50</sup> Agaemo apavalelino Metani taoni  
haopalegamo uno ava'yi huteno aya'mo alino  
asagauno aeno hayo hu'nen'ae'mo, Goti'a  
alagepa huno lapa maeno, <sup>51</sup> huno hapa  
nepaigeno'ae'mo Goti'a koku'napi'mo avalelino  
hai'niye. <sup>52</sup> Nehaige'apae'mo agaefe'mo mono  
hute'a ai'a atagi ne'a Yulusalemu taonifi'mo  
ne'u'apae'mo lusi kava hu'a apamogaga aime  
aime u'nae. <sup>53</sup> Mai'ne'apae'mo muki afina'mo  
alopa mono nopi'mo hai'a Goti agi'ale'mo ali'a  
asaga hu'a atege atege hu'a mai'nae. He, lama  
ge.

**Saufa Kotalake Gemae**  
**The New Testament and Portions of the Old**  
**Testament in the Keyagana Language of Papua New**  
**Guinea**  
**Sampela hap Buk Baibel long tokples Keyagana long**  
**Niugini**

copyright © 2001 Wycliffe Bible Translators, Inc.

Language: Keyagana

Translation by: Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-26

---

PDF generated using Haiola and XeLaTeX on 11 Nov 2022 from source files dated 9 Oct 2020

dec78c50-71b7-5d19-97bf-bf625abcf44